

**SIXTH LEGISLATIVE ASSEMBLY OF MIZORAM
(FIFTH SESSION)**

LIST OF BUSINESS

**FOR TWELFTH SITTING ON THURSDAY, THE 1ST APRIL, 2010
(Time 10:30 AM to 1:00 PM and 2:00 PM to 4:00 PM)**

MEMBERS PRESENT

Pu R. Romawia, Speaker at the Chair, Chief Minister, 10 Ministers and 26 Members were present.

QUESTIONS

1. *Questions* entered in separate list to be asked and oral answers given.

PRIVATE MEMBERS' BUSINESS

2. **Resolution.*

Note : Please see Bulletin Part-II Sl. No. 92 dated 29th March, 2010 for relative precedence of Private Members' Resolutions to be moved.

S P E A K E R : Tihnuam tak leh thu awih taka in awm chuanin rama thil tha te hi in ei ang. Nimahsela, in duh lova, in hel chuan khandaih in a ei zo ang che u.

Isaia 1:19-20.

Zawhna leh chhanna ah kan kal leh nghal ang a. Zawhna 171-na kan la anga, Pu B. Lalthlengliana'n han zawt sela i lo ko ang.

Pu B. LALTHLENGLIANA : Pu Speaker, ka zawhna Starred Question No. 171-na. Industries Minister zahawm tak chhan atan-

- (a) MIFCO Staff te hlawh thla engzatnge pek theih loh a nih?
- (b) Sapthei chingtute sapthei leisakna pawisa MIFCO Ltd. hian engzatnge a la bat?

S P E A K E R : Chhang turin a enkawltu Minister zahawm tak Pu S. Hiato i lo sawm ang.

Pu S. HIATO, MINISTER : Pu Speaker, member zahawm tak, Pu B. Lalthlengliana zawhna chhanna chu hei hi a ni. Zawh laia chhanna kan in prepare lai khan thla nga kan ba a, mahse nimirah khan January, 2009 thla thleng in hlawh hi kan pe tawh a. February, 2009 chiah kan ba tawh e.

Sapthei chingtute sapthei leisakna pawisa MIFCO Ltd. hian a ba tawh lo a ni, kan pe zo tawh.

S P E A K E R : Starred Question No. 172-na ah kan kal ang a, a zawt turin Pu Lalduhawma i lo sawm ang.

Pu LALDUHAWMA : Pu Speaker, P.W.D Minister zahawm tak chhan atan Vaivakawn atanga Zotlang pan na kawngpui leh Zohnuai peng leh Chhangurkawn inkar zim lutuk hi tih zauh tura ruahman a ni ve tawh em? tih ka zawt e.

S P E A K E R : A chhang turin P.W.D Minister Pu Lal Thanhawla, P.W.D changtu i lo sawm ang.

Pu LAL THANHAWLA, HON'BLE CHIEF MINISTER : Pu Speaker, Aizawl West bialtu zahawm tak zawhna chhanna chu tunah tak hi chuan ruahman a la ni rih lo tih ani a. Amaherawhchu, he kawng hi kawng pawimawh tak ani a. A hmangtu pawh an thahnem a. An kal na tur a zir in a in thui hleih

a. Tunah hian sum leh thil dang harsatna avangin la ngaihtuah loh mai a ni. Lo ngaihtuah thei dawn pawh ni ilang a chhak lampang ko khu a sang ang reng khawp mai a. Mimal ram a ni deuh vek tawh a. Retaining wall leh khatiang han tih nan te khan a senso thlak hle dawn a. Tin, a mimal te han negotiate ta ilang, lo phal ta pawh nise, hetiang tui tlak ni khua ah hian a hlauhawm a ngem tih kha ngaihtuah tel a ngai a. Amaherawhchu, kawng pawimawh tak a ni a. A bialtu MLA te leh khulai khawtlang hotuten an ngaih pawimawh chi a ni. Chumi hma pawh chuan a hlauhawm leh han in tlawh pawh harsa lutuk khu one way siam ta ila a zia awm a ngem aw tih te chu lo ngaihtuah atan a tha in ka hria.

S P E A K E R : Zawhbelhna Pu Lalduhawma.

Pu LALDUHAWMA : Pu Speaker, Vaivakawn atanga Zotlang panna kawng hi tawi te a ni a, a lun em em mai a. Chief Minister zahawm takin a sawi ang khan one way mai kha khawtlang hruaitu ten rem an tih chuan a that te pawh ka ring a. Hmanah khan ka ziak tawh a, lo ngaihtuah zui tur khan lehkha pawh tih a ni tawh a. Hei hi min bawhzui zel sak thei se tih kha ka sawi duh a. A pakhat a hi Zohnuai - Chhangurkawn tih hi University kawng a ni a. Chu ta tan chuan tunah hian nuaih sawmnga bawr vel pawisa a awm mek a. Improvement tih a ni a. Thawh tum ani mek a, tah hian. A dangah chuan kan harsa lova, a min theihna kawr a awm a. A min pui lai tak mai khu, khutah khuan tun thal lai pawh hian tui hna a awm reng mai ani. Khu ber mai khu min siam that sak sela, engtingge an ruahman ka hre lova. Khutia tui in a chim reng mai chuan a min leh dawn a, concrete leilawn tawite min siamsak sela a tui khu a luanna turin culvert min siam sak sela, tichuan a chunglam min ah khuan in retaining wall ang chi hi a chhawngin a theih chin chin tih chhoh nise la, a pawisa awm mek a hi hmundangah hmang lovin chumi leilawn siam nan chuan min hmansak thei phawt ang em? Khumi a tlang khu chuan kumtluanin a tlang ve thei dawn a, a dang kha chu a chhia a chhia khuanin a kal theih a ni, a pawimawh ber chu, a block tu ber khu anih avangin chumi zawng chuan hma min laksak thei angem tih kan zawt a ni.

S P E A K E R : Ngawi rawh aw i din lai mek khan Zohnuai atanga Chhangurkawn tih kha chu tunhna a Luangmual kawng pangngai a ni a, tuna i han sawi kha chu Ropaia-bawh kawng kha a ang ta tlat a, i zawhnaah hi chuan Chhangurkawn a ni ta si lai kha, anih chuan chuti chu Minister chhangtu khan Ropaia-bawh lamin nge i chhan taka Chhangurkawn a hi. I chhan danah kha chuan kha pawh kha a ang viau chuan ka hria a mahse a hminga hi Chhangurkawn nilovin Ropaia-bawh a ni deuh tlat a ni, han ko ang Minister a changtu.

Pu LAL THANHAWLA, HON'BLE CHIEF MINISTER : Engpawh nise, Pu Spreaker, MLA zahawm takin a, a ngaih pawimawh lai a hi ngaih pawimawh awm lai a ni reng a. Hemi communication network hi tam se, tha se

kawng thui takin Aizawl khawpui chep lutuk hi a zia awm thei ang a. Tin, duham vanga tawt kan ni a, tunhma kha chuan kan danah hian motor lei tur chuan garage a nei tur a ni kan ti thin a, chutiang pawh chu ti leh ta ila mithiam pui pui cheng vaibelchhe tel ruai a engtinng e kan tih ang tih ai hi chuanin. Motor nei zawng zawng khan mahni garage nei vek sela a nei lo kha chu an motor license vel kha permit kha cancel sak mai ila chuan kan thawl tawt chuan ka ring a, chungte pawh chu ngaihtuah a tul a. Engpawh nise helai taka hi one way a han siam phawt a kha hemi kawng a khu a tha dawna kan rintlan chuan tih mak mawhah ka ngai a. Tin, Ropaia-bawk, khulai network hrim hrima khu ka kalve zeuh zeuhva an chhe khawp hlawm maia chuvangin attention pek an tulna ka hria a. University te a awm a, eng eng emaw a awm a. Tin, khutah Lengpui Airport panna tur kawng PTC atanga lokal ang chi te ang te hi thawkchak thei deuh ila chuan kawng chep lutuk hi zia awm dawn a hmun dang dangah pawh chuvangin a pawimawh a ni. Tin, khami kha nia sawipawlh mah ilangin a hriat theih thova, Ropaia-bawk to Khami ahnuai kha, Pu Speaker, nangmah khan rawn point-out lo pheih la chu kei chuan ka lo hre mang dawn lo te pawh ani maithei a, i rawn point-out avangin keimah pawh ka ven phah hawk a. Kha kha nia, kawng a kala enggemaw portion laih avanga kal theih lohte awm dawn anih chuan, khalaiah khan in concentrate dan te pawh kan lo en anga, engpawh nise kan mithiamte nen kan lo sawiho anga, tha tur angin hma kan la dawn nia.

S P E A K E R : Pu K. Lalrinthanga kha, a phar sek mai a, a pawimawh viau ani ang, ko ang.

Pu K. LALRINTHANGA : Pu Speaker, Vaivakawn to Zotlang kawng khu a chhawrtute zingah kan tang ve a, kan buai zing hle a. Kan han inpel tur hi, kan in back chhawk a ni mai a, a zaulaia awm hmasa kan nih khan chuanin, tahkhan kan lo ding a, kan inpel mai thin a ni a. A pawimawh em avangin Parliamentary Secretary hnenah ka thlen a Chief Minister hnenah pawh ka thlen tawh a, an ngaipawimawha Parliamentary Secretary in Department Officer E.E-te, project estimate min siamsak tir a, chu chu nikum March laihawl vel khan Planning Department-ah submit a ni a. Chuan hei hi Department-in initiatives rawn la sela, a rawn thlen veleh kan lo tihfel sak ang che u, a ti a. Amaherawhchu, tun thlengin ala lut chho ta lova chutia kalzelah chuan Department hotuten kumthar work schedule-ah kan dahsak dawn che u nia te min han tihsak ve a, chu chu information ka pe ni ta ang se, Project Estimate awm sa reng atang khanin tih mai theih ni khan ka hria a. Chutihruah chuan khu lai ram neitute khu biak tawh chinah chuan anmahnin a hna an thawh theih dawn chuan hna kha (lah zau) min phalsak niin ka hria a, chutiang chu thil awm dan a nih rual chuan thil harsa lutuk lo niin ka hria a. Kuminah min han tihsak hram thei sela, kan ngen a ni.

S P E A K E R : Heti lai atanga, nia, Zotlang atanga han kal a, Chawnpui va kual a han chhuah ai chuan khuti lai khu a short-cut tha em em a ni.

Starred Question No. 173-naah kan kal ang a, a zawt turin Pu B. Lalthlengliana ilo sawm ang.

Pu B. LALTHLENGLIANA : Pu Speaker, Starred Question No. 173-na. Sports & Youth Services Department Minister zahawm tak chhan atan – “Catch them young” policy dung zuiin Mizoram Thalai zingah Sports Discipline hrang hrangah Talent Hunt neih ani em? tih ka zawt e.

S P E A K E R : A chhang turin Pu Zodintluanga, Sports & Youth Services Department changtu lo ko ang.

Pu ZODINTLUANGA, MINISTER : Pu Speaker, kan member zahawm tak Pu B. Lalthlengliana zawhna chhanna chu, “Aw, nei tawh e”, tih a ni e.

S P E A K E R : Zawhbelhna Pu B. Lalthlengliana.

Pu B. LALTHLENGLIANA : Pu Speaker, chung discipline hrang hranga thingtlang lam mi Talent Hunt-ah hian an tel em? Eng discipline a mi nge? tih leh chung catch young te chu khawi lai laiah nge training pek an nih? tih ka zawhbelh e.

S P E A K E R : A chhang turin Minister lo ko ang.

Pu ZODINTLUANGA, MINISTER : Pu Speaker, thingtlang lama kan lak thlak a chu athletic atangin ani a. Hmanni a kan sawi tawh ang khan, kan sports hmasawna tur atan hian chi hrang hrangin khawpui lama catch them young kan tih leh thingtlang lama naupangte talent hai chhuahna khan atangte khanin hmalak ani a. E. Tuipui bial, Khawbung bial thin atang khan naupang pakhat chu Aizawl-ah la thlain hetah school te kaltir in helaia kan catch them young athletic ah talent a neih that em avangin kan association in hetah a thlawnin school te an kal tir ani tih kha ka chhanna nisela.

Tin, Wrestling hi Ramhlun-ah leh SAI Complex Centre ah kuan neih ani a. Tin, Judo hi an ti tam deuh a Tuikual-ah leh Chaltlang, Ramhlun leh Zemabawk-ah an nei a. Tin, Archery hi hmun kan neih tlat loh avang hian interest tam tak a awm a, a thal-a tepawh kan Chief Minister zahawm takin

hmana a tihpui ang khan khawvelah pawh hmantlak thal tha kha kan nei tawh a. Amaherawhchu, a training-na hmun hi a harsa em a, Government High School kan tih Zarkawt hmunah sawn an practice ve thin a. Tin, fencing hi Sihphir-ah neih ani a khitah khian kan Coach te an awm a, anni phei chu Pu Speaker, National Games-ah an qualified tawh a ni.

Tin, Karate hi Venghlu-ah neih ani a, Taikwando hi Electric vengah ani a Wushu hi hmun thumah kan nei a, ITI leh Tuithiang leh Mission Vengthlangah. Weight lifting hi Bethlehem Vengthlangah kan nei a. Boxing hi Bethlehem vengah an nei bawh a, Muaythai hi Chaltlang-ah leh Zemabawh-ah an kalpui a, Basketball hi Chanmari leh Zarkawt Basketball Court-ah sawn naupangte an zirtir thin a.

Tin, Cricket hi Durtlang-ah neih ani bawh a, Hockey hi Kawnpui-ah tunah khuan kan tan ve leh mek a. Table Tennis hi Armed Veng leh Tuikhuahlangah leh Ramhlun Sports Complex-ah kan nei thin a. Amaherawhchu, Ramhlun Sports Complex-ah sawn discipline hrang hrang camping te leh State pawn lama chhuak tur te kan in dah thin avangin hmun an chang ta rih lova tunah chuan. Armed Veng leh Tuikhuahlangah kan nei thin a ni. Tin, Chess hi hmun khatah chauh kan nei a, Bethlehem Vengah a ni a. Tennis hi Tennis Court leh Ramhlun Sport Complex-ah an nei bawh a. Badminton hi Kulikawn Indoor, Government High School-ah leh Bawngkawh kan nei thin a. Amaherawhchu, vawiin ah chuan Coach te kan in daih loh em avangin Bawngkawh ami hi chu kan kalpui rih lo a ni.

Tin, 'Catch them young' hi Pu Speaker, nu leh pa ten min hlutpui em em a. Naupang duh ang zat hi kan la zirtir thei lova. Nu leh pa atangin discipline hrang hrangah ngenna a nasa in Association bakah keima hnenah te pawh an rawn ngenpui thin a. Amaherawhchu, kan hmun leh Coach te an la indaih rih loh avangin tuna kan tih bak hi chu kan kalpui thei rih lo a ni.

S P E A K E R : Starred Question No. 174-na ah kan kal anga, a zawt turin Pu K. Liantlinga ilo sawm ang.

Pu K. LIANTLINGA : Pu Speaker, ka lawm e. Soil & Water Conservation Department Minister zahawm tak zawhna Starred Question No. 174-na chu hei hi a ni e. Soil & Water Conservation Department hnuai Ranger te hi Gazetted status-ah hlan kai ve tumna a awm em?

S P E A K E R : A chhang turin Pu H. Liansailova, Minister for Soil & Water Conservation ilo ko ang.

Pu H. LIANSILOVA, MINISTER : Pu Speaker, member zahawm tak, Pu K. Liantlinga zawhna (Soil & Water Ranger ho te gazetted - dah chungchang) chhanna chu- Hemi chungchangah hian kum 2009-ah khan Department in rawtna an rawn siam a. Cabinet sitting, ni 31.3.2009 ah ngun taka ngaihtuah anih hnu in 6th Pay Commission Fitment Committee Report Recommendation lo chhuah huna la thlir that leh atan dah a ni e.

S P E A K E R : Zawhbelhna Pu P.P Thawla.

Pu P.P THAWLA : Pu Speaker, Saiha range kha tunah chuan division atana tih ani tawh a. Division office tur pawh sak zawh tawh niin. D.O quarter te pawh. Hei hi a hmalama function tumna a awm em? tih ka'n zawhbelh e.

S P E A K E R : Aw, Pu K. Liantlinga, zawhbelhna.

Pu LIANTLINGA : Pu Speaker, ka lawm e. Nia, hei Ranger te hi forest ah te an awm a. Forest ranger te gazetted status a dah si a, Soil Conservation Department hnuuia mite hi dah loh hi, training na leh thil dang inang vek an ni si a.

Tin, Soil Department hi ngaihthah a nih vang deuh nge ni? Tih kha kan zawt duh a. Tin, level puite tluk phak loh hi a hrehawm em em mai a, helaiyah hian ngaihtuah ngun ila. Cabinet meeting hmasa berah, put luh leh theih ngei a ni ang em? tih kha ka zawhna a ni e.

S P E A K E R : A chhang turin Pu H. Liansailova, Minister ilo sawm ang.

Pu H. LIANSILOVA, MINISTER : Pu Speaker, member zahawm tak Pu P.P Thawla zawhna kha – Saiha ah hianin Soil Conservation Division office sak zawh a ni a. Tin, staff quarter te pawh sak tura ruahman a ni a. Nimin piah lamah te khan a pawisa dinhmun te pawh kan in hrilhfiah tawh a. Tin, hetiang anih hi chuan ami awm tura te chu ruahmanna la awm tur a ni a. Kan sum dinhmun te en in hei hi chu ngaihtuah tur a ni e.

Tin, gazetted status a ranger, R.O soil conservation a mi te dah chungchang hi nichina kan sawi tawh ang khanin sorkarin a thlir tawh a. Tin, gazetted status a sorkar hnathawk dah tur chungchangah hian, sorkarin hei hi chu an hlawh a sang emaw, training chutiang chu a nia, tia dah emaw a ni hranpa lova. Criteria, ka hriat soal loh chuan, sawm chuang dawn lai a awm a, chumi atanga thlir a, en tur chu a ni a. Chutiang chuan, anni Soil & Water Conservation-a Ranger te pawh hi chutiang criteria en leh Fitment Committee Report te a taka hman a nih

hunah cabinet hianin la ngaihtuah turin a dah a. Chutianga la ngaihtuah tur chu a ni ang chu.

S P E A K E R : Starred Question No. 175-na zawt turin Pu Lalduhawma i lo sawm ang.

Pu LALDUHAWMA : Pu Speaker, P.W.D Minister zahawm tak chhan atan zawhna –

- (a) Multi Modal Transport Project hnuaiia Lawngtlai atanga Myanmar ramri thleng kawng laih tur atan hian sum engzatnge dah a nih?
- (b) Eng chen nge hna thawh a nih tawh?
- (c) Engtikah nge zawh a nih ang? tih a ni e.

S P E A K E R : A chhang turin Pu Lal Thanhawla, Hon'ble Chief Minister, Minister for Public Works Department i lo sawm ang.

Pu LAL THANHAWLA, HON'BLE CHIEF MINISTER : Pu Speaker, member zahawm tak zawhna chhanna chu – Multi Modal Transport Project hnuaiia Lawngtlai atanga Myanmar ramri thleng kawng laih tur atan hian sum engzatnge dah a nih tih a ni a. Hei hi zau deuh hlek in, member-te hriat atan tha thovin ka ring a. SARDP North-East Phase-II in an then a, Phase A leh B - in. Special Accelerated Road Development Programme of North-East a ni a. Hei hian North-East pumpui a huam a. Heta tan hian a pumpuiin cheng vaibelchhe 1200 an dah a ni. Tin, tuna member zahawm takina a'n zawh bik Multi Modal Transport hnuaiiah hian tunah hian cheng vaibelchhe 680 Central-in min sanction tawh a. Tin, a hnathawh hun tur hi tunah hian hna hi tan a la ni lova. Amaherawhchu, hmanna ka sawi tawh ang khan a tul tul chu Department-in a thawk zo tawh a. Tunah hian tender te leh thildang ti turin an in puahchah mek a. Tin, engtikah nge zawh anih ang tih chhanna chu ruahmanna ang chuan kumli a zawh tura tih a ni.

S P E A K E R : Zawhbelhna Pu Lalduhawma. Chumi hnuah Pu C. Ramhluna.

Pu LALDUHAWMA : Pu Speaker, member zahawm tak Pu Ramhluna bial a ni a, hei hi Look East Policy te nen a in kungkaih chho a ni. Vawiina kan resolution tur te nen pawh in laichin a ni chho vek a, Chhimlam thil a ni a. Term hmasa khan PAC hian kan va en tawh a, a hmunah, Hruitezawl te pawh kan va thlenga kan lawng chawlhna neihchhun tur te pawh kan va en a, beisei aiin hna hi thawh tan a ni har ta deuh a. Kan ram in a kan kawt chhuahpui tur chhimlama kan neih tur, kan economic kawng tangkai tak tur anih vang hian special deuh taka hmanhmawh tak maia he hna hi kan thawh a. Kum li aia

hmaa hmanhmawh deuh a han tih chhonzawm nise, contract-te pawh kan split thei maithei a. Kan State-in a khawih tur kha a ni a, chutianga tih dan chu a awm lawm ni, he kawng hi a pawimawh em mai a, tih kha kan zawt nawn duh a. Tin, nimin lamah khan, engnge ni, khawi emaw lai kawng Project nen khan siam rem a, sum leh paite pawh kha adjust kual a nih tur thu kha a ri bawk a, chuti anih rual chuan an delay leh zel thei ang em khang te khan? Chiang zawk deuhin min han hrilh thei em?.

Pu C. RAMHLUNA : Pu Speaker, Aizawl West-I bialtu in min lo zawhsak in ka hria a, lawmawm khawp in ka hria. Kei pawh hei hi ka rilruah a awm ve reng a, kan zawhbelh duh chu hemi kawnglah nan hian, Pu Speaker, engzatnge compensation hi pek tur a an tih? Hna han pek tur hi a awm ve ziah si a, chuvang chuan fimkhur deuh hlek a tih atan a tha in ka hria, hei hi a tlem thei ang bera pek dan te a awm thei lawm ni tih te ka'n zawt duh a. Tin, an lo pe tawh reng em tih te kan hre duh a. Tin, chumi assessment chu a awm a nih chuan a list te hi member te hi min pe thei ang em? lo en ve atan tih te ka'n zawt ve duh bawk a.

Tin, chubakah chuan thlanmual a kal tlang dawn a, tih chhiat tur a ni a engemaw zat a ni a thlan kha. Khami kha sawlai mipuite sawnin lo inbuatsaih lawk duhna thinlung an nei a. Thenkhat phei chu an ruang te kha lo in lak chhuah a, remchang hmun danga lo in pun khawm kha an duh a. Khatiang zawng khan mipuite tan khan engtingge helai hi ruahmanna an lo siamsak tih kha ka'n zawt duh a ni e.

S P E A K E R : A chhang turin changtu Minister i lo sawm ang.

Pu LAL THANHAWLA, HON'BLE CHIEF MINISTER : Pu Speaker, helai Project hi pawimawh kan ti a. Tin, tuna Look East Policy te nen phei chuan a inhmeh riau bik a. North East Region a State zawng zawng hian an rawn ngaihven a. DoNER Ministry pawh khan an ngeihven khawp a. 1997 August thla khan Myanmar nena border trade vela in biak inbiak anih lai khan Indian delegation ah kan senior officer te pahnih kan thun tir ve a. Rangoon a Indian delegation te leh Burmese delegation te remtihna a lo chhuak a ni a. Tichuan, 'joint survey to be conducted by Engineers of Burma and India' tih a ni a. Kha tih hun lai khan joint survey an tan hman a ni. Amaherawhchu, kan awm loh hnu khan an tawp ta ni turah ka ngai a. Tin, a ri ring ta lem lova. Amaherawhchu, keini kan hotute hian an chawlhsan lova. Kum 2006-2007 vel atang phei kha chuan, 2006 niin ka hria a, Prime Minister te leh khatihlaia DoNER Minister Mani Shankar Ayer te leh Commerce Minister Jairam Ramesh te kan convince hnu kha chuan an phur ta hle a. Anni kha chuan min take up sak ta a ni, chak zawkin. Tichuan, tun hun hi kan thleng chho ta a ni. Chutiang chuan engemaw chen kha delay anih avangin, tuna la awm leih leih chauh hi kan ni a. Tin, a hmanhmawh thlak avangin, Pu Speaker, tiang khan kan theih ang angin kan han luh hnu pawhin kan han nawr chho zel a. Hmanhmawh hle mah

ilangin, sum a awm loh avangin, sum neitu ten min pek loh chuan kalpui vak ngaihna a awm lova. Tunah hian cheng veibelchhe 680 sanction ani tih kan hriat hnuah hian, kan engineer ten hma chak takin an la chho mai chauh zawk a ni. Tunah hian an tender mek tawh a, nimina duh hmanhmawhna avanga kawmzawlte saw kan han tih tir ang a, sawlaih kan sawn mai dawn em ni? Tih te kha chu duhthusam a ni a, lo tih tir pawh ni ila a delay dawn lova, a ti chak zawk dawn a ni, a chhan chu heng tender te hi an chhan zawh chuan Kawmzawla kan lo thawh tir te khan heng tender khan kan han rul chho ang a, siam rem dan a awm ang tih ngaihtuahna mai zawk a ni a, a tih chakna tur zawk atan a ni a. Mahse, sorkar kalphung dik takah chuan a tih chi lem loh maithei a, chutiang chu a ni. Tin, he kawng hi 100 Km deuh thaw a ni a, 99.8 Km a ni, mahse remchangah 100 Km ani kan ti mai thin a, chutianga sei chu a ni a, tender mek a ni a.

Tin, compensation hi Pu Speaker, a zat chiah a hriat loh na in assessment leh a tul ang chu tunah hian an chhawp tawh a. Nakinah a beneficiaries te list a lo chhuak anih chuan tu a te pawh hmuh theih tur a ni ang a, confidential chi ani lo hrim hrim a, chutiang chu a ni. Mahse, compensation hi kan buaipui khawp a, chuvangin Builum result lo chhuak tawh atang hian dan angin sorkarin action an la tan ang a, Vairengte-ah a la leh ang a, tichuan dik lova compensation claim tena kan project a delay a delay hi tih reh dan ngaihtuah kan sorkar hian a tum a, corruption avangin sen neuh neuh tur kan seng a, project tha tak tak assets ni tur kan delay hi a that loh avangin. Chutiang chuan action lak kan tum a ni. Engpawh nise langin kan hmanhmawh a tender mek a ni a, a thui zawng hi 99.8 Km a ni a. Tin, compensation component hi alo awm leh thin avangin chu mi atan chuan assessment tih mek a ni. Pu Speaker.

S P E A K E R : Saw mi Autonomous-ho saw Revenue Department nei hnan an ni a. Hman 1980 leh tih daih tawh ah khan an Revenue Officer ka zawt a. Chutihlai chuan pawl ram a la ni a. 'Pawl ram zawng zawng hi chu kan patta fai vek tawh', a ti a. Chu te mai chu kan sawi duh a ni.

Tunah Starred Question No. 176-na zawt turin Pu Lalthansanga lo sawm ila.

P u L A L T H A N S A N G A : Pu Speaker, ka lawm e. Vigilance Department changtu Minister zahawm tak min chhan atan. Ka Starred Question No. 176-na kum 2005-2010 chhung hian corruption vanga hrem engzatnge awm? tih ka zawt e.

S P E A K E R : Chhang turin Pu Lal Thanhawla, Hon'ble Chief Minister, Minister for Vigilance Department i lo ko ang.

Pu LAL THANHAWLA, HON'BLE CHIEF MINISTER : Pu Speaker, member zawhna kha kum 2005-2010 chhung hian engzatnge awm? tih a ni a. Kum 2005-2010 chhunga ACB Case siana Corruption vanga hrem chu pahnih an ni a.

Tin, Sawi tawh angin sorkar procedure hi a rei thei ang reng khawp mai a, chuvangin a kal chak hlei thei lova. Chungte avang chuan tunah hian engemaw zat case nei te Departmental Proceeding drawn a mite hi chu kan luh hnu hian a awm a. A hma a mite pawh hi a tul angin kan chhawm chho zel a ni.

S P E A K E R : Zawhbelhna Pu Lalthansanga. Ruah a sur nasa deuha tawng rin deuh tlan tum ila a tha awm e.

Pu LALTHANSANGA : Pu Speaker, ka lawm e. Pahnih a ni a, case pending hi engzah nge awm? tih a kha kan zawt duh a. Tin, ACB-a engemaw pawl tehkhin nan, example-ah – Prism ten FIR an thehluh te hi sub-judice a ni nge, Court a thlen hnuah chauh hian sub-judice hetilalah hianin hman ni ah kan sawi a. Hei hi Prism ten FIR thehluh anih avangin, sub-judice anga ngaih a nih avangin sawi loh nisela, ti ang deuh khan a kal a. Kha kha ACB-in a, a tih mek lai bawh hi sub-judice ah kan pawm nge, kan sawi thei tho tih a kha, kan zawt duh bawh a ni.

S P E A K E R : A chhang turin Minister i lo sawm ang.

Pu LAL THANHAWLA, HON'BLE CHIEF MINISTER : Pu Speaker, Dan hre mi ka ni lova. Amaherawhchu, investigation tih naah hi chuan sub-judice lo in ka hria a. Court a luh hnu in a sub-judice chauh niin ka hria a. FIR hi tute pawhin an thehluh thei a. Police-ah te, ACB-ah te, khami kha chu an chhui tur a ni a. Competent Authority ten, vawiinah hi chuan ACB kan hmang rim deuh ber a. Kan consent tawh avangin ACB in a chhui a, report a pek ah hian, engtia kalpui tur nge tih sorkarin a lo en a. Case file a ngaih chuan case an file a. Case kha Court-a a awm hnu hian a sub-judice chauh a nih ka ring. Hei, Lawyer te an awm a, ka sawi dik loh chuan min rawn correct selang.

S P E A K E R : Awle, Starred Question No. 177-na ah kan kal ang a. A zawt turin Pu B. Lalthlengliana i lo sawm ang.

Pu B. LALTHLENGLIANA : Pu Speaker, ka zawhna, Starred Question No. 177-na hi MLA ten Fund kan han hman chhoh dawn khan guideline hlui kha siam that a ni a, a hlui anga D.C ten, V/C ten min la kalpui avangin harsatna kan la tawh a. He zawhna ka siam lai hian guideline thar kan siam kha

a la chhuak lova. Chuvanga he zawhna hi zawt ka ni a, tunah chuan GPC committee-in a siam kha tihchhuah a nih tawh avangin ka skip mai ang e.

S P E A K E R : A chhang turin, aw, a zawt lo maw? Aw, tunah a lawmawm e. Kha, hun kan hman tawi phah dawn a. Starred Question No. 178-na zawt turin Pu K. Liantlinga i lo sawm ang.

Pu K. LIANTLINGA : Pu Speaker, ka lawm e. Sports & Youth Services Department Minister zahawm tak, ka zawhna Starred Question No. 178-na chu hei hi a ni-

- (a) Mizoram Sports Policy hi duan peih tawh a ni em?
- (b) Mizoram Sports Policy Drafting Committee member te hi min hrihl thei em? tih a ni e.

S P E A K E R : Tunah chhang turin Pu Zodintluanga, Minister for Sports & Youth Services i lo ko ang.

Pu ZODINTLUANGA, MINISTER : Pu Speaker, Aizawl South-I bialtu zahawm tak zawhna chhanna-

- (a) Mizoram Sports Policy Drafting chu peih tawh a ni a. Mahse, la final loh a ni.

- (b) Mizoram Sports Policy Drafting Committee member te chu-

1. Pu Lalthuamluaia Sailo, Joint Secretary - Chairman.
Sports & Youth Services.
2. Pu Zoliana Royte, Director - Member.
Sports & Youth Services.
3. Pu P. Vanluia, Joint Director - Member.
Sports & Youth Services.
4. Pu J. Vansangzuala, Deputy Director - Member, Secretary.
Sports & Youth Services.
5. Pu Lianzuala, Secretary - Member.
Mizoram State Sports Council.
6. Pu C. Laltlanthanga, S.P.O - Member.
Mizoram State Sports Council.
7. Pu C. Rothianga, A.O - Member.
Mizoram State Sports Council.
8. Pu Hmingdailova Kiangte, President - Member.
Mizoram Hockey Association.
9. Pu K. Biakthianghlima, President - Member.
Fencing Association.
10. Pu F. Zokima P.E.O - Member.

11. Pu F. Lawmkima, Assistant Director - Member. M Z U te
an ni e.

S P E A K E R : Zawhbelhna, Pu K. Liantlinga.

Pu K. LIANTLINGA : Pu Speaker, ka lawm e. Sports Policy hi sawi a hlawh a, tunhma atangin Sports mite zingah chuan kan hotu hmasa, hruaitu hmasa Director phei kha chuanin a tum lo tawp ringawt mai a ni. “Sports Policy hi kan neih a ngai lo”, a ti tawp mai kha a ni a, kha kha tunah erawh chuan Director te lo inthlak in Ministry te pawh a lo in thlak chhova. Drafting Committee te an din chho chu a ni a. Amaherawhchu, hei kum khat lai mai chhung chu kan in zawt ani deuh tawh mai a. Session hmasa, nikum March te pawh khanin kan inzawt tawh a. ‘Draft mek a ni’ tih a ni a. Tunah Final a la ni lo em ni tih leh final tur hian thla hnih thla thum chhung emaw? engemaw chhung chuanin a tih theih lawm ni? kan MLA zahawm tak te pawh Drafting Committee-ah an tel a nih si chuanin heng hi a rangthei ang bera an tih theih nan hun tiam chhung tal hi kan Sports Minister hian min pe thei lawm ni tih kha ka zawhna a ni e.

S P E A K E R : A chhang turin Pu Zodintluanga, Minister i sawm ang.

Pu ZODINTLUANGA, MINISTER : Pu Speaker, nikum March thla a zawhna ah khan ‘kan buaipui mek a ni’ tih a ni a. July 2009 khan Drafting Committee hian sorkarah a theh lut tawh a. Hetah hian Recognized Association te Directorate lam leh Sport Council lam te Secretariat lam atang hian an tel that em avang hian Sports lama kan duh dan hi chu a kim thawkhat kan ring a. Amaherawhchu, hetiang policy te hi sorkarah thehlut mahsela uluk deuha en a ngai a. An duh dan an rawn duang a ni mai a. A chhan chu tuna sorkar mai nilo sorkar zel turte tana thil tha kan duh lutuk luat ah hian sorkarin a tih theih loh te sorkar tana nakina luhaina tur chi te a awm ve thei a ni. Chuvang chuan kan sorkarina a tih theih chin ang tur te kan thalaite tana hmasawnnna tur ang chi anih rual khan a tih theih tur ang chi kha uluk deuh a en a ngai a. A nih loh chuan kan kalsual palh anga a policy te kan duang mai ang a kal leh theih loh ang chi te sorkar tana harsatna tur chi te kha awm thei a nih avangin kan uluk a. A draft te kha chu nikum July-ah khan thehluk tawh a ni a. Amaherawhchu, Pu Speaker, uluk deuh a en a ngai kan tih vangin vawiin thlengin kan la ti chhuak lo a ni e.

S P E A K E R : Awle, Starred Question No. 179-na ah kan kal anga a zawt turin Pu Lalduhawma i lo sawm ang.

Pu LALDUHAWMA : Pu Speaker, P.W.D changtu Minister zahawm tak chhan atan- P.W.D quarters, Zonuam (Berampu mual) luahtute hi thla khat chhunga chhuak tura thu pek an ni em?

S P E A K E R : A chhang turin Hon'ble Chief Minister, Pu Lal Thanhawla, P.W.D changtu i lo sawm ang.

Pu LAL THANHAWLA, HON'BLE CHIEF MINISTER : Pu Speaker, zawhna kha P.W.D mual Zonuam Berampu Mual thlakhat chhunga chhuak tura thupek an ni em? tih a ni a. A zawttu thahnem ngaihna avangin tunah thlakhat hun dang pek belh leh a ni a, thlakhat a ral hnuah thlakhat dang hun pek belh leh an ni a. Amaherawhchu, khua te hi a bumro viau a, zoram pumpuiah chhiat kan tawk nasa hle a, hengte avanga harsatna neih chuan ngaihhnathiamna a la awm zel ang.

S P E A K E R : Zawhbelhna, Pu Lalduhawma.

Pu LALDUHAWMA : Pu Speaker, hei hi kan sawi tawh a, kan sawi hun a lo thehluk kha a ni a. Helaiah hun pek belh tur thu kha min hrilh tawh a. An ran te nen insawn tur an nih bakah khan an harsatna ber chu an fate school lut laklawh tawh, an va pemna turah khan seat an chang lo thei a, fee tur an nei tawh lova, mi harsa te te an ni a. Chuvang chuan hun pawhsei anih khan a lawmawm kan ti a. A police lampang kha an harsa ve tho a, bial interest a ni a, ngaihtuah thiam chu a har viau a. Amaherawhchu, humanitarian ground deuh anih avang hian kha aia sei deuh te kha ngaihhnathiamna hi awm thei selang chuan, an fate school kal ber hi a buaithlak a ni, kha kha chu lo khap mai se a tha tur a ni a. Chutiang chuan a tul angin ngaihhnathiamna a awm zui zel thei ang em? tuna an sawi ang deuh khan.

S P E A K E R : Zawhna hi Chief Minister in chhang teh se.

Pu LAL THANHAWLA, HON'BLE CHIEF MINISTER : Pu Speaker, ni e, sualna hi a pung zel a. Chanchinbua rawn lang tham lo leh rawn lang lem lo sualna hi a tam em em mai a ni, tunlaiah hian, chuvangin kan police te pawh hi an Vigilance ta khawp mai a. Tin, tunhma ai chuan an improve hle a. Home Minister-in a enkawl tha bawk a, a fakawm hle a ni. Mahse, chuti chungin inpharh zau deuh a tha a, sum te nei ngat pheii ila chuan Mobile Patrolling Van kan hman ut tawh ang chi te kha veng tin deuhthaw a bun tur nei ilang chuan sualna hi a tlem deuh awm mange aw!.

Tin, tawng mawilo ni suh selangin, kan bike chuangtu te accident zawnga an vak an vak te hi an accident nep deuh ang a, tih te ngaihtuahna a awm a ni.

Pu Speaker, police lam atang pawhin kan hman hmawh khawp a, Law & Order maintenance atan leh khatianga thil thalo danna atan khan, Home Minister hian khulam pang bik a pawh khu ngaihsak a tum a, Vaivakawnah khuan hmanni lawk khan mimal in cheng nuaiza chuangin an lei a, thar tawk tak. A awmna te hi tha sela, an efficiency te pawh hi a increase ang tih kan ring a. Khulai pawh khu P.W.D tan chuan uihawm tak ani chungin, khalampang pawimawhna zawk avang khan a Department in thahnem ngaihna avangin khatianga khan an kian ani. Amaherawhchu, alo luah tute MLA zahawm takin a sawi angin, ka tawng an huat thu suh ah, miharsa ve te te an nih avangin pawng innek chhuah chi ani lo tih Department hotute pawhin an hre ve tho ang ka ring.

S P E A K E R : Kha bak kha zawngin chhan a harsa rih a ni. Tunah hian zawhna Starred Question No. 180-na ah kan kal anga. A zawt turin Pu B. Lalthlengliana i lo sawm ang.

Pu B. LALTHLENGLIANA : Pu Speaker, Vigilance Minister zahawm tak chhan atan Starred Question No. 180-na Vigilance Commission hi engtikah nge din a nih ang? tih kha zawt e.

S P E A K E R : A chhang turin a changtu Minister Pu Lal Thanhawla, i lo sawm ang.

Pu LAL THANHAWLA, HON'BLE CHIEF MINISTER : Pu Speaker, Vigilance Commission hi din tum chu a ni a, kan manifesto ah pawh kan ziak ngei a. Chumi avang chuan 2009-2010 ah pawh khan Token Provision nuaisawm dah a ni. Tin, 2010-2011 ah pawh nuaiza dah leh a ni a. Chutianga chuan tumna chu a awm a, kan lo in commit chu hemi tumna hi enganga tih sak tur nge ni ang tih erawh chu kan hotuten an ngaihtuah mek chho zel a ni.

S P E A K E R : Starred Question No. 181-na ah kan kal ang a. A zawt turin Pu B. Lalthlengliana i lo ko ang.

Pu B. LALTHLENGLIANA : Pu Speaker, hei pawh hi hmanni khan min hrilh chiang tawh a. Hun i la khawtlai lo mai ang. Ka zawt lo mai ang.

S P E A K E R : A lawmawm e, a hnung zel ami kha a kian zel tihna a ni a, a lawmawm a ni. Starred Question No. 182-na ah kan kal ang a, a zawt turin Pu Lalduhawma i lo ko ang.

Pu LALDUHAWMA : Pu Speaker, vawiin chu record kan break dawnin ka hria a, kan hun neih hi kan Question hian a daih dawn lo zawk a ni, vawiin chu. Muang changin ka'n zawt ang e. Industries Minister zahawm tak chhan atan-

- (a) Bamboo Development Agency hian eng Company te nen nge Joint Venture a neih a, eng project atan te nge?
- (b) Industrial Growth Centre, Luangmual hi engtia enkawl zui zel nge a nih?
- (c) Bamboo Plantation hi kalpui zel a la ni em? mau rah hmang lova chin pun dan engnge? tih te a ni e.

S P E A K E R : A chhang turin Pu S. Hiato, Minister for Industries Department i lo ko ang.

Pu S. HIATO, MINISTER : Pu Speaker, ka lawm e. Member zahawm tak Pu Lalduhawma zawhna No.182-na chhanna chu hei hi a ni-

- (a) Bamboo Development Agency in manufacturing and Export of Bamboo Product Pvt. Ltd., Kolkata nen Joint venture a nei a, Bamboo Mat Board, Particle Board leh Fluted Board siamna atan ZONUN MAT PLY (P) Ltd, Aizawl nen MoU signed a ni.
- (b) The Mizoram Industrial Area (Management, Regulation & Control) Act, 2008 Chapter II para 4 leh The Mizoram Industrial Area (Management, Regulation & Control) Rules, 2008 section 5 sub-section (1) in a sawi angin Mizoram sorkarin Industrial Area-a a puan te chu enkawl tir a ni a. Industrial Growth Centre, Luangmual pawh hi Industrial Area anih angin Management Committee enkawl na hnuai a awm a, Management Committee thu chhuak te lo kengkawh turin The Mizoram Industrial Area Management Regulation & Control Act 2008, Chapter-III Section-IV leh The Mizoram Industrial Area (Management, Regulation & Control) Rules 2008, section-III Sub-section-II thu angin appropriate authority atan Director of Industries ruat ani a, tunah hian hnathawh zawh ala nilova, Mizoram sorkarin Chief Secretary kaihhraina hnuai a din Empower Committee kaihhraina hnuai a Industry Department-in a thawk mek ani. Hun reilote ah thil siam hmanga eizawngtu te hnenah man chawi a an luah hawh turin pek chhuah ala ni ang.
- (c) Bamboo plantation hi kalpui zel ala ni em? Mau rah hmang lova chin pun dan engnge tih chu – Non Forest Area kalpui zel ani e. Mau rah hmang lova chin pun dan chu (1) Mau chang chawrtir, (2) Mau zar phun, (3) Mau zung phun, (4) Mau chang phun a ni e.

Pu LALDUHAWMA : Pu Speaker, a ngaihnam khawp mai Venus ho tana pawisa sorkar hmasa lama pek kha hmuh kir leh beiseina te sorkarin a nei em tih ka han zawt duh phawt a.

Tin, tunah khuan eng ber nge an produce tawh? Engangnge an siam chhuah? Marketing neih te a awm ve tawh em? Mau lam nilovin thing lam an ti mah mah tih te kan lo hria a, a dik em chungte chu? A hlawkna kan tel ve dawn hnai tawh em? Thawhchhuah an nei tawh em? tih ka zawt bawk a.

Tin, Industries Growth Centre, Luangmual hi a thing rei tawh lutuk a. A kalkawng pawh khu quarry a lung la ho in a an siam avanga tlang tawk tawk a ni a. Department ang hian kutthlakna a awmlo rei lutuk tawh a ni.

Tunhnaiah hian building te sak belh a hmalak tumna a awm tan niin kan lo hria a, a lawmawm khawp mai a. Amaherawhchu, eng a awm lova, tui a awm bawk lova, khatiang ang necessity a awm loh kha chuan a buaithlak hle dawn a. Hei hi sorkar hian special economic zone (SEZ) te pawh hi rilru ah a nei tan ve tawhin ka hria a. Chung atan te chuan kan hmun remchang neih chhunah an ngai mai thei em? Hmun remchang dang a vang tawh si a. Chutiang a nih chuan tunhma aia nasa zawka khulai centre khu rawn ngaihven chhoh zel an tum thei em tih hi ka zawt duh bawk a.

Tin, Zonun Mat Ply joint venture neihpui kha crore hnih sorkarin a pe a, joint venture agreement awm si lovin tih hi a dik em? chuti anih chuan chengkhat tal, a capital emaw interest emaw sorkarin a share chan ve tur chengkhat tal an pe ve tawh em? nge, hei hi an fanghmano ei hlen mai dawn em? Engatinge chutiang ang a heng hnenah hian agreement mumal awm lo a pek a lo nih tih te ka zawh belh a ni.

Pu K. LIANTLINGA : Pu Speaker, zawhbelhna. Venus Bamboo chungchang thu ah khan enquiry commission te din niin kan hria a. A member te pawh kan in hriattir tawh a Starred Question zawhna ah khan. Mizoramah hian Inquiry commission khan abik in Industry bikah khan, a chhia emaw, a tha emaw decision siam a, a dik / dik lo ti a siam tur khan hemi Commission of Enquiry Act hi sorkar hian a adopt tawh reng reng em? khami adopt loh anih kha chuan, Enquiry Commission report kha a zuzi in, a ral mai mai dawn a. churang chuan Mizoram sorkar hianin kan adopt tawh em? tih kha ka'n zawhbelhna a ni e.

S P E A K E R : Chhang turin Pu S. Hiato, Minister i lo ko ang.

Pu S. HIATO, MINISTER : Pu Speaker, Venus Bamboo hi a lar khawp mai a, sorkar hmasa a an thawh anih avangin a chipchiar chuan kan chhang thei lo maithei a. Mahse, Venus Bamboo hi an tum tak hi chu a tha viau a.

Kan ram bamboo zawng zawng siam chhuahna leh Furniture-a siam te, tin, plywood ply-a a chhuah te, ceiling tur te khatiang siam chhuahna tura ruahman kha a ni.

A khawl hi a tir atangin K.K. Shah khanin khawl hlui Kolkata-a a hmanthat theih tawh loh a rawn chhawm chho a. A rawn chhawm chhoh kha hmantlak a ni lova. Mahse, pawisa Buffacos atangin an lo pe a. A leiba bawkwulh nan, Kolkata bawkwulh nan.

Chutiang chuan kan kal chho a, khawl kha a hman theih si loh avangin khawl dang an han chah leh a, Taiwan atangin. A khawl phei chu tuna an dah chu a that hmel ang reng viau hlawm a. Engemaw zat chu siam tum pawhin an in puahchah ve a ni.

Amaherawhchu, Bamboo a siamna tur ai mahin thing product atan a khawl khu a ni zawkwulh mah mah a. Chuvangin Venus Bamboo an tih ah khan a Bamboo lo thing siamna turin a ni zawkwulh mah.

Kan hriat theuh angin a kal hlei thei lova. Electric pawh nuai sawmpahnih lai a man pek loh in an ba a, tunah disconnect an ni tawh a. Tah chuan tih thar leh tum in sorkar thar hian hma a la a. A hmunah an tlawh a, hotute pawhin Chief Secretary te, Commissioner te pawhin, kei pawh ka zuk kal a. Taiwan atanga rawn zin hote pawh kha kan zuk tlawh tir a, tih nun leh hi kan tum a, kan bei a, a Board of Director ber kha koh chhuah hlei theih loh a a awm tak avang leh a awmna pawh hriat hlei theih loh khan a awm a. A chang phei chuan warrant arrest kan issue mai dawn a mi tih khawpin umzui a ni a. Vanneithlak takin Inquiry Commission kan han din takah hian engemaw ti ti in a awmna an locate a, an ko chho thei hram a. Engemaw vel kha a sawi a, mahse, a sawi ang hian Inquiry Commission report ala lut lo na a. Sorkar hmasa an thil tih loh vanga hlawhtling lo niin a sawi ni in ka hria a ni. Chuvang chuan hei hi heti nuai hi anih avangin product tak tak pakhatmah a nei lova. A siam phei chu an siam nual a, furniture tur te pawh a siam dan tur te, frame an siam te, kawngkhar an siam te hmuh tur a awm a. Mahse, hralh chhuah tlak pakhat mah an la siam lo ani. Tunah chuan amah khuan a awm ve ringawt mai a ni. Tichuan Board of Director thar tunah hian an din tha leh a, chungho nen chuan management committee te neiin, revise leh an tum a. Tha taka tih chhoh pawh kan tum mek ani tih hi kan hriat chin a ni a. Khumi kan tih hlawhtlin chuan engemaw chen ah chuan hmasawna Industry-ah pawh kan neih ve ngei chu kan ring a. Chumi atan chuan electric pawh zawm leh turin pawisa kan in nawr a, electric department lam pawh ngenna siam leh in connection min pe leh tur te pawhin kan bei a. A pawisa kha pek hmasak phawt loh chuan min la tih sak thei lova, chu chu kan in nawr mek ani tih member zahawm tak khan min hriatpui ka duh ani.

Tin, Zonun Mat Ply hi khatiang chi bawkwulh kha a nia, vaibelchhe hnih pek an ni a. Agreement chu sign pui ani. Agreement sign naah khan loan nge ni, rulh leh tur nge grant-in-aid nge engzatnge apung tih kha pakhatmah ziah ani lova, a in ziah loh avang chuan tunah hian kan in dawr a, keini chuan engpawh nise

Zonun Mat Ply hi chu a hlawhtling thawkhat tawh a. A hmunah pawh kan zuk kal a, Tsunami thli tuartu te kha nasa tak in an supply a, a hlawk pawh an hlawk viau in ka hria ani. Chutah chuan Mizoram Industry in pawisa a pek si chuan rul ve tur anni lawm ni tih kan ngaihdan anih avangin kan Chief Minister ho hian tunah hian a thin leh dan tur kan ngaihtuah a. Vaibelchhe hnih kan puk kha chu min rul let leh se, a pung pawh hi soft loan angin kan tih pawhin interest tlem zawk in min pe turin tunah hian in thin kan tum mek ani. Chumi tur chuan file nimin lamah passed chauh a ni a, kan in um nasa hle ani tih chu min hriatpui atan ka duh a.

Venus Bamboo kha khatiang nuaih anih avang khan keimahnin tih ngaihna kan hriat loh avangin a fact finding te, tin, a improvement tur te, a tan leh dan tur te pawh min suggest pui turin Inquiry Commission kha kan din ani a. Mithiam pahnih retired tawh, Pu Rualzakhuma, IAS leh IPS retired Pu K. Lalchhunga te kan ruat a. File zawng zawng deuh thaw kha hmuh tur a awm lo reng reng a ni. An mamawh 32, 34 ah khan pali lek te hmuhchhuah theih ani a. Khawnge a awm pawh an hre thei lova, hre tur pawhin an ti ngial a, chuti chung pawh chuan an hmu tha thei lo ani. Chu chu kan dinhmun anih avangin Enquiry hun kha sawn loh theih loh in a awm a. Vawihnih kan extend sak tawh a. Tun March 31 hi a last tur, tah hi chuan extend tawh loh tur, in hmuh ang ang hi chu lo submit mai teh u kan in ti a, tunah hian kan in nawr mek ani a, an report an lo thehluh a, khami atanga kan en loh kha chuan action lak dan tur zel te emaw, a hmasawna lam tur emaw pawh tunah chuan kan sawi theilo a ni. Pu Speaker, ka lawm e.

S P E A K E R : Hun a tawp e! sang tam tak bo na ram pawh nilo, nuaih tam tak mai pawh nilo, crore tam tak bo na ram te hi kan keu chhuak nual rih anih ni. Vawiin hian kan member-te Pu John Rotluangliana, kan Deputy Speaker hi thil pawimawhah a zin a, Delhi lamah, tin, Dr. R. Lalthangliana hi hritlang a pik tlat a, a lokal thei lova. (Pu Lal Thanhawla, Chief Minister : Pu Speaker, member zahawm takte han hriattir tur ka nei a, khawngaihin hun min pe thei em?) House Leader-in kan hriattur tul rawn sawi rawh se.

Pu LAL THANHAWLA, HON'BLE CHIEF MINISTER : Pu Speaker, hemi thlichhe chungchang bawh hi a ni a. District hrang hrang atangin hei, report kan hmuh belhzel a, atam tham deuh avangin han puan chi pawh ani lova, hun a duh rei dawn a, hei tunah mai pawh hian tukin zing dar 4:00 atanga han tlehchho kha Tlungvel maiah pawh in 60 chu a tichhia a tih te kan lo hmu zel a. Tin, hmundangte kan hmu a, hetah ka nei nuala, kha kha House zahawm takah hian hriattir ka duh a. Tunah hian a pawimawh ta chu Pu Speaker, heng thlichhia in nasa taka a tih hrehawm taka te hi engtia tih tur nge niang tih a ni a. Fund hi awmsa a awm mai hranpa lova, mahse langin DC tinte hnenah a theih ang ang, a tul ang ang hma lo la turin hriattir anni a, helaiyah khan Health Minister zahawm takin hmanni khan kan Home Minister nen hian heng a pawimawh zual tan hi chuan rangva inchung tur hi sem leh kan tum hrim hrim a, amamawhtute hnenah. Vaibelchhe nga, vaibelchhe ruk lai in kan lei dawn a tiin kan han sawi

kha a ni a, mahse langin he House hi thudik lo kan hrilh ang tih a hlauhawm khawp maia, kan last minute rust, hemi financial year avanga last minute rust hi a theih ang tawka avoid kan tum a, nikum lamah pawh khan order khauh tak kan han siam a. Amaherawhchu, a department te an lo muang bawk a, a finance lamah alo in chhep tam kha chuan a lo harsa ve bawk a, chungte avang pawh chuan kan avoid tak tak thei lo a, amaherawhchu, tlem chu a tlem sawt a ni. Kuminah pawh hian kum dang ai chuan a tlem hle in alang a, mahse chuti chungin, he House-ah hian engmah zep tur a awm lova. Department hna hrang hrangah hian crore tel hi a lapse nual a ni. Chu chu a department mawh nge ni anga, Finance Department nge? Planning Department engnge ni tih hi tunah mai chuan ka sawi thei lo a.

Amaherawhchu, ka han sawi duh chu nizan dar 8:00-10:00 hnu thlengte pawh khan an thawk chungin State Bank-in a lo accept theih tawh loh te a nih avangin a lapse dawn nual a ni. Chung zingah chuan rangva sem turte pawh hi a tel a, tin, hetia lapse-ah pawh hian he sorkarah hian chhui tur a tam mai a. Treasury Officer lampangte hi an lo zelthel deuh em ni? Nge engemaw dawhkan hnuaiyah engemaw inban khum zeuh a awm loh chuan an ti tha duh lo, tih te pawh hi ngaihtuah a ngai ta. Crores tam tak hi a lapse ta a ni. Chuvangin hengte hi tun hnuah heng development hnathawhna turte leh mi harsate tanpuina turte a ni nual a, Pu Speaker, chuvangin hetiang a lapse tur hi a pawi hle a. Chuvangin hetia an tih lapse tawh lohna tur atan sorkar hna an thawh chhunga hriat vawng vawng thama enkawl an ngai niin ka hria a. Chung chu kan zawng tlang ang a.

Tin, sorkar hi a inthlak tawh a ni tih hi sorkar hnathawk pawimawh chin hi chuan an hre tur a ni. Sorkar hi a inthlak tawh a ni. Naktuk naktipah a inthlak leh ang. Chung hunah pawh chuan sorkar hnathawk tha ni tur chuan sorkar hi inthlang a ni ti hre zelin, khatiang khan kha sorkar kha an rinawm chho zel tur anih laiin, chutiang nilo chu an la awm nual niin a hriat a. Chung ho chungah chuan ngaihnathiamna hi kan nei dawn lo tih he House zahawm tak hi ka hriat lawk tir duh a. Tin, kan zavai atana rampum interest anih avangin nimina ka ngen tawh angin member zahawm takte minrawn pui turin ka duh a ni.

Tunah pawh hian February thla tawp kan intiam a a extend lawk theih loh va, march kan han ti leh a. Chuti chung pawh chuan hetiang a la awm cheu hi a paw ka ti a. Keimahni lamah chuan tur ngai tur ang ang chuan kan inturin ka hria a. Mahselangin, a department lamah te hian engemaw a awm ang tih ka ring a.

Tin, hei report kan la dawng fo va, 'cashier te hnen atangin bill lak a har lutuk chutiang khatiang' tih te. Tin, Accountant te leh cashier te hi an awmna ah an awm rei chuan harsatna a thleng thin chuvangin kum hnih danah emaw sawn kual zel tur tih te, heng principle te hi follow kan han tum chho mek a, tiang chu a ni a. Chuvangin bill nuai hnih khat leh han ti ta ila ka neih vang nilovin latu tur te tan pawh khan rokhawhna siamin engemaw an lo demand thin te kan hretlang anih chuan chung ang ho chu trap dan hi kan ngaihtuah loh chuan he ram hi kan siamtha lovang tih te hi ka hlau a. Chuvangin khatiang mi kha

hei member zahawm tak takte hian thian tha te leh contractor milian te kan nei vek a, chungho hnen atang chuan an khawsa zia kha hria ilangin tichuan kan trap ang a, an pawisa te kan chhinchhiah ang a, ACB te leh kan police ten an vaw leh ang a, tiang chuan pahnih pathum kan inhrem chuan tam hrem tur hi kan awm lo thei mai awm mange tih te ka ngaihtuah hial ani, Pu Speaker, chutiang khawp chu ani a tuna kan han mamawh zualpui chu. In chhe leilet der an inchungte pawh rialin a den chhiat hman leh theih tawh loh te member tin ten mahni bialchhung ami phuhruk thei tura kan han puan ngawt a kha kan ti maithei dawn lova tuna a landanah chuan khatianga zelthelna leh a dante leh engemaw thildang avang te khan. Amaherawhchu, a mamawhte chu kan pe tho ang kan ti ani. Khawi atang pawhin kan pe ang a, dawrkaite hnen atanga puk a ngai anih pawhin kan puk ang a, sorkar pumpa chuan kan la rul thei thovang tih kan ngaihtuah ani. Tin, hei chhiat kan tawk zeuh zeuh a, fire-ah te kan thi a, thenkhat chu mahni lo halah te kan vanduai palh a, category chu a inangin a rinawm lova kangthelna avanga thi ta te chu ram leh hnam chhanna a thi angah kei ka ngai deuh mai a. Chutiang zelin mahni lo hal leh khatiang vela thi palh ta te kha chu an vanduai ve hrim hrim ani a, ram leh hnam chhan ang em chuan categorise theih anih ka ring lova.

Tin, khawvel a danglam zel a, a tawp a hnai tawh a. Chuvangin khaw danglam pui pui kan tawng chho zel a ni a. Chungah chuan accidental death eng enge ni, tek den leh a dangte kha kan tawng kan tawng chho ta zel a ni a. Sabereka khuangkaihin a lak ang chi te. Chu chu an arte thih ringawt lova sorkar ang pawh a kan tanpuina relief fund te pawh a awm thei lawmni, tiin kan Chief Secretary ten an dap a, kawng eng eng emaw chu alo awm nual a. Chuvangin, entirnan kangmei a thi ang te hi chu Ministry of Home Affairs in natural calamity-ah a lo accept tawh a, chuvangin kangmei vanga thi, natural calamity a ni ngei tih competent authority in a certify chuan nuai khat thlenga in ralna leh in tanpuina a awm a. Tin, tanpuina pek theih chin kha residential area a ni tur a ni, tih a ni a. Hetia ram kang te an tia, a tlangpui chuan Mizoram hi chu residential area deuh vek a ni mai a, V/C tam vangin chutiang zawng te chuan kawng tunah hian an dap mek a ni tih House zahawm tak hi ka'n hriattir duh a.

Tin, Central Relief Fund atanga tanpui theih chi te a awm a, tanpui theih loh chi te pawh a awm bawk a. Chutiang zawng zawng chu a tul anga work-out turin tunah hian kan Chief Officer te hma la tura kan in hriattir tawh a ni a. Tiang khan ka sawi seng bawk lova. Chutiang te a kan lo la hman ngai loh kha. Chung chu tunah hian kan mithiam leh thahnem ngai ten an han haichhuak a. Forest Department atang ringawt pawh hian hemi Integrated Forest Protection Scheme hnuai ami ang chi te a va nih loh chuan tanpui dan, tlem a khatiang vanga accident a, lo piangsual palh ta leh khatiang te pawh kha tanpui dan a awm thei dawn ni awm in a lang a, chuvangin tuna thli chhia leh rial leh hetiang tuar vanga harsatna tawk ta te pawh hi keimahni sorkar anga normal relief fund emaw assistance emaw kan lo neih piah lamah hian central relief fund atang te pawha tanpui dan te pawh hi dap theih dan te a awm dawn niin a lang a. Chutiang tur chuan tunah hian sorkarin hma ala ani tih he House zahawm tak hi Pu Speaker, ka hrih duh mai a ni e. Ka lawm e.

S P E A K E R : Kan dan 27-na, Sec-I anga private business ni atan zirtawpni, kan hman thin kha kan Danin min phal angina BAC report kan pass tawh ang khan, vawiin 1st April, 2010, ningani private member business atan kan hmang anga, Resolution sawn lai kan dawng a, admit vek a ni a. Kan Dan 124 angin ni 29th April, 2010 khan ballot a ni a. Bulletin part-II, No.92-na, ni 29th April, 2010 a tarlan ang khan a in dawtin kan la ang a. Kan Resolution No.1 kan la hmasa anga, kan Resolution No.1 neitu, Pu S. Laldingliana move turin kan lo sawm ang a.

Hei, kan Danah bawh hianin Dan-131 na ah khan a move tu hun hman bi tuk kha a awm lem lova. Tin, member ten kan han sawi hona ah pawh khan 15 mins aia tam, member in a sawi dawn chuan, Speaker phalna a ngai tih kha a ni a, general discussion-ah te kha chuan, ‘10 mins aw’ te kan han in ti diat diat a. Amaherawhchu, resolution bikah hi chuan House a member te hi a lo dah lal khawp mai a. Chuvang chuan private member business ah chuan member te alo dah lal khawp mai a, kan Dan hian. Chuvangin 15 mins aia tam hman kan duh chauh khan Speaker phalna kha lak a ngai a ni. Chutiang ang chuan hria ilangin a mover turte pheih chu a hun limit a sawi lem lova. Tin, khami motion-in a related Minister-te pawh kha a lo sawi ve duh pawhin a hun hman tura kha a bituk lem lo, mahse, a bituk lem lo anih avanga chawhma zawng mai hman emaw kha chu tum lohna chang hre turah in ngai ila a tha awm e. Tunah kan Resolution No.1 kan lo la dawn tawh anga, a neitu Pu S. Laldingliana’n han move sela, i lo sawm ang.

Pu S. LALDINGLIANA : Pu Speaker, i rem tihna in he House zahawm taka sawiho atan he Resolution, ‘Chhim bial mipuite harsatna sukiang tura Lunglei bula Airfield siam anih theih nana hmalak a ni ta hi lawmawm kan ti a. Airfield hi siam thuai anih theih nan sorkar laipuih nawr zui zel ni rawh se’, tih chu ka rawn chhawp chhuak a.

Pu Speaker, he Resolution hi kan Election manifesto No. 17 (E) sub-no. 4 a tarlan angin “Central sorkar Look East policy hnuai a lo berah, Airport pahnih tal kan neih belh theih nan hma kan la anga, Lunglei khawpui leh chhim bial mipute’n an hman tangkai theih tur Airport ngaihpawimawh hmasak a ni ang” tih hlawhtlinna tur atana he Resolution hi rawn chhawpchhuah a ni tih kha kan sawi hmasa duh a ni. Pu Speaker, Lunglei bul Airport han tih hian a kawh ber chu Lunglei chhimtlang lampanga saitluk hmun hi Mizoram chhim lampanga hmun laili taka awm, ka bial chhung tlangte khua bul tak khu a ni a. Tunah hian Lunglei 2nd Battalion M.A.P hmunpui atang sawn kawng chhe takin a pawh theih theih hram hram a, Lunglei atang sawn 25 mins vel kal in a thlen theih a ni. Kawng hi grade tha zawk a ni se chuan awlsamte in nuamsa takin 15/20 mins leka helai saitluk hmun hi a thlen theih dawn a ni tih kha ka’n sawi hmasa a ni.

Tin, Lunglei atang sawn Lawngtlai lamal kal pheih ta ila, member ten kan hriat atan Hrangchalkawn atangin T.N.T hmun kan tlan pelh chiah sawn hmalam han hawphei ta ila Thangte khua a lo lang nghal a. Chu Thangte khua chhun

chiah chuan Saitluk tlangdung hi a inkhawh chhova. Tin, chutiang chuan Lawngtlai kawng atang pawh sawn khaw hrang hrang – Bualte te, Thaizawl, Thualthu te, Tawipui South atang te sawn helai hmun pawh tur hian kawng laih ni ta sela. 10 Km pawh tling lovin awlsam te in pawh mai theih tur a ni. Tin, chumi piah lamah chuan Pu Speaker, helai Saitluk hmun hi Lawngtlai thlang Khawmawi kan tih te leh Diltlang atang te pawh sawn kawng laih ni ta sela, lui kan miah lovin 15 Km vela hla in awlsam takin a pawh theih a ni. Tiang chuan, helai Saitluk hmun hi Mizoram chhim lampanga hmun laili tak niin, khawi hmun atang pawn awlsam te a pawh theih a ni tih kha ka'n tarlang hmasa a ni.

Sawilan tak ang khan Pu Speaker, Saitluk tlangdung hi tlangdung lian tak mai, tlang chang tha tak mai a ni a. Mithiamten an en tawh a, an hmuh danah chuan helai hmunah hian Airport siam lo ni ta se, runway hi 3 Km aia thuiin a siam theih dawn a ni an ti a. Tin, chumi bakah chuan a tlang hi a chang tha a, Airport siam anih hnuah pawh further development atan a hmun hian a zo hle a. Helai hmunah hian aircraft pawh awlsam takin a tumin a thlawk chhuak thei dawn a ni. Pu Speaker, vanduaithlak takin sorkar hmasa hun lamah khan MNF ministry-ah khan helai airport siam puitlinna tur atan khan tih tak taka hmalak a awm lova. Niminah khan he House zahawm takah khan Lunglei East bialtu zahawm tak Pu Joseph Lalhimpuia khan a rawn tarlang tawh a. Khatih lai ministry hun hmasaah khan Lunglei D.C Chairman-na hnuai Airport Survey Committee kha din a ni a. Kha Airport Survey Committee-ah khan member hrang hrangte awmin khatih hunlaiiah khan keini pawh YMA Sub-Headquarter hruaitu kan nihna angina member kan ni ve a. Thahnemngai takin airport siam puitlin a nih theihna tur atan hma kan la thin a. Committee te pawh vawi engemaw zat kan nei a. Amaherawhchu, sorkar ber ina tih puitlin tumna a neih loh avang khan tih tak taka hmasawna kha hmuh tur a awm lova. Amaherawhchu, kan tih theih tawkah NGO co-ordination committee te din chhovin nakinah sorkarin helai hmun hi airport atan siam tak tak lo tum ta sela, compensation-ah te kan buai loh nan tiin khulaia ram pek belh tur emaw lei tur emaw khatiang chi hrim hrim kha DC chairman-na hnuai atangin phal loh a ni a. Chutiang chuan a ram pawh saw tun thlengin NGO level atang khan humhalhin a awm ani tih kha he House zahawm tak hi Pu Speaker, ka'n hrilh duh a ni.

Tin, chumi bakah chuan hei vawiinah hian Pu Speaker, a lawmawm ka ti hle a. Chutiang ang back ground atang chuan vawiinah hian a sawina tur forum dik tak Mizoram rorelna sang berah sawi thei a kan han awm ta hi a ropuiin, a lawmawm ka ti a. Tin, chutiang ang back ground atangin kei ber kher hi he Resolution pu lut theitu a ka'n awm leh zel te hi a mak ka ti a, a lawmawm ka ti a, bialtu ka ni bawka Pu Speaker, Pathian thil rel dan hi a va mak em ka ti hial a ni!. Tin, a lawmawm ka tihna em em chu he sorkar-ah hma min laksakna hi a ni.

Pu Speaker, hei Airport Authority of India atangin top engineer te ko chhuakin, ama ho hian in survey te pawh neih a ni tawh a. Tin, kan Engineer ten a hmun a kal an duh avangin, kan Chief Minister zahawm tak ruahmanna in a hmunah hruai turin, Lunglei lamah pheih pui an ni a. Amaherawhchu, hetih hun lai

hian Pu Speaker, kawng a chhia a, a kal theih si lova. PWD hotute kan han dawr ngial a. JCB tak ngial pawh a tan avangin, a hmun a hruai kha a remchang ta lova. Amaherawhchu, vanneihthlak takin, Google Earth atangin leh Satellite picture atangin D.C office-ah helai Saitluk ram hi a ram inthuah thip dan te, engkim kan engineer te hian a hmunah an en thei a. A lawmawm hle in ka hria a. Anni pawh an lungawi tawh a. Helai hmunah hian Airport tha tak a siam thaih a ni tih kha an sawi nghe nghe a ni. Pu Speaker, kum khat emaw lek chungka kan sorkar chhung hian hemi chungchang thu a kan hmalakna hi a chak hle in ka hria a, a lawmawm ka ti a. 13th Finance Commission-ah he Airport siam puitlin anih theih nan DPR (Detailed Project Report) siam nan crore 250 dil a ni a. Amaherawhchu, a concept paper te leh thil tul dang kha buatsaih hman anih loh avangin kan hmu thei ta rih lova. Chuti chung chuan Pu Speaker, kan House Leader thahnem ngaihna avangin tunah hian Planning Commission-ah bawhzui chhoh zel a ni tih kha ka'n sawilang duh bawh a ni.

Tin, Pu Speaker, he Airport hi siam puitlin lo ni ta sela, Resolution-a a lan ang hian, chhim bial mipuite tan chuan a tangkai em em dawn a, thil lawmawm tak a ni. Mahse, chumi piah lamah chuan Mizoram pumpui tan hian hmasawna ruhrel pawimawh tak a ni dawn a ni tih vaviinah hian ka tarlang duh a. Chumi piah lamah chuan Pu Speaker, India sorkar laipui tan pawh hian he Airport hi a pawimawh dawn in ka hria a, Question hour ah khan kan ngaithla tawh a. Chhim lama Kolodyne Multi-Modal Transport Project turah hian buaipui chhoh mek a ni tih kan ngaithla tawh a. He project hi tihpuitlin anih hnu chuan Chhimtuipui leh Myanmar lawng chawlhna Sittwe pawh chho turin Chhimtuipui lui lawng kawng sial a ni dawn a, khilai lawng chawlhna bawh pawh tur khanin khawmual lamah pawh kawng laih chhoh tur a ni dawn bawh a, chutiang alo nih chuan Pu Speaker, sawlai Kolodyne Multi Modal Transport Project saw lo puitling chho ta se bungrua nasa takin, namenlo in a rawn tla thla tawh dawn a, a bul lawka airport alo awm tawh anih chuan a tangkai dan tur chu a chiang sa mai a ni.

Tin, Pu Speaker, kan Chief Minister zahawm tak hmalakna avangin tunah hian India leh Bangladesh sorkar pahnih inkara in sumdawn tawna border trade pawh tunah kalpui theih turin ruahmanna chak takin siam mek a ni a. Tunah hian Tlabung thlang lawk Kawrpuichhuah ah khian integrated check post siam anih theih nan DPR-te leh tuldang zawng zawng tunah hian Ministry-ah thehluh fel vek ani tawh a. Tin, kan Chief Minister hmalakna avang bawkin tunhna zawng zawnga Bangladesh sorkarin khulai a Border Trade a duh loh thin kha tunah chuan Kawrpuichhuah opposite-ah khuan Thekamurgh-ah khuan IPC (Integrated Check Post) sa turin Bangladesh sorkar pawh a in puahchah tawh a ni. Chutiang anih chuan Pu Speaker, tunah hian khulai khawthlang lam atangin Border Trade kan han kalpui thei bawh anga, Bangladesh atangin bungrua chi hrang hrang tam tak alo lut anga, heng bungrua lo lut te hi awlsam takin Airport hnaiteah a lo awm ang a, India ram hmun hrang hrangah leh khawvel hmun dangah kan thawnchhuak thei tawh dawn a ni, chuvangin helai chhimlam tan chauh nilovin Mizoram pumpui tan a pawimawh dawn a ni tih ka'n tarlang duh a, hetiang anih vang a nih ka ring a, kan DoNER Minister kal chhuak ta Pu Mani Shankar Ayer-a khan Lungleia kan Bhavan-a thu a sawina ah khan

chhimlam a Kolodyne Multi Modal Transport Project kan peih a nga, khawthlang lama Bangladesh leh India insumdawn tawna kan peih bawk a nga, chutih hunah chuan Lunglei hi sumdawna hmunpui Bangkok of Mizoram ah kan siam dawn a ni tih kha a lo sawi daih tawh a ni. Chutiang chu thil awmdan a ni a; sawilan tak ang khan Mizoram tan a pawimawh a, chhim bial tan a pawimawh dawn a, chumi piahlah chuan India sorkar tan pawh hian he airport lo awm tur hi a pawimawh ani tih hi ka tarlang duh a ni, a chhan chu Saitluk airport kan siam tur hi International Boundary bul lawk a awm a ni a. Tunah hian kan hriat angin China sorkar chuan ram zauh tumin nasa takin a bei a. Chumi avang chuan tunah hian Mizoram Aizawlah ngei pawh hian kan neih ngai tawh loh Brigade Headquarter rawn dah turin India sorkar chu a inpuahchah mek a ni.

Tin, Pu Speaker, hemi piahlah hian 13th Finance Commission Report kan en chuan hei state hrang hrangin a kan dawn tur sum kan en chuan Arunachal Pradesh chuan a dawng sang bik viau mai a. Khungte pawh khu chik zawka han en chuan a chhan a awm a ni, Pu Speaker. A chhan chu China sorkarina a ram a zauh tum zel danna tur atan khu State Arunachal Pradesh khuan sum a hmu tam bik a ni tih kha a hriat theihin ka hria a ni. Chutiang alo nih chuan he airport hi siam puitlin lo ni ta se, nakinah India leh China sorkarah hian engnge maw lo awm in kan inkungkaihna hi lo chhe ta ni hlauh sela, he airport hmang hian India ram venhimna chungchang thu ah te pawh helai airport lo awm tura hi airport pawimawh leh airport tangkai a ni thei dawn a ni. Chutiang anih avang chuan Pu Speaker, sawi ngai lovin helai kan Resolution hi member zahawm tak takte hian min sawipuia min pass-pui mai turin vawiin ah hian ka rawn chhawpchuak a ni e. Pu Speaker, ka lawm e.

S P E A K E R : Awle, Resolution neitu in a rawn moved a, a ngaihnam hle a. Kan han sawi tawh ang khanin minute 15 aia rei lo lak kan tum hlawm anga, i han sawiho teh ang u le. Tunge han sawi dawn le? Pu Zodintluanga. Champhai lam an han ding ve anga an paihthla mai lawng che maw.

Pu ZODINTLUANGA, MINISTER : Pu Speaker, Lunglei lampang atanga thlantlin kan nih ang hian hun min pek hmasak avang hian lawmthu ka sawi a. Hei, kan Resolution, chhim bial harsatna sukiang tura Lunglei bula Airfield siam anih theih nana hmalak ani ta hi lawmawm kan ti a. “Airfield hi siam thuai a nih theih nan nawr zui zel ni rawhse” tih hi a tha ka ti a, a lawmawm pawh ka ti a, hetiang House zahawm taka Resolution lo lut hi.

Ka han sawi hmasak duh chu Pu Speaker, congress Pu Lal Thanhawla kaihruai sorkar a din apiang hian chhim bial tan hian hmasawna hi a lut chho reng mai a. State kan nih hnuah kum sawm party dang MNF-te pawh kum sawm an lo sorkar ve a. Chumi chungin keini pawh kha kum sawm kan sorkar a, kha kum sawm tehkhin khan, Pu Speaker, Chhimbialah khian development emaw, chhimbial mipui hmasawna tur reng reng hi kum sawm chung hian hmuh tur hi a vang em em mai a ni. Tunah, hei, kum sawm congress sorkar

hmasak chhunga an hmalakna te hei, vawiinah kan ziak chhin a, a tam em em ringawt mai a ni. Ziak pawh kan ziak seng lo anga. A tam em em mai a ni. Entirnan, Chhimbial tan District Council hote kha, an Budget pawh pung lo, a ngai ang khan an kal tlawk tlawk mai a. Hei, kan han sorkara, sorkar hmasa aiin a let engemaw zatin an pung chho ringawt mai a ni. Chhim bial tan chuan he sorkar hi a va hlu em! sorkar reng mai se an tih hi ka ring deuh mai a.

Chutiang chuan Lunglei bik te hi han sawi ta ila. Pu Speaker, Congress sorkar lai khan Saikuti Hall kan tih te, Aizawla kan Vanapa Hall ai maha ropuia Chhimbialah kan sorkarin a min pek te, Civil Hospital Building te, sorkar hmasa a kan bul tan kha a ni a. D.C office building tha tak mai tuna kan neih te, Lunglei Government College building kan tih te, District Hostel, Boys & Girls Hostel te saw congress sorkar tih vek kha a lo ni, Pu Speaker.

Tin, Revenue building infrastructure emaw Lunglei District emaw chhimbial District ang pawh a, hmasawna awm reng reng chu, congress hun lai a tih a ni a. Vawiinah pawh tiang Resolution Lunglei mipui leh chhimbial mipui tena, Airport tha, District field tha an neih theihna tur atan a he House-ah te, Resolution a rawn lut leh hi a ropui ka ti a. (Speaker- LDSA field te pawh saw a ni vek ti rawh?) Aw, Pu Speaker, ka la rawn sawi chho a nge. Hetiang ang hi Pu Lal Thanhawla kaihhruai, sorkar a rawn din leh hian, chhimbial mipui tan chuanin, hmasawna ruhrel lian vawiinah hian a rawn thleng leh dawn a ni tih kha ka han sawi duh a. Saw, kan police station building te, PWD quarter, Polytechnic, Hrangchal kawn a mi te saw congress sorkar laia siam a ni tih kha he House zahawm takah hian ka'n sawi duh a. School of Vety Science kan tih te saw, Tourist Lodge, Zotlanga kan neih tak te, All India Radio te pawh saw, kan hunlai a mi kha a ni a. Tin, Lunglei Water Supply Scheme, hei, he House-ah ngei pawh Pu Speaker, kan member thenkhat ten, 'zing nu zun pawh a tluk lo' an tih thin te saw, Lunglei mipui chawmtu vawiin thleng sawn a ni a ni. Chutiang ang chu a ni a.

Tin, khawiva Mini Hydel Project te saw, congress sorkar khan a lo siam a ni. Chutiang chuan Pu Speaker, vawiinah sorkar tharah Zoram mipuiin rinna an rawn nghat a. Sorkar thar alo pian leh ve leh pawh Lunglei District leh chhimbial mipuite tan chuan kawlung, hmasawna hi a rawn thleng chho leh dawn. Vawiinni a kan Resolution atang ringawt pawh hian hetiang ang hmalakna tur te he House zahawm taka an rawn pulut hi a ropui ka ti tak tak a.

Tin, sorkar thar a pian atang khan chhimbial, abik takin Lunglei tan phei chuanin lawmna tur hliir a ni mai a. Tunah, Link Road Lunglei khawpui hmasawna tur atan ruahmanna an han siam a. Tin, khawpui chhungah Convention Centre vaibelchhe sawmhnih chuang man tunah kan Bus Station-ah sawn, multipurpose tur a ni a. Bus Station saw changtlung takin an siam ang a, a hnuaiyah building tha tak tak te office building te, chumi chungah Convention Centre ropui tak vawiinni ah tender theih tura an awm mai te hi, he sorkar hi Pu Speaker, chhimbial tan chuan a ropui a ni.

Kum sawm sorkar dangin he ram an kaihhruai chhung khan hmasawna tur Lunglei District ah te chhim lampangah sawn hmasawna tur sawi tur avang em em mai a ni. Hmuh tur a awm lo a ni. Chuvang chuan Pu Speaker, vawiina kan hotute, kan Chief Minister zahawm tak kaihhruaina hnuai chhimbial in hma kan dawn leh tur te hi a lawmawm ka ti a. Chuvang chuan, he Resolution, chhimbial mipuite harsatna sukiang tura he Airfield siam anih theih nana hma la zel tura Central sorkar nawr tura Resolution rawn lut hi ka rawn thlawp a. He House zahawm tak hian rawn thlawp ve turin ka'n rawn sawm a ni e. Ka lawm e.

SPEAKER : Pu K.S Thanga ko hmasa ang aw, a dawtah Pu Lalduhawma.

Pu K.S THANGA : Pu Speaker, ka lawm e. Lunglei South Bialtu MLA zahawm takin a Saitluk Airport siam, Resolution meuh siam a hmalak a rawtna thahnem ngai taka a rawn move kha a hmasain ka support a ni tih ka'n sawi duh a.

SPEAKER : Chair kan han inthlak lawk ang e.

Pu K.S THANGA : Pu Chairman, hei, kan hriat angina, tuna ka hma a member zahawm tak tak te, movers te leh member dangte sawi ang khan chhimbial rilru beidawna leh rilru natna tam takin a tuam tawh, hmanni House-ah pawh kan sawi tawh ngaihsak loh ni a inhriatna avanga in lak hran duhna khawp te pawh Politics engemaw kalsual thei khawp a mipui rilru nate he House-ah pawh kan ngai thla a ni a. Chutiango hmasawna tur atana a ruhrel pawimawh em em mai Airport nei thei tura Congress Party Election Manifesto pawhin a lo tih tawh, vawiinni a chutiango Resolution rawn chhawpchuah a ni hi ropui ka ti a.

Tin, chutih lai erawh chuan Pu Chairman, sawlam District-a MLA zahawm tak vawinah hian a damlo va, a sawi ve thei loh tur hi a vanduaithlak ka ti a, damloh hun pawh hi a hre ang reng mange aw ka ti a. Kum sawm sorkar chhungin hmalakna a awm si lova. Support a ngai si a. Amahin a duh ve tho si a. Mahse sorkarna an han lak chhunga tih ni bawk silo. Vawiinni a thahnem han ngaih thar leh hi chu a tan pawh a hrehawm viau ang tih ka rinpuia. An damlo remchang pawh hi natna rau rauvah pawh a hun pawl tak a ni ka tih pui deuh a.

Tichuan, Pu Chairman, hemi han sawi zauna atan hian he sorkara kan Chief Minister tuna kan House Leader zahawm tak min hruainaah hian Mizoram hi a mak khawp mai a. Hmasawna tak tak reng reng hi chu vawiina kan House Leader kaihhruaina hnuai hian a thleng tlat zel mai hi Pathianin mak takin amah hi a hruai ni tepawhin ka hria a, lawmawm pawh ka ti a. Chirhthehna leh

sawichhiatna a tawk chung pawh hian Mizoram a thil tha tak tak hi chu ama kutchhuak deuh zel mai a ni a, ropui ka ti a.

Hei, Lengpui Airport te hi kan sawi thin a. Tunhma chuan, ‘choak bak a tum lovang e’, tih khawp te kha a ni a. Tin, khatih hunlai khan sorkar anga budget state plan pumpui te kha cheng vaibelchhe zathum emaw vel kha a ni a. Chuti chung vaibelchhe za chuang khatih hunlaia Chief Minister leh vawiina kan Chief Minister lo ni leh ta kan Leader-ina a lo duang chhuak ngam te kha a ngaihtuahna hi a lo ropui ka ti a. Hei, vawiinah chuan mizo mipui zawng zawng tunhma chuan milian leh hausana tena a zar an zo tur emaw an tih thin kha a ni. Mahse, tunah chuan retheite dinhmun hniam zawkte, sumdawng te, tin, harsatna dam lohna avanga tuartu te chung zawng zawng te chu a malsawmna zo tu an ni ta zawk a. Mirethei chhumchhia te pawhin nasa takin khung Airport avang khuan malsawmna kan lo nei ta a ni. Khatih hunlaia Mizoram sorkar sum dinhmun nena chhut chuan a pawisa hman kha thil theih loh hisap, keini ang hisap atang chuan theih loh tluka ngaih a ni a. Mahse, Leader ropui tak mai Mizoram kan lo neih avangin hetiang hian infrastructure tha leh kan ram tana rohlu kan lo neih phah a ni.

Chutiang baw chuan Tuirial Hydrel Prolect pawh Mega Watt 60 pe chhuak thei, hetih hunlaia estimate ah khan vaibelchhe 480 pe chhuak tur a ni a. Tichuan, hmalak chhoh ni in kum 2008 November thla a hawn tur kha a ni. Mahse, tute unau kan ram sorkara thil tithei ber naute, khilam Champhai lam atanga awm thin atanga khuti laiah huan ropui tak mai neih avangin tunah chuan harsatna kan lo tawk ta, compensation avangin chungte pawh chu tunah khuan kan Chief Minister hian hmalak leh tumin nasa takin tan a la a. Hengte pawh kan sorkar lai te, opposition kan nih tawh hnu te pawh khan an leiverh te a hmunah video-a thlalakna te nen vawi engemawzat kan zuk kal a. Khutiang han pamtul mai tur te khu a uiawm em em mai a. Chu chu kum sawm chhunga kan sorkar kalta ina min rochun a ni ang zawnga zuk ngaihtuah phei chuan mombati han insem khum leh ngat te phei chu mizo mipuite in hmuhsitna ah ka ngai a, paw ka ti hle a. Khungte pawh khu tunah chuan kan Chief Minister chak tak leh remhriatna a zarah hlawhtlinna beisei tak kan han nei leh ta a ni.

Tin, Pu Chairman, Aizawl-Lunglei World Bank kawng kan tih mai World Bank road te pawh hi congress hmasa ah khan investigation zawh niin a survey nan pawh cheng vaibelchhe tam tak mai kha dah hman a ni a, hna tam tak an thawk hman a ni. Amaherawhchu, sorkar kum sawm a lo din chung khan hna a muang em em mai a. Chhimphei MZP phei chuan lungin tan phah te, chhim YMA Co-ordination Committee an tih khaw 54 YMA hruaitute chutiang chuan agitation siama police kut tuara, kawng tha an duh avanga hmalain kut tuarna te a lo thleng a, kum sawm hnuah tunah chuan sorkar chak tak kan House Leader sawi ang khan Company-ah emaw, khawiah emaw kan hotuten engmah mamawh an dil loh vangte nge ni ka hre lova, tunah chuan hna hi a kal chak ta em em mai a. Kumin thal chhung hian a pumpui zawh hman te pawh hi tum a ni a. Khaw awmdan a zirte a ni anga, vawiinnia kan sorkar lo ding leh hian tih hlawhtling tumin hmalak a ni a, a rawn chhunzawm leh mek a ni.

Tin, Multi Modal Kolodyne Project te pawh hi nasa takin hmalak chhoh a ni leh ta a. Mizoram chhimlam rilru natna ngaihthah nih bikna, hmasawna hi independent suala sual ngai khawpa rilru na a an lo vei thinna pawh chu tunah chuan an inthlunzawm chho mek a. Chutiang chuan hei, Referral Hospital cheng vaibelchhe sawmli chuang congress sorkar hmasa in a hnutchhiah, contract a hmanzawh veka hmalak zuina awm ta lo te pawh, tunah hian Aizawl khawpui lo thang zel nen, sawlaih sawn Medical College & Hospital tih te pawh Aizawl Civil Hospital hial te pawh sawn anih loh pawhin sawmi nena tangkawp a, chutiang tur chuan kan sorkar chak takin hma an la te hi. Sawti lai Lunglei bial mipui mai ni lo, helai chhimphei tlangdung bial tan hian zalenna dar hi kan sorkar hian a vua a, waviinah hian sal atangin an chhuak a, kha economic rahbehna sal atang khan waviinah hian sorkar hian a vuak sak in ka hria a, ropui ka ti a. Chuvang chuan heng hi Saitluk airport te khatiang Multi Modal Transport Project te a lo hlawhtlin chuan sawlama kan unau, waviinni a heta kan rawngbawlpui ngaihsak lohna leh mental leh moral-ah nasa taka an lo tawrh tawhna nen he ramah hian thlamuang takin kan lo chengho thei dawn a ni te in alang ta a.

Nichina movers in a rawn sawi ang khan, a rawn moved tu MLA zahawm takin a rawn sawi ang khan, sawlam chhimlam Lunglei District mai ni lo. Lawngtlai District te, Saiha District zawng zawng te pawhin an chhawr tur ani a. Chuvang chuan, Mizoram tan hian hei hi thil ropui tak leh hmasawna kawng eng lo thleng leh tur, Mizo hnam damna, ram leh hnam damna mai nilo, thinlung tak taka damna hi he Development-ah hian alo kal thei dawn a ni tih hi beiseina nen ka lo thil ve dan a ni a. Chuvang chuan waviina inkhai ruallo leh Development-ah te tlarual lova kan ngaihna zawng zawng pawh kha heng hian nasa takin a rawn chhanchhuak anga. Mipuite thim hnuai atanga an thutna atangin, eng ah an lo ding chhuak thei dawn a ni. Chuvang chuan Pu Chairman, waviina MLA zahawm takin a rawn moved 'Saitluk Airport siam tura chak taka hmalak ni rawh se', tih hi lungsi tak leh phur takin ka support ani tih kha kan sawi ve duh a ni. Ka lawm e.

Pu LALDUHAWMA : Pu Chairman, he Resolution hi han support ka duh a. Nikumah khan Private Resolution he House-ah hian ka pu lut ve tawh a. House pumpuiin tha takin min pass pui a. Khatiang kha vang tak, thil awm zen zen lo a ni a. Khata ka Private Resolution min han pass pui theitute lamah khan lawmthu sawi let ve hi ba in ka inhre hrim hrim a. Chu chu ka'n support duhna chhan pakhat a ni a.

Tin, chu lovah chuan nimin tlaia kan House Leader-in a thu sawi kha, corruption dopui tura min sawmna te leh office a tlangnel taka awm tura min han sawmna chi kha a ropuiin a zahawm ka ti a. Khatiang kha a mawihnai atan pawh, a ri hi kan hre khat hrim hrim mai a. Khami sawmna kha mawihnai atan a tih niin ka hre lova. A thinlung tak tak atangin a sawiin ka hria a. He Resolution rawn thlawp pah hian House Leader rawn sawmna kha ka reciprocate a ni tih han entir ka duh tel bawk a ni.

Tin, a pathumnaah chuan, thil tha a ni hrim hrim mai a. Thil tha leh tul hi chu kan rel ho in tha kan ti tlang thei tur a ni tih hi ka principle a ni ve a. Mizoram hi tlang ram a ni a, kan hria a. Tlang ramah chuan kawng te, field te hi laih a har bik a, airport laih te a har bik zel a. Airport turte phehi hi chumun remchang hi kan ngah lo hrim hrim a. A remchang kan neih chhun ang ang hi chu explore a, siam chhoh zel kan tum tur a ni hrim hrim a.

A bik takin chhim lam hian, Mizoram District Council kan nih tan atang te in economic ah te pawh, kohhranah te pawh, politics ah te pawh No. 2 nihna hauh chho zel anni a. Tunah chuan Lunglei chu officially in No. 2 chu a la ni deuh a ni mai a. Mahse, District dang ang tho in D.C pakhat khan ala awp ve thova, population-ah pawh District Headquarter dang te an phak ta lo tan a ni. Khatiang kha anih avangin tunhmaa an dinhmun te an ngaihtuah a an lung a awi lova, an lungte a leng a, Complex te pawh hi engemaw chenah an develop tawh ani tih hi hriatpui ve in ka in hria a, an khawngaihthlak viau a ni. Chutiang dinhmuna lo awm thin chhim lampang hi tunah hian an tan beiseina thar a rawn in hawng mek niin ka hria a, tu tih bik vang pawh nilovin, khuarel ah hian, khawvel hi kan kawtchhuah pui a ni dawn a ni tih hi a rawn tin zawn tlat a ni. Tunhma lama kan dream phak ngailoh in Look East Policy te Government of India in a rawn duang chhova. Chutah chuan Sittwe atanga kan ramri thlengin tunah hian kawngpui tha takin black topped in an rawn sial tawh a. Keini lamin Lawngtlai thlengin kan sial tawh a, kan inkarah 100 Km vel lek kan laih ve tur chuan min dai dang ani chauh tawh a, saw saw a in pawh hunah phehi chuan mipui maktaduai sang tel khawvel khawchhak Far-East a awm zawng zawngte nen hian Culture-ah te, Economic, Politic-ah leh engkimah hian exchange thar kan nei tawh dawn a. Chu chuan chhimlam hi kawtchhuah ah a rawn siam dawn a ni tih a lang reng tawh mai. Chuvangin, Mizoram chhimlam hi a vul ve thung tawh dawn a ni.

Entirman, ka tawng an huat thu suh ah Hnahthial te pawh, Aibawk lamah kawngpui a tlang ta a, Lunglei kultur helama kan kal atang chuan Hnahthiala Hotel siamho pawh kha an bo deuh duak tawh a ni. Zin vei vak an tlem em em a ni. An khawngaihthlak viau a ni.

Khatiang ang khan khawvel hun in her hian vanneihna emaw vanduinah emaw hi a herchhuah pui thin avang hian tunah hian chhimlam tan hian hmasawna thar, beiseina thar a rawn inherchhuak mek a ni. Khawmuala inkal pawhna tur kawngpui a tlang tep tawh bakah Kolodyne Modal Transport Scheme a awm bawk a. Luidungah lawngin kan kal thei dawn bawk a, tuifinriat access pawh hla vak lovah kan nei thei dawn a ni a. Chungte chuan Mizoram tan hian ngaihtuahna thar kan nunphung / society thleng hian a khawih ka ring a.

Look East tih anih ang deuh hian kan thinlungte hian khawchhak lam a hawiin kan mumang ah te pawh hian khawchhak lam kan mang tam tial tial tawh dawn ni te pawhin alang a. Chumi a route pawimawh chu chhimlam atanga kal tur a ni miao mai a ni. Kan ngaihthlak tawh ang khan Bangladesh nena kan in sumdawna tur hmunpui te pawh saw lamah buatsaih mek a lo ni zel a. Chutianga thil a in se hmur tual lai a, sawlai area Saitluk hmuna Air Field neih

tumna thinlung a lo awm hi thil in hmeh tak a ni a. Thil lawmawm tak a ni hrim hrim mai. A hmunhma te kan hre chiang ve lova, Airfield mai ni lovin, Air Port ah te la ti lian dawn ila a zo ang em? tih te ka thinlungah chuan a awm a.

Tin, hei zan reiah khitah Hanoi vel lampang Tokyo vela thlawhna thlawk chho thin hi kan mit te pawhin a eng kan hmu thin a, a ri te pawh kan hre thin a. Heng khawvel khawchhak lampang nena kan in kalpawhna turah pawh Kolkata-Guwahati ngawt ni lo hian Lengpui emaw, tuna kan sawi Saitluk emaw a dang emaw ah hian Refuelling Station te hial dan ve theihna te hi awm sela kan ramah, International Air-route ah te hian min rin lut ve sela, kei, chakawm ka ti khawp mai a.

Chuvangin he Resolution hi a tul zia te, a that dan te, a hmunhma awmzia te sawi ve ka tan a tulin ka hre lova, a mover te leh dawlam chinchang hre tak tak in an sawi te ka ring mai a, keini aiin an hrechiang bawk a. Hun pawh hman tam ka tum lova, thil tha a ni a, thil tul a ni a, waviinah hian lungruak tak mai hian pass teh dial mai ila a tha tih hi ka han rawt a ni e.

Pu K. LALRINTHANGA : Pu Chairman, tuna kan Resolution kan move a hi thlawp zawnga rawn sawi ve ka duh a. Ka han sawi tan duh dana chu Air port siamna chang hria hotu kan han nei leh ta hi a lawmawm ka ti a. Rilru in a ngaihtuah thui hle mai a. Hruaitu pakhat chuan maupu khat chu ka rawn thlen ve ang tiin khaw pakhtah a sawi a. Khalaia a sawiah khan enge a thlen tak kha ka hre lem lova, Tuirial dunga changel zozai te hi aw an ti a, mipui chuan thil engemaw tha takah min chhuahsak dawn emaw kan ti a. Tuirial dunga changel chu eng atan nge kan hman tih kan hre hranpa lem lova. Nichina ka hmaa sawitu in a sawi ang khan Lengpui Air Port an siam dawn khan, 'choak bak a tum lo ang e', an ti a, a taka rawn thleng a. Kan chhawr tangkai dan te kan hre chho leh ta a. Kum hla tak kha han sawi ka duh a, 1969 kum khan chhim lamah BRTF in motor kawng an lai tan dawn a. Lunglei atang sawn Tawipui BRTF an rawn kal hmasak ber niin hmar lam pan tura kan chhuah ve ni a ni a. An motor ah kan chuan sak a, chu chu motor ka chuan hmasak ber tum a ni a. Chuta tang chuan ka han ngaihtuah a. Tuna Lunglei bul Tawipui khua nena inhnaih tak (ka pianna hmuna Tawipui khua a ni a) Airport kan han sawi ri ta mai hi a lawmawm ka ti a. Airport siam thei turin hruaitu tha kan nei a. Hei, kan Resolution move tu lah hi a ngaihtuahna a fing hle in ka hria. Sawlai hmuna 'Airport din turin sorkar laipuiah nawr zui zel ni rawh se', tiin Resolution a rawn move a ni a, lawmawm ka ti a. Kum 1967 tih lai vel te khan PWD labour-ah te kan tang thin a, chungte nena han ngaihtuah chuanin tun a Airport han tih ut mai tak hi chu a lawmawm a ni.

Kumhlui khanin kan MLA, kan member pui zahawm tak nu chu nikhaw hre lovin a awm a, Aizawlah an rawn phur pheih a, Kolkata thlengin phurh thlak a ni a, chungah te chuan kan in chhan hman lovang tih hi kan hlau em em a ni, Lungleiah a ni si, Aizawl atangin a hla si, Lungleia Doctor ten an enkawl hleitheh silo, thiamna sang zawk nei kha Aizawlah deuh vek an awm si a, rawn

phur pheii turin hun a duh rei si a,rawn kalna tur kha kalkawngah motor su nen,tahkhan in kan in phur khawlo ang tih kha a hlauhawm em em a,rilru a mangang a ni.Chutiang deuh chuanin midang pawh hi mangang mi tam tak an awm a,Lunglei hmun bul Saitluk hmunah sawnin Lunglei atana reilote kala thlen theihna Airport a awm chuanin damlo mi tam tak tan in enkawlna pawh awlsamna a siamsak dawn niin ka hria a.Hmanlaiin Champhaiah hian Mizoram leh Burma insumdawn tawinna a awm thin a,rangva te pawh Champhai lam atangin nasa takin arawn kal thin a ni.Champhai lam pawhin an changkanpui thin in ka hria.Chutihruah chuan Tlabungah Bangladesh nen insumdawn tawinna a awm a.Chuan khulai Tlabung lam pawh kha an changkang riau a ni.Chutiang chuan Mizoram hun hmasaah chuan sumdawnna te a lokal tawh thin a.Amaherawhchu,kan kawtchhuah hi Vairengte lam anih deuh tak avang leh kan sumdawnna kawtchhuah a lo nih tak avangin hmar lampang hi an lo changkang chho zel a ni a.Khawvel thang zelah tiang hian sum leh paite pawh India ramah a lo thang chho a,hmasawinna a lo thang chho zel a.Aizawl bul Lengpuiah Airport te kan lo nei chho a,chu chu mi tam takin an lo tangkaipui chho ta a,Cachar kumbik ground-a sumdawnngte leh damlo te leh officialte thlawhna a thlawk chhuaka rawn tum haw leh thinte kha Lengpuiah te an tum ta a.Chuan awlsamna tam tak a awm thin a ni.Kumbing road a han tum chiah mai khuan mi tam tak chuan harsatna an tawh thin a.Taxi driver ten Aizawla hawna turin an duh tawh tawh an inchhiar mai a,chutiang chuan a tawngtute pawh kan lo ni ve a.Lunglei Airport,Tuirial Airfield-a Donier a tum lai khan seat 18 awmah khan mi 16 aia tam kha min phur tha duh si lova,mangang tak khan mipui kha an awm thin a ni.Chuang Lengpui Airport a han awm tak hnu khan awlsamna nasa tak kan lo nei ve ta a.Amaherawhchu, chhim lampang tan he Lengpui Airport hi a chhawr dan kawngah hian harsatna chi hrang hrang a awm a.Ticket booking chung changah te,thlawhna cancel chungchang leh riahna tur chungchangah te engngemaw harsatna a awm thin a ni.Chutiang chu thil tam tak a inkaihhnawih chho a,Lungleiah sawn chutiang ang chuan,Lunglei bul Saitlukah (nichinah khan move tu kha a sawisual hret niin ka hria a,Lunglei chhimchhak tih deuh zawk kha thlang tih zawk tur ti raw?Kha kha a nia,Lunglei chhimlama kal a thlang deuh hlek saw ani a)(Interruption : ka hre renga, ka correct duh lo anih kha!) sawlaih sawn Airport a awm chuanin mitam takin (khutak Tlabung lampang atanga rawn kalte tanah pawh) awlsamna a awmin ka ring a.Tin,saw lampang,Lawngtlai lam atang pawh sawn 60 Km awm vel lek (60/70 awm vel lek nithei tur a ni a).A harsa vak lova,Lawngtlai lam atangin zingkarah rawn kalta se,Saitlukah chuan awlsam takin thlawhna man mai theih turah a ngaih theih a,chutiang ang chuan awlsamna tam tak a siam sak dawn a.Nichinah khanin MLA zahawm tak khanin saw mi a chhim lehzuah kawtchhuah han ni chhote nena a in chu e kha,nge ni? A in man fuh dana kha,a rawn sawi tawh a,sawizel ngai pawn ka hre hranpa lem lova,a tha in ka hria a,a remchang kual vek vek mai a, chuvang chuanin helaia ‘Lunglei bul Saitluk hmuna thlawhna tum hmun siam turin sorkar laipuih nawr zuizel ni rawh se’, tih hi tha ka ti em em mai a,ka rawn thlawp ve a ni e,ka lawm e,Pu Speaker.

SPEAKER : Tunah Pu P.C Lalthanliana kan ko anga, a hnuah Pu R. Lalzirliana.

Pu P.C. LALTHANLIANA : Pu Speaker, ka lawm e. A hmasa berin he Resolution puluttu hi Saitluk Airport a hlawhtlin theihna tur NGO-a President anih laia nasa taka sul lo su tawh thintu he House-a puluttu ani thei hi ka lawmpui ani tih kha ka'n tarlang duh a. Tin, a pahnihnaah chuan Pu Speaker, he House a group Leader, kan member zahawm tak Pu Lalduhawma rampum party khat President-in a he Resolution chhimlam tana a thatna te a support thu he House a kan ngaithla kha chhimbial mipui ai chu ka awh em ka hre lova, chhimlam mipui aiawhin a chungah lawmthu ka'n sawi hmasa duh a ni. Chhim lam MLA te ka lo nih manah.

Pu Speaker, nakinah chuan Saitluk hi party thenkhat chuan kan hunlaia kan lo aim leh ruahman ani a te pawh an la ti duh maithei a. Chuvangin thil bul bal deuh han sawi tha in ka hria a. Lungleia Airport kan neih theihna tur atana hma min laksaktu leh sorkar anga kut min thlak hmasaktu ber chu Congress sorkar hmasa a kan Chief Minister, Pu Lal Thanhawla ani tih hi ka sawi duh a. A thu mai ni lovin 1998 inthlan neih hma khan Kawnzawl Airport atan sawn Preliminary Secrecy & Investigation tih nan Rs. 6,00,000/- min dahsak a ni, Mizoram budget-ah hian. Tichuan, khatihlai khan inthlan te alo ni a, kan tla zui ta a. D.C Chairman-na hnuaiah Committee te din a, Airport kha en tur ani a, mahse, kha sorkar thar lo piang khan engmah kum khat hnuah pawh ngaihtuahna a neih si loh avangin RTI hmangin he pawisa, Kawnzawl atana pawisa dah hi khawiahnge hman anih tih, a hminga party a hruaitu kan nihna angin ka zawt a. Chutah chuan Civil Aviation atang hian E.E-ah PWD-ah heti zat hi pek ani, cheque No. leh engkim nen min rawn hrilh a, a bak a hmanna kha waviinni thlengin kan zawt chhuak thei lova, chutiang taka congress sorkar hmasa waviinni a kan Chief Minister zahawm takin chhim biala Airport kan neih theihna tura sum nen lama bul min lo tan tawh chu, a thar siam chu sawi loh, hma pawh min lakpui duh lova. An ti thuanawp a ni tih he House-ah hian ka'n sawilang duh hrim hrim a. Tichuan, a reh vawng vawng a, keini au thin mahila, thu neihna kan nei lova. Inthlan a lo hnai a, 2008 kum velah daih Saitluk ram hi a tha zawk awm mange tih te sawi rik leh a lo ni ta a. Chutiang chuan Saitluk saw a lo ri chho ve ta a ni.

Pu Speaker, waviinah hian hemi chungchang kaihhnawih a ka'n sawi duh chu, waviina kan Chief Minister hi Zoram tana malsawm nana Pathianin a ruatna kawng hi, a fel vang leh that bik vang ni hauh lo hian Pathian hian ruatna tam tak a nei pawn ka hria a. A bik takin chhimbial lam tan phei chuan Thorang bialtu, Minister zahawm takin a sawi ang khan, asset puitling ka neih ang zawng zawng infrastructure ang chi saw chu Congress sorkarin min pek kha a ni. Kum sawm congress sorkar loh chhung khan kan group Leader, West-I bialtu zahawm tak Pu Lalduhawma sawi ang khan Lunglei hi ka hnungtawlh nasa em em a ni.

Talk Show-ah ka sawi a, BAFFACOS sum an han sem a. Ka tawng an huatthu suh ah Mamit District chu an population sing ruk leh tih vel an ni a. Keini zatve an nih lai khan nuai sawmriat an pe a, Lungleiah an let ka nih laiin nuai sawmriat kan nei a. Champhai District khi kan phak lohna tam tak a awm fo mai a ni. Chuvang chu em ni, tun 08' inthlanah heti tak mai a Lungleia record a bial pasarih a bial ruk, Congress party candidate te, kan fel bik vang

pawh ni lova chhimbial mipuiin min thlan tlin te hi ka ti rum rum a ni. Pu Speaker, kan sorkar hmasaah kha chuan, thil thar ro tling chhimlam atan sawn min siamsak lo mai ni lovin, a awm tawh sa kal tur pawh hi min tih chingpen sak a ni. Residential High School, Central-in a min pek ngawih ngawih, congress sorkar laia hma lo lak tawh pawh, cheng vaibelchhe khat, Aizawlah min divert sak a. 'Independence Day kan botcott dawn a ni' kan ti a, kawng kan zawh a. Independence Day boycott an hlau a, khawia mi nge anrawn phawrh, nuai sawmnga, khatih laia kan Speaker zahawm tak Pu R. Lalawia'n arawn keng pheih a. Kan boycott ta lova, kan sual chhuak leh hram a ni.

Tin, chutah Border Trade atana building sakna tur cheng vaibelchhe khat chuang Champhai lamah Zokhawtharah min divert sak leh a, a cheque No. nen lam Treasury atangin kan la chhuak a, 'hei hi a diklo a ni', kan ti a. Kawng kan zawha kan sual leh a, a tawp khawkah min transfer sak leh lo a. Chutah mau, Trade Centre kan tih vaibelchhe sawmpanga in sak tue a ni, Lungleiah, Champhaiah pawh an sa a, Kolasib-ah pawh an sa a ni. Mahse, Lungleiah chuan a entute an lokal a, Central atang te pawn an lokal a. Agriculture Complex, hmun hi a rem a ni. Vaibelchhe sawmpanga helai hmunah hian a invest theih a ni. A thla an la a, helai hmunah hian sak nise an ti a. NGO zawng zawng D.C in min ko khawm a, all political party min ko khawm baw a. 'Helai hi a tha ani', kan ti a. Amaherawhchu, Minister thenkhat leh chhimlam MLA thenkhat ten, a lenglo chung Saikuti Hall bulah, helai hian sak ni rawh se an ti a, a phenah eng nge tih tum an neih kan hre lo. 'Helai hi a ni tur a ni', tiin sorkarin a ti tlat a, anni lamin, 'vaibelchhe sawmpanga helai ramah hian a invest theih loh', an ti baw si a. Chhuanlamah, 'a hmunah in lungrual lo e mai', min ti a, min cancel sak leh a ni. Champhai ten an nei, Kolasib ten an nei. Lungleiin kan nei thei lova, a hmun leng rengah sorkar khan min tih sak duh lo a ni. Chutiang chuan kan sorkar kalta ah khan chhimbial mipui hian, Pu Speaker, lawmna tur kan nei lova lawm loh tur kan ngah khawp a ni.

Chuvangin, Pu Speaker, House-ah ngei, Mizorama rorelna sang ber maiah a thu mai a kan sawi thin te ni lova, Lunglei khaw bulah, 'khaw bul' an ti kher kher te hi a lawmawm ka ti a, Resolution neitu hian, Pu Speaker, Saitluk tih a mention lova. Khawzawlah pawh a remchang anga siam tum a ni ve tho a, ka bial a ni a. Khawbul a ti mai a, khawbulah chuan pakhat pawh a ti chuang lova. Pahnih pawh hi kan siam thei dawn a. Chu chu kan Chief Minister zahawm tak hovin kan en tawh a, Kawmzawl te pawh. Chuvangin, he Resolution hi he House-a kan han sawi hi Pu Speaker, zaninah News-ah te Lunglei khaw mipuite, chhimbial mupuiten an lo thlir ang a. 'Halleluiah' tih hi an pek ka ring a. Chutiang chu a nih avangin he Resolution hi pass ngei a thain ka hria a. A puluttu ka'n support a ni e. Ka lawm e.

S P E A K E R : Tunah Pu R. Lalzirliana. Chumi hnuah hun a awm chuan Pu Joseph Lalhimpua.

Pu R. LALZIRLIANA, MINISTER : Pu Speaker, ka lawm e. Vawiina kan private member resolution Pu S. Laldingliana, MLA, Parliamentary Secretary zahawm takin a a rawn putluh “Chhimbial mipuite harsatna su kiang tura Lunglei bula Airfield siam a nih theih nana hmalak a ni ta hi lawmawm ka ti a. Airfield hi siam thuai anih theih nan sorkar laipuih nawrzui zel ni rawh se”, a rawn tih hi hetia han chhiar mai chuan thain a lang mai a. Amaherawhchu, hei aia belhchian dawl deuh hian tih ni se tha ka ti khawp mai a. Chu chu ka la rawn sawi ang a. Chumi ka sawi hma chuan hei, Lengpui Airport, Kan Chief Minister zahawm tak Pu Lal Thanhawla, term hmasa lama an tih dawn khan khulaia piah Dialdawk hnarah khuan leilet ka nei a. Ka feh thin a. Kan bei ngawrh ve hle mai a, Aizawl atang hian kum li zet chu midang, vai leh midang ruai chhawng lovin lo kan zu nei a. Ka MLA ve lai te khan kan zu fehthin a. Kan hlim ve khawp mai a. Chunglaia bul an tan dawn khan engtingnge ni hetiang luikawr tam em em hi an tih ang aw, kan ti a, kawr atam a. Amaherawhchu Sorkar chak tak khan hma kha an la a, company reliable tak mai an han chah chhuaka tractor kha zozai han tlante kha kan feh kawngah te hian feh mangloh chang hi kan ngah khawp mai a, a hlimawma, en a manhla em em mai a, kan fate pawh kha ka hruaia Inrinni hi chuan, school an chawl bawka, ka hruai ve ziah a, an tractor ah te khan kan han chuanga thlate kan han la a a nuam ve khawp ani. Tunah hian in kan nau te, khatiang laia kal ve ngai lo, kan nauthe lo pawh putarte pawh kal sela khatiang khawp a tlang kawr ruam thuk tak a awm a ni tih an hriat ka ring tawh lova, heng kan han beihlai chho vel leh mi rin kan hlawnh lemloh dan te kan ngaihtuah khan Pathian hian min hruai nasa mang e aw kan sorkar hi Congress Pu Lal Thanhawla kaihruai sorkar hi Mizoram tan chuan Pathian in a hman dik tak hi a lo nih hi mawle tiin ka ngaihtuah a. Tunah pawh hian in Politician tha deuh leh ram hmangaih tak tak te chuan he Congress party ah hian Pathian thawkkhum party, Pathian kaih kuah party a nih hi mawle ka ti a, lo zuang lut tur hian ka sawm a ni. An ti fuh in ka ring tlat maia, a bul tan nan pawh a dik a, mite er avang te, corruption avangte, party din mai mai a ni ve hranpa lova, chu vangin a lo chhuahna pawh hi a dik em avangin vawiin niah kan MLA zahawm tak tak helama thu ni lo, ram hmangaihtu tak tak gentlemen ho te pawh hi, he lamah lo thu turin vawiin ni ah hian kan sawm duh a.

Tichuan kan Chief Minister hianin chhim lam hi a hmangaih lutuk em ni aw tih theih hian a awm deuh in ka hria, hmarlam hi kan ro lutuk deuh ang tih ka hlau khawp mai a. Chutiang anga tuna kan Chief Minister tum anga kan kal chhoh hi chuan road transport man a to si a. Helai Guwahati, Kolkatta vel atanga motor a rawn phurh chhoh nal nal a, sum dawn ai chuan, Kolkatta atang lawnga rawn phurh chhoh kha a phurhman a chanve chanve pawh a tling dawn si lova. Chuvang chuan saw lamah sawn kan miliante hi insawn zo vek mai ang tih te pawh hi ka hlau deuh rum rum a ni. Chutih lai chuan Pu Dinga te, Pu Mathana te ho te, saw lam mi ho an tam si a. Tawngthu chhe lo tunah hian kan MLA te hi an khi reng mai a nia, vawiin niah te chuan an ka hi va zen ila, min seh rawh pawh ti ila min seh duh reng rengin ka ringlo. Chutiang khawp chu an ni a. An hlim a ni.

Tichuanin, nichina kan sawi tak, a huam zim deuh em aw kan han tih a kha, tuna ka sawi ang khanin Zoram kawt chhuah tak zet zet hi a rawn ni dawn a. Tin Inland water transport atangin lawng lian pui pui a rawn kal ang a. Bungrua tlawm tak takin a rawn phur chho ang a. Chutiang ang anih laia chhim bial mipuite harsatna sukiang tur tih kha a dik lo hrim hrim mai a. Chhim bial harsatna hi hei hian a sukiang chauh dawn lo. Mizoram pumpui harsatna hi a sukiang dawn a. Hmar tawp, khithah Hmar thimpui kan tih lam te pawh hi an harsatna hi hei hian a rawn sukiang dawn a ni. Chuvangin, rem chu nise la, Pu Speaker, rem ti tih ve pheichuanin, helai a wording te hi han modify hlek a, han siam that theih mai, Mizoram tih hianin thlak ta ila, tichuanin, a lo awmdan tur a chu Mizoram mipuite harsatna sukiang tur a tih khan bul a rawn intan ang a. A dik em em zawk lehngal a. Chuvangin, vawiinni a kan vai a kan phurna chhan a pawh hi chhimbial chauh pawh ni lo, khawchhak bial chauh pawh ni lo, khawthlang bial pawh ni lo, Vairengte te pawhin a an chhawr ve zel tur, sawlam tui atanga an rawn phurh chhuah kha Kolkata atanga khawmuala an rawn phurh chhuah ai chuan khu laiah kuan a tlawm zawk em em tho dawn a ni. Vairengte te, Darlawnah te sawn. Chuvang chuan, kan vei a thatna tur atan a he Resolution lokal hi, a working a hi an fimkhur loh deuh hlek avangin, hemi Resolution neitu pawh hianin ui lutuk turah ka ngai lova. Mizoram hmasawna ngaihtuatu tak te zinga mi anih avangin, hetia han tih theih chu nise, Mizoram pumpui hi kan lawm leh zualin ka ring a ni.

West-I bialtu zahawm takina a Resolution kan lo pass sak tawh, 'hetiang hi thil vang tak a ni', a tih kha thil dik a ni a, ani ta anih vang hi nge ni, kan hmanhmawh zual deuh bik a, tunah hian kum khat ani chauh a a theih ang chin kha chu kan implement tawh a ni, home guard chungchangah hian, chutiang chu a ni a a lawmawm khawp mai a. Opposition hotupa ta anih vang hian kan hmanhmawh deuh bik nge ni, vawiinni ah hian kan ruling lam ami Pu S. Laldingliana, Parliament Secretary Resolution hi kan Home Minister zahawm tak hian inthlan leh hunah ka bial hi a tin zawn deuh vang niin ka hria. Kan siam pui che a kha kha a hint chu alo lang mai in ka ring a, sawm te pawh kan nei a ni. Heta tang hian mimal a sawm tumah kan neilo a, kan duh zawngte chu kan sawm che u a ni, khalam atang khan a hriat theih tawh mai ang chu. Chutiang chuan lungrual taka kan tih zel a, kumin chhung hi a ngai ve dawn tlat mai a, khatiang tluk lova kumin chhunga kan implement te pawh kha a ngai dawn mai awm mange aw! tih te pawh kan ngaihtuah a ni.

Chhimlam hi mithiam hmasa te lo chhuahna a ni a, Zoram kap engtu anni a, keini congress party pheichuan chhimlama kawl a en in hmarlamah hian atak alo lang thin a ni kan ti a, kan sorkar zia kan ti a, sawlama MLA kan ngah sawn kan sorkar zia nghe nghe a ni. Chuvangin kan tan chuan an hlu em em bik leh zual a ni, tih kha kan sawi duh a.

Chumi kan sawi rual chuan nichina kan Chief Minister thusawi kha ropui hi ka ti khawp mai a, Rural Development-ah te hian a changtupa hi hei mai hi ka ni a, mite tluklo ka nih avangin officer-te pawh hi a fel tak tak hi min pe the u tiin DP&AR Minister hi ka dil thin a ka dil ang hian min pe zel mai a. Chutianga a nih laia mahni budget plan budget pawh hmanng zo thin lo

Department nih kha a zahthlak khawp mai a, kan zak a ni, pawl kan ti khawp mai tih kha ka sawi duh a. Central Sponsored Scheme atanga lokal te phei chu ni selang chuanin a kum leh kha a effect mek dawn a. Thil pawl tak a ni. Chutiang anih rual chuan kan Minister zahawm tak Pu Zodintluanga Department chan te pawl hi nakum lokal leh turah khan kumina kan peksa pawl in hmanng zo si lova an ti palh ang tihte pawl kha a hlauhawm khawp mai a. Hetiang hi hei kan ni tawh si a tia lo inchhut ngen khum kan hlauh thin a nih chuan kan Chief Minister khan a sawi zo tawha sawi leh a ngai lova. Heng hi kan ram leh kan hnam tana kan inpekna tak tak vek a ni tih hi kan office te pawl hian an hriat a pawimawhin ka hria a.

Tin, a ulh zawnga han lak phei chuan heng hi tuna sorkar hian corruption hi nasa takin a dova, kan sorkar hnathawk a ti thinte pawl hi an lo awm anih chuan a vau a, a warning deuh reng a ni. A tul ang apiangin corruption practice te chungah hi chuanin kutthlak a duh lai hian chutiang anga mipuite hrem thleng bik turte miretheite hnen thleng tur te, a bika mipui mirethei rangva in nei ve zo lo te hnena rangva semna tur hetiang anga an awm ngat mai phei hi chu kan sorkara eng emaw chin ho hian kan thil tih tuh hi min tih hlauhchham sak an duh em ni tih te pawl hian ngaihtuahna a neih theihin ka hria Pu Speaker, rilru a ti na khawpin ka hria a ni.

Tin, ngaihthiam tur an neih ve chu kan sorkar hnathawk leh Finance lam te pawl hianin, October thla khan budget session kan nei chauh a ni. Vote on Account tum hnih lai kan ti a. Nidangah chuan a pangngai, tun anga Full Budget kan neih hunah chuan September/October velah hian kha budget lo chhuak a kha a hman theih tawh thin a. Mahsela, October-ah khanin hman theih turin kan passed a, thil kha a kal vel tan chauh a ni. Chu chu a harsa khawp mai a. Tin, pawisa a lo tam deuh hlek hi chuan DPAB, Department-in a an thut mai tur hi a lo theih lova. SPAB Chairman chu Chief Secretary a ni a, mi hmanlo vawr tawp a ni a, hman lo hman lo, ani reng a ni. Chuvangin hetiang thleng pawl hian mi hman lo tak mai, chhawr hlum hlauhawm khawpa file ngahte hi chu a chhawk zangkhai dan kawng a awm thei em? tih te pawl hi en a ngai a ngem aw tih te pawl ka rilru chuan a en rum rum a ni. Kha khanin heti khawpa corruption kan duh lova kan do tlan lai hian kan Minister te pawl hi kan ring ngam dawn lawm ni? Corruption chung changah eng emaw SPAB te Chairman an nih hian thil dik lo a awm ang e, tih hlauhna kan lo nei anih pawl in, heng hi chu in rin ngamna in kal ta ilang chuan a ziaawm thei deuh anga tih te pawl chu ka ngaihtuahna ah a lo awm a ni. Chuvang chuan kan Chief Minister uapna hnuaiyah hian a thlavang keini hauh rual ni lo mahselangin a tul anih chuanin, keini ho, opposition atang pawl hian a duh dan hi mipui duh dan, ram kal siam atan a tha a nih avangin keini ai hianin an thlawpna zawk thei in ka ring a, chulai chu kan sawi duh a.

Tin, mipui leh he House-ah pawl hianin khatiang budget hmanng zo ve hman lo Department kan nih kha a zahthlak ka ti a. In hriatthiam leh in mi ngaihdam te pawl kan dil nghal a ni. Ka lawm e.

S P E A K E R : Awle, han inkoh nan chuan hun a tlem deuh a, minute thum emaw kan nei a. Kan chawl rih ang a. Dar 2:00 PM-ah kan chhunzawm leh dawn nia.

Recess at 1:00 PM

2:00 PM

S P E A K E R : Tunah sawihona kan chhunzawm anga, pasarih in kan sawi tawh a, tunah Pu Joseph Lalhimpuia i lo sawm ang.

Pu JOSEPH LALHIMPUA : Pu Speaker, ka lawm e. Kan member zahawm tak Pu S. Laldingliana'n a Zoram leh chhimbial hmasawna tur atana Lunglei bula Airfield siam a nih theih nana hmalak mek hi lawmawm a tih thu Resolution siama a rawn putluh hi ka support a, support-na thu tawi te sawi ka duh a. Chumi rualin Pu Speaker, nichinah khan kan member zahawm tak Minister Pu P.C Lalthanliana khan chhimlama Airport siam tan a nih dan tawite in a sawi a. Kawmzawla Airfield siamna tur atana ruahman, khatih hun 1998 vel lai khan a tehna ah pawh khan ka hriat sual loh chuan kan Chief Minister zahawm tak, kan House Leader ni bawh hi a kalin ka hria a. A bak chu ka sawi chhunzawm tawh lo ang a.

Tin, tuna member tam berina kan sawi Lunglei bula Airport lian tak Saitluk tlanga awm tur hmalak mekna chungchanga sorkar hmasain a hma alo lak tawh tlem te han tarlan ka duh a. Tin, tun sorkarina hma a lak mek te leh Mizoram mipuite tana asset rotling ni tura tun sorkar kum khat leh thla nga leh chhunga a bik takin chhimbial tana hmalakna han awm te pawh hi rem i tih chuan tawi te sawilan ka duh a.

Pakhatnaah chuan Airport Survey Committee hi GAD-in kum 2006 March ni 17-ah khan Lunglei tan notification a chhuah a. Tichuan, hetia a chhuah veleh hian NGO hrang hrangten theih patawpin hma kan la a, hei hi D.C Chairman-na hnuai a ni a, Pu Speaker, hetah hian tlang en tur hmun thum, hmun li ah chhawp chhuah a ni a. Chungte chu Vanhne, Sazaikawn thlangdung te, tin, Thangpui tlangdung te, Mualcheng tlangdung te leh Chithar tlangdung te hi a tha awm mange tia chhawpchhuah a ni a. Chutia chhawpchhuah a nih mek lai chuan tuna kan sawi mek zinga pakhat Saitluk thangdung tih Thangpui tlangdunga awm Thangpui leh Thangte inkar vela awm hi tha ber te zinga mitthla a hmuh theih a ni a. Chutih lei chuan Tuirial leh hmun hrang hranga harsatna awm mek angin Pu Speaker, 17th March, 2006 a he airport survey committee dina hmalak tan hi 21st August, 2006-ah chuan Lunglei bulah chuan Airport siam tumna a awm a ni tih leh zawn mek, survey committee te pawh din a ni tih mipuiin kan lo hriat hmian khatih hunlai 2006 a kan sorkar a mi thiltitheh tak tak mi 21 chuan ram an lo dil a. Chu chu 21st August, 2006-ah a ni. Aizawla khatih laia party hruaitu

lian tak tak te pawh kha an tel a. A tithuanawp leh ang tih pawh a hlauhawm khawp mai.

Amaherawhchu, NGO te, chhimbial mipui thahnemngaihna avangin D.C in 21st August-ah chuan ram an dil a, ni 25-ah helai tlangdungah hian Airport pawh siam mai theih a ni a. Chuvangin eng pass mah pek loh tur a ni an ti a. Tichuan, mipuiin NGO Co-ordination te dinin chak takin hma an la a. Helaia ram dil te hi withdraw turin an ngen a. An in withdraw theilo anih chuan mipuiin kan hmachhawn ang kan ti a. Pu Speaker, an in withdraw leh ta a. Ka'n han sawilan duh chu sorkar hmasa hunlaia hmalaknaah khan nimirah tawite ka sawi a. Hemi ram dilte an awm avang khan surveyor pakhat Lungleia Revenue Department ami, helai tlangdung velah hian a kal a. Chumi bak chu a hmuna kal pakhatmah an awm lo a ni tih hi vawinah he House zahawm takah hian ka sawi duh a.

Tin, chutih mek lai chuan hetiang project lian tak ruahmanna engemaw awm tan anih avangin dan panggaite in kan ti dawn nge ni, compensation beiseiin Aizawla khatih laia party hruaitu lian tak tak te mi 21 in ram an dil hman a ni tih pawh hi he House zahawm takah hian ka sawi duh a ni. Chu chu kum 2006 a ni, Tuirial ami ang kha a piang tep a ni. Chhimbial amite manganna avangin hlauh pawh nei lovin thahnemngaihna leh tanrualna avangin hengte hi kan withdraw tir a ni tih kha ka sawi duh a. Tin, tun sorkar hum khat leh a chanve kan Chief Minister kaihhruai sorkarah hian hemi chungchanga hmalakna tawi te tarlan ka duh a Kawmzawl khawchhung chu ka sawi nawn tawh lo ang a.

Kum 2008-ah sorkarna December thla ah siam a ni a. Chutah chuan kan Chief Minister zahawm takin nakinah a la sawi tho turah ngai ta ila. Lunglei bula Airport lian tak siam a nih theih nan Union Finance Minister hnenah ziakin a thlen tawh a. Hemi atana pawisa ngaihtuah turin a thlen a. Finance Minister Pu Pranab Mukherji pawhin a tul anga ngaihtuah tur tha pawh ziakin a rawn chhang tawh a. Tin, 13th Finance Commission ah khan hemi atan hian vaibelchhe 250 Central sorkarah dilna siam a ni a. Amaherawhchu, kan House Leader zahawm tak, kan Chief Minister ni bawkina a sawi angin, a hmunah pawh la kal loh concept paper tak ngial pawh la awm lo anih vangin Finance Commission tan chuan pek ngaihna a la awm lova. Chuti chungin Planning Commission-ah te pawh siam puitlinna atan pawisa dil leh a ni a. Tin, Pu Speaker, chubakah chuan kan Chief Minister zahawm tak hi a chhuanawm khawp mai a. Thil tha duh mi a ni tih alang chiang in ka hria a. Hei, Foreign Country Czechoslovakia Republic-a an Deputy Foreign Minister lo zin te pawh hmu in hemi chungchang ah hian ziak pawhin a thlen a. Tin, ka hriatsual loh chuan Czechoslovakia Republic sorkar pawh hian India sorkar nen Economic relation tha an neih theihna tur atan India rama project pathum kalpui tura an inruahman zingah helaia Airport siam puitlin te pawh hi a tel bawk a ni. Tin, Airport Authority of India atangin Engineer hotu ber ber te an lokal a. Kan Chief Minister hovin Area Survey thlawhnain neih a ni a. Tin, a hmunah kal tumin he resolution pawimawh tak mai lo puluttu member zahawm tak mai Pu Zodintluanga te nen kan Chief Minister ruahmanna in Lunglei lamah an kal a. Nichina sawi ang khan kawng a tlang loh avangin

kan kal thei lova, a lanchian theihna ber awm Lawngtlai kawng atang te pawhin uluk taka en a ni a. Bungmun 'S' atangin chiang zawkin thlir a ni a. Chumai bakah chuan sum leh pai hmuh theihna turin nasa takin a bei zui a. Delhi atangte, Airport Authority of India atangte pawhin hemi atan hian nasa takin ruahmanna an siam a, tan an la a ni.

Tun sorkar kum khat leh a chanve chhunga kan Chief Minister zahawm takin Airport kan neih theihna tur atana hma a lak hi a ropui hlein ka hria a, Pu Speaker. Engtik hunah emaw chuan a lo puitling leh ang tih ka beisei a. Chumi a puitlin hunah chuan tute emaw chuan kan sorkar laia kan tih puitlin a ni an ti leh ang tih ka hlau a. An sorkar laia an sorkar bul tan dan chu compensation bill avangin mi 20 aia tamin ram an nei a ni tih kha he House zahawm takah hian ka sawi a ni.

Pu Speaker, ka han tarlan leh duh chu nichinah khan Thorang bialtu zahawm tak, kan Minister Pu Zodintluanga khan a sawi tawh a. A bik takin chhim bial lama hmasawna ruhrel concept awm deuh thaw saw kan Chief Minister zahawm tak Pu Lal Thanhawla sorkar laia a din a ni, tih ka sawi tawh a ka sawi nawn lovanga. Vawiina ka'n sawi duh chu tun sorkar kum khat leh a chanve chhung leka chhimlama sorkarin hma a lakna Pu Speaker, i remtihna in tarlan ka duh a, chung zingah chuan Convention Centre vaibelchhe sawmhni man vel Central sokarin min rawn pawmpui tawh ani tih kan hria a. Tin, sorkar hnathawk te awmna turin Government Complex tunah hian DoNER Ministry ah theh luh mek a ni a.

Tin, Lunglei khawchhung khaw chanve velin tui hniang hnar kan neih theihna turin Lunglei Greater Water Supply Phase-II DoNER Ministry in min pawmpui tawh a, DPR nikum lamah thawnthlak ani tawh a. Tin, Lunglei khawpui chhung lut lova motor lian awlsam taka khawpui thang zel ah a kal theihna turin, Lunglei by-pass vaibelchhe sawmthum pahni man a siam tur chu DoNER Ministry ah thlen thlak tawh a ni a. Tin, tunah hian a survey-na tur pawh min pe tawh ani tih he House zahawm takah hian ka sawi duh a.

Tin, Darzokai, South Vanlaiphai tlang dung zawng zawng in a an mahni khaw panna tur Tuipui kalkan ngai thin, tunah hian Suspension Bridge siam turin vaibelchhe sawmthum dawn lai DoNER Ministry ah thawn thlak ani tawh bawk a. Tin, Tlabung Border Trade a hmasawna tur tuna kan neih mek te hi vawiin ah hian kan hre vekin ka ring a.

Tin, Pu Speaker, Serkawna nurse zirlai te an awmna turin vaibelchhe 2.5 man tunah hian DPR siam mek ani a, hei pawh hi Prime Minister in kan M.P te kaltlanga Special Schemes an rawn tih atanga ruahman sak tawh a ni a. Tin, kan hriat angin HDC pawh a sorkar hmasak a din kha, tunah chuan Budget hran neiin cheng vaibelchhe ruk budget pe in ati lian mek bawk a. Tin, hmanni a ka sawi ang khan kan Chief Minister zahawm takin April thla remchangah kan la kal dawn nia a ti a. Lunglei khawpui chhunga veng mal bik Hall lian ber tur Chanmari vengah a awlsam zawngin Hall chhungah mihring 800 dawnlai lentheihna leh Badminton pawh a ruala court pathum khelh theihna tur lung

pawh min phumsak dawn a, a bul tan nan hian tunah hian Rs. 5,00,000/- min pe tawh bawk a ni.

Pu Speaker, vawiiinah hian ka'n sawi duh chu, sorkar hmasa khan an sorkar hmasak chhungin chhimbial tana ro tling tur asset zawng zawng deuh thaw hi kan Chief Minister in a lo din leh a siam a ni a. Airfield kan sawi pawh hi, kum khat leh a chanve chhunga a hmalakna hi nasa tak a ni. Hemi bakah hian kum khat leh a chanve chhungin mipui hmasawna tur atana assets, tuna kan han tarlan ringawt pawh hi a ropui em em a ni.

Chuvangin he Resolution pawimawh tak mai rawn support pawh hian kan ram mipuite hian chhimbial mai nilovin, kan hriat angin Mizoram hmun hrang hranga power supply tha kan neih theihna tur atan te, inkal pawhna tha kan neih theihna tur atan te a kan asset zawng zawng tih theih hi kan Chief Minister zahawm tak Pu Lal Thanhawla kaihhruai sorkarina min pek thin kha a ni a. Vawiiinah pawh hian min pe leh thei tura sorkarna nghet tak mai a siam hi kan lawm em em a. He Resolution support pah hian kan Chief Minister hnenah pawh hian lawmthu ka han sawi a ni. Pu Speaker, ka lawm e.

SPEAKER : Pu Lalthansanga kan ko anga, a hnuah Pu Nirupam Chakma. Mahsela, (ri bengchheng) ruah hian rilru a tibuai khawp mai. Hetiang ang hi chu session-na tlak loh Hall a ni tlat mai. Ruah sur laiin session-na tlak loh a ni tlat. Chuvangin ngaihtuahna thara ruah sur lai pawha session-na tlak Hall-a modify a ngai a ni.

Pu LALTHANSANGA : Pu Speaker, ka lawm e. Ring deuha sawi mai kan tum anga. Hei, kan resolution hi a puluttu khan a rawn move thiam ang reng hle mai a. Amaherawhchu, keini chhimbial han tih reng mai hi, a rilru hi a chhimbial rilru ang zawnga ngaihtuahna awm thin hi a tha lo hle in ka hria a, hei P.C te hi kan lo sorkar ve tawh thin a, P.C sorkarin a kan hmalakna tam tak te pawh hi a awm ve thin a, khatih hunlai kha chuan District pathum angin a awm a, chu District pathumah chuan District fund hi 50%, 30%, 20% angin kan ti a. Autonomous District Council angin kan ti a, Autonomous District Council chuanin fund kha a hnan a an neih avangin buaina a awm lo ani. Chutiang ang chuanin Department hrang hrang nisela Power te P.H.E te pawh Department P.W.D hnuai a awm thin te kha Department puitlingah kaisan tir an ni a. Tin, Saikuti Hall te pawh saw a hming han phuahtu tak hi chu Pu K. Lalsanga a ni a, ani pawh hian Buarpui MLA anih lai khan alo pulut tawh a ni. Chutiang chuanin Khawiva Mini Hydrel Project te pawh saw P.C sorkar laia kan tih kha a ni, a chhimbial zawnga in han sawilai khanin chhimbialah hianin vuina tur bik a awm em ni aw ka ti deuh a. Serlui 'A' Hydrel Project kha P.C Ministry khanin a ti deuh mai ani a, chuvang chuanin khami hlawhtlinna kha a kal zela, tin Government High School tuna Leitlangpui High School saw P.C hunlaia kan tih kha ani a. Chutiang chuanin Lunglei Polytechnic Training Centre te pawh saw hnim loh kawm te pawh saw P.C sorkarlaia tih ani a, sawtiang te pawh saw tih ani a, sawtiang te pawh saw P.C sorkar lai kha chuanin Engineering College

atana dah ani a, tin, Lunglei Water Supply Scheme te pawh saw P.C sorkar laia tih ani a, Pu Speaker, hetilai chin hi chu in hriat vek ka ring, hetiang ang Master Plan awm lai hi, chutiang ang tak chuanin kan lo ti a.

Tin, niminah te pawh khanin hei kan High Power Vice Chairman hianin Ringroad te kha a file kha a hmu zo lova. Lunglei Ring-road saw Sazaikawn atanga tan in, saw sawn a vet chho zel a, hetah a lo kal anga, Three gate-ah, Tlabungah Sazaikawn bawka fin leh tur kha a ni. A kalkawng hi a tam hle mai a. Raahsiveng, Venghnuai, College Veng, Bazar, Kikawn, Pukpui, Zotlang, Zohnuai, Electric Veng ah, chutiang chuan Master Plan te a lo siam a. Vawiin ah chuan saw NREG kan tih, hming lar em em mai, a thenin ni za inhlawhna, job card kan tih ang chi ah sawn khami ring road a kha an lai nual a ni.

Chutiang tak chuan Lunglei ah hian keini pawhin kan sorkar laiin hma kan la thin a. Kan hunlai hi sawi nuam kan ti ang reng a. Tin, abikin Airport ah phei hi chuan tuna Saitluk leh Kawmzawl leh Lengpui Airport hi survey rual vek a ni. Chutiang chuan P.C sorkar khan survey rualin (Speaker : Lunglei kawngpui te pawh saw P.C sorkar laia zauh deuh vek kha ani lawm ni?) Ni e, a dik reng. Chutiang chuan Airport pawh chu Lengpui, Saitluk leh Kawmzawl te pawh hi survey vek a ni a. Tunah hian Lengpui hi a hlawhtling ta a ni. Lengpui Airport survey a han nih tak tak lai phei kha chuan tute emaw mithenkhat phei chuan milian nuamtawl na mai mai tur te pawh kha, opposition nih lai phei kha chuan kan awm ve bawk thin a ni a. Chutiang bawkin tute emaw chuan, 'Choak bak a tum lovang', an ti a. Vawiin ah chuan challenge kan insiamna a ni a; A lo hlawhtling ta a, a lawmawm khawpin ka hria a.

Tin, P.C Party tih ang hian Saitluk te chu 'a rana ran a lo' tiin, chutiang khawp chuan kan Chief minister zahawm tak kan House Leader ni bawk khanin khatiang khan a rawn comment a. Chumi rual chuan ka rawt duh chu Lengpui Airport ti tura hma han lak chhoh a, khatiang survey te han tih te khan, chumi tih rual chuanin Tuirial Airport te khu siam a ni. Hetilai ah pawh hian Airfield an tia, Airport leh Airfield hi khawinge maw ni a resolution an move na laiah pawh hian Airport ni awm tak a ni a. Kawmzawl te saw Thlawhna te deuh te han tum theihna tur atan han tih lai lawk interim relief atan hman theih te nise, chutianga siam theih chu nise, chumi hnuah chuan Saitluk te hi chu Air condition han en pawh hian International Airport a tana hman theih tur hial anih ka ring?.

Mithiam ten an han en naah phei chuan Saitluk saw a Air condition pawh International Airport atana itawm khawp a ni a, chutiang ang taka sawtilai hmun te pawh saw rem a ni a. Hun kal zel tur atan te pawh a tha hle in ka hria a. Khatia a chhimbial, keini chhimho han tihna thinlung han awm thin kha chu paihin, tunah chuan Zarkawt pa in ro a rel a, a fel deuh duakah te pawh ngai ta ila. A bik kha a awm lova, Champhai te, Mamit te an lo er thin a tih te kha kan LAD Minister zahawm tak te khan a rawn sawi a. Vawiin ah chuan tutan pawh rilru zau tak pu in kan thenawmpa, kan hotupa ber hian ro a rel a ni tih kha kan sawi duh a. Chuvang chuan len thlak te pawh rual viau turah ngai ila.

Aman a sawi a, Pathian khawngaihna a zarah engmah mamawh te a nei lova. Zoram tan a rilru a pek a sawi kha a lawmawm ka ti a. Chuvang chuan kan thilung hi zau takin awm sela, a bik, a bil tih ang zawnga kan sawifo hianin keimahni hnam unity hi a tibuai thin a. Chuvang chuan vawiin ah hian kan unity-a hi tha leh zuala kan build hi a ngai tak meuh meuh a. Hmasawna in minrawn chimna tur hrang hrang te kha an han sawi a. Chu hmasawna in minrawn chimna tur hrang hrang ah te chuan engnge ni lo thleng dawn? China ral hi lo lian ta se, chutiang ah chuan hnam inlungual kan nih si loh chuan min then darh ang a, keimahni leh keimahni ah pawh buaina kan nei ang a. Tichuan, duh lam leh duh loh lam te kan nei ang a. Plebiscite lak ngai khawp hian kan awm mai ang tih a hlauhawm a. Chuvangin hetiang ang vawiina resolution kan han putluh zawng zawng pawh hi Mizoram tan, Mizo hnam tan, he rama chengte tan ani ti zawnga thilung kan put a, hmasawna lokal thin te, Silchar tlangdung atanga lokal ringawt pawh, chhimlam atang te in hmasawna te pawh, thil chi hrang hrang hi arawn in hawng ve dawn aniang e. Chu chu Pathianin he Mizofate min lo ruatna leh min kaihhruaina vang zawka hetiang te pawh hirawn piang chho aniang e ti te in, chutiang zawng chuan rilru te kan neih a tul tak meuh meuh in ka hria a. Chuvang chuan he resolution hi a tha a. Kan Resolution te chu min han pass pui lo mah ula tih tho in tum avang khan he resolution Pu S. Laldingliana resolution hi a tha a. Chak taka tih nise, choak aia lian kha tum hram se tih kha kan ti bawk a. Kawmzawlah saw chuan chawng zawng tal hi tum phawt rawh se kan ti ani. Chu chu ka support tih kha kan sawi ani e. Ka lawm e.

S P E A K E R : Tunah chuan Pu Nirupam Chakma chumi dawtah Pu. K. Liantlinga. Chumi dawt leh ah Pu B. Lalthlengliana.

Pu NIRUPAM CHAKMA : Pu Speaker, ka lawm e. Pu S. Laldingliana resolution, 'chhimbial mipuite harsatna sukiang tura Lunglei bulah Airfield siam anih theihnana hmalak a ni ta hi lawmawm kan ti a. Airfield hi siam thuai anih theihnansorkar laipuih nawrzui zel ni rawh se', tih hi ka support duh a ni. Pu Speaker, Airfield sawi takah thildang kan sawitam a, achievement inchuh te, bultumtu inchuhte tipuitling theitu inchuhte kan sawi tamin ka hria. Keipawh ka sawi ve teh ang. Mizoram political party zawng zawngah Pu Speaker, lo ngaihtuah chiangtu, kan member zahawm tak khan political party hrang hrang Mizoramah MNF te, PC te, ZNP te, Congress te kan thawk vek ani a. Amaherawhchu, congress tluka achievement nei an awmlo a ni. Congress hi Mizoramah mai nilovin India ram pumpuih Central-ah te kan sorkar ve a ni a. Chuvang chuan India ramahte pawh a rei ber sorkar chu congress a ni. Kan Congress a hruaituten District Council min pe a, Congress-in UT min pe a, Congress-in State Hood min pe a, kan hre vek a ni lawm ni. LAI te, MARA te, District Council min pe a, Congress bawk, hei aiin Mizoram mipuite tan party pakhatin thil tih sak ropui a awm em? Chuvang chuan sawi sawi mahila congress party aia chak, party thil ti tha a awmlo a ni tih kha a bul tan nan ka sawi duh a ni. Pu Speaker.

Tin, hei Airport chungchangah kan hre vek a, kan Chief Minister duhsaknain keipawh Minister-ah hun hmasa khan ka awm tawh a. Lengpui Airport bul tana tura ruahmanna tak tak siam tur hian kan Chief Minister zahawm tak Pu Lal Thanhawla hian 16.8.1990-ah te 11.3.1991-ah te Ministry of Civil Aviation leh NEC-ah te ngei pawh amah hian lehkha a lo ziak tawh a. Hei, New Airport at Lengpui tih kha pamphlet PWD-in a siam Secretary-in a chhuah khatihlai khan, chumi document chu i phalnain tlem tarlan ka duh a. Hemi lehkhaha a zuk ngen angin March 1991, kar tawp lamah chuan mithiam an rawn tir ta a. Mahse, chutihlai chuan a hmun pan nan kawng mumal a awm loh avangin a hmun thleng lo in an kir leh ta a. Tichuan, 29-31.9.1991 inkarah an lokal leh a, hemi tum hian National Airport Authority a hotute leh Mizoram Government hotute leh Border Road Organisation hovin an kal a. He Inspection neih tum hian tunhmaa PC Ministry laia Airport hman tur a lo ruahmanna sa kha en ho a ni a. Hemi hnu in a ram chhengchhe lutuk te leh kawrte leh tui te thuk tak tak avangte leh hmunhna zawl tak hmun a awm theih dawn loh avangin tha lovin National Airport Authority mithiamte chuan an ngai a. Mahse, hemi chung hian tuna Airport awmna tur hmun hi lei nghal ani a. Tlawng lui atanga chhim lamah chu chu atira ruahmanna, chhimlam 4 Km/5 Km velah sawn a ni a, a bak chu ka sawi lovang. Rengchal chu hmanah PC sorkarah pawh a awm a, mahse, khami hmun kha an ti lo a ni. Chuvangin, tuna mi chu Congress kutchhuak liau liau a ni. Officer tamtak Department tam tak kan chanchinbu mite nen Lengpui atangin 8 Km/ 9 Km ramhnuaiyah kan kal ani a hmunah PC sorkarin a ruahman kha kan en a ni, hemi team lokal hma hian. Mahse, khami kha an ti lova ni. Tuna mi hi chu Congress sorkar ruahman liau liau ani a, tuman an sawibuai theilo.

Pu Speaker, pahnihnaah chuan Airport siam chungchangah hian kan Chief Minister zahawm tak enkawl Department ka puilh laiin 20.12.1995 he ni hi Mizoram tan chhinchhiah tlak ani a, mi tam takin an theihngihlh tawh a 20.12.1995 khan Minister of State i.e PWD etc. Pu N.P Chakma chuan ni 20.12.1995 khan bawngtuthlawh la in lei a chek tan a, a puang a ni, chuvangin Airport tur lai hmasaber tu ka ni. Tukin zinga ka tlai nachhan pawh hei hi ania ka zawng ka zawnga ka sawidawn avangin he document hi PWD ah hmuh tur kha a awm ang a foundation stone laid tak tak kha ani hemi ni hian. Kan Chief Minister zahawm tak a awm a, amaherawhchu, party engemaw thilah a buai avangin, 'nangmah kal zawk rawh', a ti a chu chu ka kal chhan chu a ni a. Chuvang chuan Saitluk-ah emaw hmundangah emaw kan tih dawn chuan min sawm ve zela.

Tin, Lunglei Airport siam hna hi kan hre vek a kum hnih leh thla hnih a duh a ni. Airport siam chungchangah fundamental issue pakhat siam ka duh a- Pakhatnaah chuan, Airport khawiah pawh Lunglei-ah pawh, Champhai-ah pawh hmundangah pawh kan siam duh anih chuan state sorkarin tih tur responsibility tam tak a awm thei a, chu chu keimahni tih tur a ni a. Ahmasa berah chuan ram te a mamawh a. Policy on Airport Infrastructure nizanah Internet atangin ka download a ni. Airport Authority website atangin, chutah chuan India sorkar policy on Airport Infrastructure pheik 13 vel a awm a, chung zinga 92 chu Airport Authority in a enkawl a ni a. 28 chu Civil leh Defence Airfield te a ni

tih an tarlang bawk a ni. A dang chu hman theih loh, engmah nilo pawh tam tak a awm a ni. Airport awmsa enkawl dan leh a thar siam dan tur te, financing of airport infrastructure tih te, ownership of management tih te, role of central and state government tih te, a policy a awm vek a ni. A dang chu ka sawi lovang, State Government mawhphurhna tlem tarlang ila “ State Government will deal with the following aspect” tiin a ziak a. Acquisition of private land and allotment of Government land, supply of water, power and provision of sanitation and sewerage services, provision of surface access through multi modal linkage, prevention of environmental pollution, maintenance of Law and Order, protection of airport from encroachment and vandalism tih te a ni a.

Incase Government land is allotted by State Government for an airport owned by a private party, it may be made available at the same rate as change from ather beneficial industries. Tin, airport tu tu nge nei thei- Central Government, State Government, Public Sector Unit, individual te pawn an nei thei a, engmah restriction a awm lo a ni.

Tunah India sorkarin an tum ber chu private, public private partnership hmangin nasa takin hmalak an tum a ni. Chuvang chuan airport kan siam duh a nih chuan, fundamental issue te address a ngai ang a. Lunglei ah pawh Saitluk lam chu ka la hmu chiahlo na in, kalkawng atangin ka thlir ve a, tha chu ka ti a, Chawngte pawh a hnai dawn khawp mai a, hmundang chu sawi loh. Chuvang chuan tun atangin kha ram kha, free land ah kan siam angai. Kan tih duh takzet a nih chuan preliminary survey neiin, hemi preliminary survey ti tur hian kan Department te consultant dang rawih a ngai lo ang. Kan PWD te hian an ti thei zawk ang. Chuvang chuan Preliminary survey neiin, kha mi kha airport siamtheih a nih chuan, a remchang a nih chuan kan acquire vat a ngai ang. Chutilo chuan Mizoramah hei, kan hre veka, Bairabi te, tuna Tuirial te, National Highway te, kan buai zia chu kan hre veka. Wherever there is deep project, immediate attention of scheme goes for acquisition of land, owning a land for the sake of compensation.

Chutiang a nih chuan engmah a ni lovang. Chuvangin Champhaiah emaw hmundangah emaw ram hi neih hmasak loh chuan nakinah airport emaw thildang siam turah pawh problem tam tak face a ngai ang. Chuvang chuan, Pu Speaker, hemi resolution thlawp rualin rawtna thenkhat ka siam duh chu land chungchangah fimkhur a ngai a. A rang thei ang bera land chu Government kutah a awm a ngai. Tin, encroach theih loh nan policy dang siam ila, tih tak tak a ngai a ni. Kalkawngte pawh kan siam a ngai ang a. Chu pawh chu PWD te hian ngaihtuah sela. Tin, power kan neih dan tur te, a bul tumtu chu keimahni a ni. For any kind of profit, German mi Mizoramah a rawn zin ve a, a haw hmian min rawn hmu a. “Engnge kan State hi i hmuhdan? Chawngteah te pawh i kal a, engnge i ngaihdan han sawi teh” ka ti a. “In ram chu a tha a ram leilung pawh a tha a, mi tam tak ka rawn kawm tawh a, thil duh pawh an nei, chu chu a hmasa berah sum a ni, sum chanchin ber a ni an sawi” a ti a. I cannot express properly in Mizo, therefore, i will explain this matter in English. He said that your land is very good, the people are also very good. They want to do many things. But, they talk of money first. ‘Pawisa atangin in tan a’ a ti a. If we are going to do anything, lets have the project first so that we can show to the

people that we can get investment and that we can get grant-in-aid. Tunah preliminary survey atangin visibility a awm a ngai a, chutah chuan hma a lak theih ang. Pu Speaker, I whole heartedly support this resolution but at the same time I would like to request all concern to please commit yourself, do your job, a bik takin P.W.D, Civil Aviation ten hmala-in, P.W.D ten a rang thei ang bera preliminary survey siam a visibility report pakhat siam in hmala rawh se tih hi ka sawi duh a ni. Thildang sawi tur tam tak a awm mahse, tul hle mahse sawi tawh lo mai ila.

Khawvel hmun hrang hrang kal theihna te, Kolkata pawh Chawngte atangin darkar li lek ah kan thleng thei dawn a, hemi ah hian ti tawp mai ang. Pu Speaker, ka sawilo thei silo a, Mampui hi Lawngtlai Districtah a awm a, sawi hmasak pawl kha a ni a. Champhai pawh a tel lo, chuvang chuan Mampui pawh hlamchhiah lovin hmala ila tih hi ka sawi duh a ni, ka lawm e.

Pu K. LIANTLINGA : Pu Speaker, ka lawm e. Hei, vawiinni ah hian Pu S. Laldingiana, member zahawm takin resolution a put luh chungchang hi han sawi ve ka'n duh a. A thu-ah hian, 'Chhimbial mipuite harsatna sukiang tura Lunglei bul a Airfield sawi anih theih nana hmalak a ni ta hi lawmawm kan ti a. Airfield hi siam thuai anih theih nan sorkar laipuih nawr zui zel ni rawh se', tih a ni a. A thu hi siamthat deuh hlek a ngaiin ka ring a. Mizoram hmasawna tura Lunglei bul a airport tih ni sela. Helaiyah pawh hianin kal chho thei sela a tha awm mange aw! tih rilru ah a awm a. A rawn move tu pawh khan a rawn sawinaah khan airfield tiin a rawn sawi miah lo mai a. Airport ti khan a rawn move ngar ngar mai a. Chuvang chuanin, Airfield kha chu kan ngaihnanah pawh hian a te deuh lo maw. Airport tih hi thenkhat phei chuanin Intenational Airport thleng pawhin ni thei sela tih kha a nih avang khan, a thu a hi uluk deuh hlek zawka siamthat chu ni sela tih rilru ah chuan a awm deuh a.

Tin, chhimbial han tih lai hi han sawi ka duh deuh a. Hrang lutuk leh engemaw deuh hleka complex nei ang lek lek zawnga ngaih theih te pawh niin ka hria. Kan khaw chhuak kan tih te, khaw chhuak Association kan in tih te pawh hi Aizawl mi lo deuh awm mange aw! Mizoram hi kan ta a ni tih hi kan chian a ngaiin ka hria. Khawilamah pawh ni sela, Development kal chho leh ruahmanna chho reng rengah hianin keimahni rilru lampang ngaihtuahna atang te hianin kan in dah hrang thei tlat mai a. Chuvang chuan a neitu kan ni a. Kan ta a ni. Mizoram khawi kip pawh hi kan ta a ni tihna rilru neiin, Development kal dan a te hi hmasawna a kal a, Khawpuih te, kan state capital ah te a lo thleng hmasa a, a dawt leh a lokal a, khatiang khanin hmasawna te hi kal chho thei anih avangin, khatiang ang khanin mahni area rilru lampang kha kan pu mai ang tih a hlauhawmin ka hria a, tuna kan rorelnaah pawh hian chhim lampang chhuak hi sawm pahnih vel zet MLA awmin ka hria. Tin, nu leh pa atang phei chuan chhim lampang chhuak hi kan tam a ni. (Speaker : Nang i pu te atang chuan chhim lam chhuak tho in ni lawm ni?) Keini te pawh hi kum zahnih kal ta kha chuanin Lunglei lama awm kan ni a. Ka pu leh te phei chu Kristian hmasa te, Lunglei lam hi a in tanna a ni fo va.

Tuna kan thlirna ah hi chuan Mizoramah hian Chief Minister panga kan nei tawh a ni, pahnih chu Lunglei lampang chhuak anni a, pahnih chu Aizawl lam ti ta ila tuna kan House Leader leh Pu Ch. Chhunga kha anni a. A origin tak pheih chu Lunglei lama la ni ta tho a ni, pakhat erawh chu khawchhak lampang chhuakah ngai thung ila, sorkar hmasa a mi kha, ram neitu kan nihna lai theuh atangin kan in dah hrang lutuk ang tih ka hlau va, chuvangin chhim bial mipuite hi an harsa bik ani lova. Khawthlang ram western area te pheih chu an harsa em em a ni, tin, chhak lampang te pawh anni. Chuvangin hetah hian thil kan tih reng reng hi Zoram tan a ni ti zawng khan ka in fuih duh pah bawk a, nakin zel a thil kan ngaihtuah dan tur ah pawh kan ram tan, Zoram tan a ni tih lai kha kan sawi duh a ni.

Tin, kan Chief Minister, kan House Leader hi Chief Minister te ani rei tawh a, a hunlai a thil tih pawh a tam a, airport te pawh kha 1993-ah ka la hriat reng chu a bial campaign-na ah khan an zawt a, 'airport in mamawh lo, a chuan man pawh in nei lo, bus chuan man pawh in nei lo, in mamawh lo ve', a ti a. Mahse, mipuiin in duh anih chuan hma kan la a nga, theih patawpin airport kan siam ang tiin Lengpui airport te pawh kha 1994 a hmalak chhoh kha a ni a, a lawmawm hle a ni.

Tin, airport chungchangah hi chuanin P.C sorkar te pawh khan an lo thlir an lo thlir tawh a. Tin, MNF sorkar te pawh khan an thlir an thlir a. Congress sorkar pawh khan a thlir tho a, a hun laia siam a ni te pawh kha a vanneihna laiah te pawh ngai ta ila. Development kal ina a hrut a ni lova, khawvel ram thang zelina a rawn hnuhchhuah a ni a. Tunah pawh 1991-a India ram sorkarina privatization te an declare khan Man Mohan Singh-a te, Narasimha Rao ten an lo ruahman kha, khata tang khan a kal chho zela US Senator leh mithiam te chuanin India ram hi tun atanga kum sawmthum ah chuan ram hausaa a lut dawn a ni. Asia chhim chhaka khawl ropui tak chu a nung ta tiin America Senator te pawhin an comment hial a ni. Khami development lo kal chho khan vawiin ni thleng hianin thawh sen loh zawk in kan ramahte leh ram kilkhawr ah pawh development a lo kal a. Deva Gowda Prime Minister hunlai te pawhin North Eastern-ah task force te an din a, 'heng helna lo to tanna te hi retheih vang a ni. Chuvangin develop ang' tih a ni a. India rampum hi tun atanga kum sawm lekah hianin (hei 20/20 Vision) han tih te, khang khan hmasawna a rawn siam a ni a. Tunah pawh hianin Aizawlah airport a awm tawh chuanin hmun hnihah chuan Mizoramah hian a awm a ngai a ni ti zawnga ngaihtuahna kan neih kha a ngai a. Tiang ang chuanin harsa bik ni chuang lovin harsatna avang bik emaw sutkianna bik lam ni lovin development kal zel ina a hrinah hian he thil hi a tulin a pawimawh em em a ni tih hi mipuitena kan hriat chian zawk kha a pawimawh a.

Tin, ram rorelna sang takah te pawh kan ngaihtuahna turah chuanin khatiang ang zawng khan kan thlir a tha a, engemaw tia rilruah ngaihtuahna min ngaihsak lo bik, chutiang khatiang development direct bik han ti lam ni lovin. Kan roreltute pawh khatiana, Mizorama, kan Chief Minister hrang hrangte, kan minister hrang hrangte pawh, khatiang kha an dinmun a nih avangin, hetiang hian ngaihtuahna zau tak nen kan thlir a ngai a. Nakinah chuan Champhaiah te

pawh siam a ngai ang. Tin, tunah Railway Task Force te pawh an ti a. Aizawlah tunah hianin rel lian chi thleng turin ngaihtuahna a awm a. Rs. 529.00 crores lai tunah sanctioned a ni a. Lunglei lam kha ngaihsak loh a ni lo, chhim lampang kha ngaihsak loh a ni lo. Development kha a lo kal dawn a, hma a rawn sawn dawn a. Tun atanga kum sawm ah chuanin Lunglei thleng turin ruahmanna Sairang atanga Lunglei kha a awm leh mai dawn a. Tin, kan rilruah engemaw in en hranna bik leh ngaihtuahna hrang bik leh ngaihsak bik lo te a kan in ngaihtuah hi a tha lovin ka hria a. Chungte avang chuanin, riru leh ngaihtuahna zau tak kan neih a ngai in ka hria.

Aizawl te pawh hi han ti ila, Aizawl leh Lunglei kawtchhuah chu Kulikawn a ni. Chuanin, Sialsuk te chu a har lutuk, Sial khawpui ti a hla ah pawh siam lar a ni. Amaherawhchu, kum 1953-ah India a independence chho a, ruahmanna an siam a, Bawngkawn atanga Seling an kal meuh chuanin sawlai chu hnuchhawn ram ang mai in a thing a. Mahse, tunah hianin kum sawmnga zet hetiang an kal hnu hian, Mizoram kawngpui ber, World Bank Road Project an han ti leh a tunah chuan Sialsuk khaw lam chu a lun leh tawh a ni. Serchhip tlangdung chu a thing leh mai dawn a ni. Khatiang khan development hian thil chi hrang hrang a sawi danglam thin avangin, hengah hianin induhsak bik leh induhsak bik lo lam nilovin, ram hmasawna in a ken a kha kan thlir a ngaiin ka hria a. Chutiang atan chuanin tunah pawh hian heng chhimbial mamawh te ang chi anga ngai ni lovin Mizoram ina kan mamawh hrim hrim anga kan ngaih kha a tha in ka hria a.

Tin, tunah hian nichina kan Chief Minister, kan House Leader in a sawi thil pakhat han sawi leh ka duh chu – kan plan budget tam tak mai kha tunah hian pass loh in a Lapse-a an buai em em mai a, department te pawh kan zawt Chiang a, a bikin Rural Development te, Education te, Social Welfare te leh Health Department ten khang khan in crore tel in tunah hian an Budget an ti lapse a ni. Khangah khanin ngaihtuahna kan siam that a ngai awm mang e aw! ka ti a. A department te kha va dem ngawt theih an ni lova. A chhan chu sanction an hmuh hi ni 30 te 31 te a ni a, a then chu. Tunkar chho va sanction hmuh te kha a tlai lutuk a. Finance lampang pawh hi a muang lutuk emaw ni chu aw tih theih a ni a. Amaherawhchu, Finance pawh kha a dem ngawt theih lova department zawng zawng tam tak mai a lo kal khawm avang khanin harsatna an nei a, zankhaw tairek a an thawh pawhin an thei bik lo a ni.

Chuvang chuanin heng ah hianin kan sorkara hi hetia India ram hmasawna tur leh tunah ram hmasawna kan duh a. Airport te kan duh ang bawh hianin kan ram pawh hi, tih hmasawna tur atan a India ram atanga sum tam tak min rawn pek hi kan la pass hman loh fo thin in ka ring deuh va. Chuvang chuanin hemi Financial power pawh hi kan sem sawm deuh a ngai ang. House-ah Minister tin te Budget Demand kan han passed a. Khangte kha Minister hian Financial power te nei sela, an secretary te nen sanctioned sela, tupawh IAS officer emaw secretary ni tawh chin chuanin Financial Rules leh thildang zirin engkim tih theih a ni a. Expert veka ngaih an nih avangin. Khatiang ang khan ruahmanna siamin hemi Financial Power te pawh hi sem sawm ni sela. Kha kha awlsam takin an pass ang a, harsatna an nei lo tur a ni.

Tunah hian kan treasury ah te pawh crore nga bak nikhatah pass theih loh han tih te a lo awm khanin, kha kha a buaithlak a. Kum tir atangin tuiluang angin hmang zar zar sela. Khatiang khan development te pawh a chak anga. Tuna a crore tel tam tak mai an lapse a, harsatna an awm hi a luhai thlak a ni. Kan House Leader-in a sawi pawh kha a luhai thlak a ni.

Chuvang chuanin kan Minister te pawh khanin sanction House-ah an dil a, Demand passed a nih tawh hnu te kha chuanin mahni Ministry theuh ah hmang thei theuh selang chuanin development a chak ang a, Minister te pawh an in el ang a. A thiam leh thiam lo, Minister chak leh chak lo pawh kha a hriat theih dawn a. Tin, an ti sual a nih pawn a Minister khan a tuar bik mai tur a ni. A sorkar pumpui in dem lo khan khatiang te khan tun tumah te pawh hianin han ngaihtuah chuan a chemtatrawta thawnthu ang deuh hlek a. ‘Department, Bank in min pass thei lo a lawm, Treasury-in a thei lo a lawm, an tia, hetah Finance ah sanction min pe tlem a lawm’ an tia. Finance kha ti khan Chemtatrawta thawnthu ang deuh khan a kaikuang a kha kan zawn hmuh thuai a ngai in ka hria a. Chungte avang chuanin hetilaiah pawh hianin Development Fund tuna India rama hmasawna lo kal tam tak Ministry hmasa a Chief Minister-in a sawi thin kha, sum chu a tam lutuk a ti a, a dik a ni. India ramah hian sum a tam a ni. Amaherawhchu, Project siam thiam te, tin, khata tanga zuk haichhuah thiam te a ngai ta a. Chungte chu kan inelna atan te pawh a tha a. Heng ang, tuna mite pawh hi Chief Minister kan House Leader ringawt pawh hi ring lovin kan Minister hrang hrangte pawh hian sum haichhuah a ngai a. Airport atan pawh hian amah ringawt mai kan rin chuan a tiseng bik lovang. A tan tih sen a ni lo, mi pakhatin thil zawng zawng a tih theih loh. Chuvang chuan, tanrual a ngai a. India ram hmasawn nana sum tam tak hi hai lutin heng airport te pawh hi rang taka kan neih theihna tur atan hianin kan Minister te pawhin thla khat dawn dawn te zuk bei sela, kan secretary te nen han kal in han ti sela. Hengte pawh hi reiloteah sanction theih in a awm a rinawm a.

Chuvang chuan, hei kan House Leader te pawh fakna an pe nasa a. Amaherawhchu, in fak tam lutuk te pawh hi intihsual a awl a. In sawisel nasat lutuk te pawh hi rilru a tichhe ve thei a. Khatiang khanin thufing pakhatin a sawi ah chuanin “Thil i tih dawn in tam tak lakah inveng fimkhur la, tin, sawichhiatna leh relna lakah fimkhur la, khang khan ti buailo che in I target kha I pan ding tur a ni, I target kha thleng turin I ngaihtuahna kha siam rawh”, tih a awm a ni. Khatiang khan helai chungchang thuah pawh hianin rilru tha tak leh engemaw pu chung siin kan infak lutuk chuanin thil pawl te pawh kha a awm ve thei a. Tin, mi rilru te pawh kha a lo ti tho sang ve thei a. Chuvangin, kan hun theuh laia thil kan tih theih a, kan neih anga kha hman dik a ngai a ni. Kan power a kha tih te ka ngaihtuah a.

Pu Speaker, minute thum ka la neiin ka hria a, ka sawi zo hman tho turah ngai ila, chutiang chuan tunah hian kan rilru leh kan ngaihtuahna kan sen a ngai a. Hetiang ang hian hei vawiina ka sawi a ka lo rilruk kan Speaker khan a sawi a. Kan House chung hi ruahsur a nasa a, mi pahnih pathum vel thusawi kha chu kan hre thei lo a ni. Helai hi concrete roofing nge ni a, engemaw tia thlak chu a ngai ni in ka hria.

Chutiang chuan chhimbial han ti lo hian helai hi chu a thlak theih hram lawm ni, tih danglam theih turah ngai ta ila. Hetiang ngau ngau lo deuh te hian rilruah a awm deuh a. Mizoram hmasawna tura Lunglei bula airport siam ti zawng khan tih nise. Chu chuan min khairualin Mizoram mipui thlirna ah pawh in dah hranna leh duhranna lampang kawkw lovin. Mizoram pum tana hmasawna a nih theih nan he resolution hi a tha chu ka ti a. Tlema tih danglam theih chuan tih danglam te pawh ni ta sela, ka support ve em em a ni tih kha ka sawi ve a ni e. Pu Speaker, ka lawm e.

S P E A K E R : Tunah Pu B. Lalthlengliana, a hnu ah Pu P.P Thawla.

Pu B. LALTHLENGLIANA : Pu Speaker, ka lawm e. Resolution a ka luh hma hian vawiina ka unstarred question no. 41 chhanna lo lut kha kan House Leader ngen lawk duh ka nei a. Tuipui Hydro Electric Khuangthing ram chhung ami hi engnge tunah a chanchin tih ka zawhna ah khan, chhanna kha – Tuipui Hydro Electric Project hi Biate khua atanga chhim chhak lam 12Km a hla leh Khawbung khua atanga hmarthlanglam 15Km vela hla a ni tih a ni a. A location an tih dan kha a diklo lutuk a. Khang kha chu zawhna chhangtu te hian engatinge mahni hmalak lai hetiang an rawn tih dik loh ka ti a. Kha kha Biate atanga 12 Km a ni lova. Tin, Khawbung khua atanga hmarthlanglam a ni bawkw lova, Khawbung atanga chhimlam zawk a ni a. Khalai kha document a awm reng tur atan khan tha a ka hriat loh avangin ka rawn sawilang zawk duh a.

Tin, Pu Speaker, kan House Leader ina vawiina a thusawi kha ka appreciate a. Kei pawh Pathian leh hotute zara kum sawm dawn lai Minister-a ka thut ve khan hetiang kum tawp Financial Year ending a pawisa lapse awm teuh teuh tur ven nana zan dar 12:00 thleng thleng leh a tuk thlengte pawh a ni ang a, hetiang tih chiam hi tha ka lo ti lo ve thin a. Tin, hriat leh zel dan phei chuan peon te pawh hianin file ka dah luh sak ang che u ang a scooter man te pawh min tih sak ve rawh u aw tih te pawh awmin hriat a ni a. Tunhma deuh te phei kha chuan Secretariat tualah hian steel almirah te, dawhkan te, parda te, carpet la tha tak tak thehchhuak thin in a thara uchuak tak tak a supply va tih chawp chuk chuk thin te kha a ni a, tunah chuan hmuh tur avang ta viau a, chuti chung chuan heng hi a la awm chho reng mai a. Kristian kan nihna nena inhmev lovin ka hria a. Kum tawp dawna pawisa inchuha kan nihna hre lek lova, tlaivar vara kan han tia, thamna nasa tak awm thin hi tihbo duhna rilru kan House Leader-in a han neih hi a ropui ka ti a, ka thlawp a, hun rei tak atanga ka lo vei ve a ni.

Minister anga kan function naah ka experience-ah chuan Department kan chan hrang hrang fund allocation min han pe a hnathawh nan fund kan han dil hian planning Department-in pawisa hman tur min pe tawh a nih chuan plan pawisa kan hman tur dilna file hian Planning Department kal kher lo hian a tih theih em tih te?. Tin, Finance Department hian query a siam tam lutuk te pawh hian khawtlaina nasa tak a siam thei em tih te leh Department inkhaidiat dan chhawng thui lutuk example - Under Secretary atangin Deputy-ah Joint-ah

Additional-ah Secretary, Commissioner, Chief Secretary, Minister, Chief Minister tikhan a kal chho ta a. Khang zawng zawng file in a paltlang chuan a tlai lo thei lova. File an enchhoh veka, officer pakhat alo absent a, ni hnih khat a awm loh chuan file a tang vek a, khatiang anih avang khan thla sawmpahnih chhung hian Plan Fund hman zawh loh hi awl tak a ni. Chu chu engtia siam rem tur nge ni ang tih hi ka lo ngaihtuah ve thin a, ka hrethiam mai lova.

Tin, kumtawpa financial year ending ni sawmpathum vela kan pe leh tho tho tur anih chuan Plan Fund kan moved lai hian Financial Department te pawh hi khirh lutuk lo se tih te, a siam rem dan a awm thei em? tih te pawh kha en a tha in ka hria a. Hei hian kan ramah corruption nasa takin a ti hluar a, reilo te chhunga corruption in a chen chilhna hun niin ka hria a, hemi kan tih reh theih chuan kan administration te pawh a ziaawm sawt in ka ring a. Tin, corruption kan do na kawngah pawh nasa takin hma kan sawnin ka ring a, chu chu kan House Leader in a rawn sawi kha ka appreciate thu ka rawn sawi a ni.

A dawt leh ah chuan Pu Speaker, nichina ka hma amitena an sawi, chhimlam tih hi ka veina a rei tawh a, kan thian te ho khan an lo vei a, a tha ka ti a, hei hian, keini chhimlam han tih te hianin kan rilruah hian disintegration a siam thei in ka hria a, tin, a chhimlam pawh hi kan tawng an huat thu ni lo sela, hmar lam ai hian inferiority complex an nei emaw ni tih mai tur thil ngaih theih a awm thin a. Mizo vek kan ni a ram zim te ah kan cheng ho va, a chhim leh hmar chhak leh thlang zawnga thil sawi hi kan chin loh a tha in ka hria a, heng rorelna sang ber ah te phei chuan kan tih loh a tha in ka ring a. Nichina an sawi ang khan kan ram hruaitu leh Kohhran hruaitu zingah pawh chhimlam mi a sulsutu ber zawk an ni. Chuvang chuan thangthar lo chhuak zel te hian chhimlam harsa bik leh engemaw bik a in ngaihna hi nei lo ila a tha in ka ring a. Development pawh a zau thei ang ber in tih ni se a tha a, chu chu eng sorkar pawh lo ding sela ngaihtuahna a awm vek a. Amaherawhchu, nichina kan member zahawm tak tak ten an sawi ang khan, tute emaw an sorkar hunlai chuan a buak tlem deuh lai chu a awm thei ngei ang. Khang kha chu thil chiang sa a ni a.

Tin, Pu Speaker, wawiina kan resolution kan sawi dawn emaw ka tih lai khan development ah kan in sawi chhe vak vak mai a, a tha tho ah ngai ila. General discussion ang maiin wawiin hi kan hmang a ni deuh ber mai a. Airport pawh kan House Leader zahawm tak hnuaiah chak taka hma lak a ni a. A hawngtu chu MNF kan ni ve leh mai a. Tunah pawh hian Saitlukah hma an han la ang a, a hawn kha chu kan rawn hawng leh mai dawn a ni. Khatiang khan kan inchhawk ve deuh mai mai a. Tunah pawh hian Minister in chutah chuan chumi chu a hawng, tih te News a ka'n lo en hian kan hmalakna kan zawh tawh te, kan la zawh chiah loh, kum khat chhunga in han chhunzawm a, in han zawh awm te kha a ni a. Chuvang chuan thil hi kan han sawi pawr viau lai hian, khatiang te te khan thil hmachhawp hi a awm a. Chuta kan sawi tel duh chu, sorkar engpawh ina thil tha a lo tih tawh in chhunzawm sak duh na thinlung kan neih hi a lawmawm hle in ka hria a. Hmanni a Champhai bialtu in tun atanga kum sawmhnih/sawmthum ah hi chuan wawiina House a thu te hi kan

awm tawh dawn lo a tih ang deuh khan keini pawh a chawhnu her ah kan awm ve tawh mai ni hian ka in hria a.

Chuvang chuan Mizoram hmasawanna tura hma kan lakna ah hma a mite hmachhawp kan han tih zel hian Mizoram zim te hi reilote ah kan siam tha thei a ni tih hi ka lo hmuh ve thin a nih avangin vawiinah pawh hian lawmthute pawh kan sawi tel duh a. MNF sorkar hmalakna tam tak tuna congress, Pu Hawla kaihhruai ina an chhonzawm chhoh ah hian kan ram chu kum tawp alo nih meuh chuan a eng sa kha a eng lehzuah ang tih kan ring a, chutah chuan lawmthu te pawh kan sawi a. Aizawl khawpui chhungah pawh Secretariat building kan han sa a. Pu Zoramsangliana te Minister an nih hmasak a House kil thlanglama Assam type building kil khatah an thu a, kan dawr ve thin a, sawlaih Minister office an han luah a, report ka dawn dan chuan Pu Zoramsangliana pawh a hawi a hawi a, ‘alo ropui hle mai, MNF chuan hma an lo la tha hle mai’, a ti e an ti a. Khatiang khanin a pawna min fak duh chiahlo hian khawiah emaw hi chuan an sawi ve zeuh zeuh a ni. A lawmawm khawp mai khatianga comment han hria te kha.

Tin, Zemabawk piah tlang te pawh saw han en ila tunah chuan a ther fur tawh a. Khatiang khan Mizoram dung leh vangah PMGSY hmalakna in Mizoram mihring mi 250 chen theihna ang chin chu India sorkar policy ah kawngpui black top a pawh vek tur tih policy a awm avangin congress sorkar hmasa ah khan a rim rawn nam tan mahsela tih hman chiah a ni lova, MNF sorkarah kan vanneih a siamin thil kha alo hmin a, hma te kan han la chho va ti hian Mizoram dung leh vangah kan kal tam poh leh MNF hnathawh tam zia a lang a ni. Congress sorkarin a rawn chhonzawm leh a, chuan black top te tih zawh anih pheih chuan a ropui lehzuah dawn, chuvang chuan Pu Speaker, dinglama thut avanga hma ami te sawisel chiam a i veilama thut avanga ruling lama thu te a nazawnga sawisel te kha a tha ber lem lova. Puitling zia kan put chhoh zel hi kan ram rorelna helaia kan awm hian kan tih tur niin ka hria a, fak tlak te kan faka sawisel ngaite kan in sawisela kan in siamthat zel hi kan ram siamnan a tha a.

Kan House Leader pawh member ding zawng zawngin in rawn fak a, infak em avangin kei pawhin ka rawn fapui ve che u a ni. Amaherawhchu, Pu Speaker, helai House a ka sawi duh chu, hotute House chhungah chauh hian fak lo ila, pawnlamah hian hotute rel loh hi a tha tih kha kan in chah ni sela. Pu K. Liantlinga sawi ang khan, kan hotute kan fak lutuk hian mihring ve bawh annih avangin kawng diklo zawh te pawh a awl thin. Chutih hunah chuan kan rel leh nghek si anga, kawng dik an zawhna tawkin thu tha te pawh hi rawn ngam a tha chu chu mipuitling zia a ni. Kan House Leader te mipuitling annih avangin duhsak taka thurawn petute an haw mai lovang tih hi ka ring a, chu chu ram hmangaihna tura ro kan relna ah kan tih tur atan tha tho in ka hria a, ka han sawi leh lawk duh a.

Tin, Pu Speaker, he kan Resolution, MLA zahawm tak, Pu S. Laldingliana rawn put luh hi, ‘chhimbial mipuite harsatna sukiang tura Lunglei bula airfield siam anih theihnana hmalak a ni ta hi lawmawm kan ti a. Airfield hi siam thuai

a nih theihnan sorkar laipuih nawr zui zel ni rawh se', tih a ni a. Han chhiar chuan a tha a. Amaherawhchu, kawng leh lam kan ngaihtuah chuan sorkar chak tak a ding a, House Leader kaihhraina hnuaiha Central lamah pawh pawisa sawichhuah zel a ni a, 13th Finance Commission te han en in pawisa luh dan te pawh kan hria a. Hahipin kan sawi a, Leader chak tak kan neih lai leh hmalak reng a nih lai a hetiang resolution ruling lam atanga lo lut ta mai hi House Leader hi 'no confidence' kan move mai em ni? A tih theih rum rum in ka hria a. Central-ah pawh a kal a, a sawi fo, hmalak mek laia hetiang han tih hi kan House Leader te an puitlinga, huatthu ah an la lem lova. Vawiinah hian kan sawitlang a, a tha, mahse kan pass dawn anih chuan nichina kan Home Minister zahawm tak in, 'amended form-in tih ni se', a tih kha ka support a.

Chutih rual chuan Pu Speaker, keipawh chhimbial mipuite harsatna sukiang tura Lunglei bula airfield siam a nih theih nana hmalak a ni ta tih hi 'ta' hi pah ila 'a nih hi lawmawm kan ti a', ti hian kal thei ila, kan Home Minister rawtna kha ni bawh sela. Tin, chumi bakah chuan he Lunglei bula airfield kan tih hi tuna kan sawi mek hi survey te la tih loh a nih ka ringa. Airport tling tur a ni lo em ni? A ram hian a daih lo em ni? A daih anih chuan airfield nilovin airport tih kha, hemi mithiamtena an categorized dan hi ka hrethiam chiah lo na a, airfield kan tih hi chu kan rilruah te deuh hlek ni a a lan avangin, airport ni law law a resolution hi siamthat nisela chuan, Pu S. Laldingliana, a resolution puluttu lam ama bial chhung ngei a ni bawh a, a bial te leh sawlam ho sawn engtingge airport ti lova, airfield i rawn tih, tiang thil te reuh te hi kan duh hleinem an lo tih loh nan, kan chhan nan, Lunglei bula airfield tih hi airport ti a thlak te pawh kha rem kan tih tlan chuan a tha ka ti a. Chu chu thil tha hi chu kan support dawn che u a, amaherawhchu, helaia a wording a fello lai te han siamthat a, nangni pawh tan tun lem lova, a nia lawm ti a, siamthata pass tlan atan khan a va tha em ka ti a. Ka rawn rawt ve anih chu. Ka lawm e.

Pu P.P THAWLA : Pu Speaker, ka lawm e. Vawiin 1st April, 2010, he House-ah hian dinglama thu te leh i veilama thu te inlungual lai ber hun kan tawng leh ta niin ka hria a, lawmawm ka ti hle a. Tuna member zahawm tak Pu S. Laldingliana resolution rawn putluh chungchangah i veilama thu te pawh indawt zat in kan lo ding a ni a. Kan support tlangah ka ngai a. Keipawhin tha ka ti a, ka support thu ka sawi ve duh a ni.

Nichina Tuichawng bialtu zahawm tak Pu Nirupama thu rawn sawi atang khan tlem a han tuihni ka duh chu India ram leh Mizoram hmasawna tur atan hian a ram chhunga mi cheng te zawng zawng hi kan pawimawh tlang hle mai a. Congress a pawimawhna lai te pawh a rawn tarlang a. Kan teh dan te, kan thlir dan te a in ang lo thei ang a. Khang te pawh kha tha lo ka ti chu ani hauh lova. He airport chungchang kan sawi dawn ah hian Lengpui airport kan neih chungchangah pawh MDF party pawh kan tel hma ve khawp mai tih kha kan tarlang ve duh a. Kum 1996 MDF party din tirh khan he hna an thawh tluk tluk lai hian Apex Bank Board member niin a hmun kha kan zuk fang ve hrep tawh a, thian te nen. A puitlin theihna tura tawngtai tu zingah pawh hian ka lo

tel fo tawh a ni tih ka in hrechhuak a. Chuvangin sawi hmaih hauh lo turin ka lo tel hma ve khawp mai tih kha ka han tarlang duh bawk a.

Tin, a hawnna hunah 1998-ah pawh khan Saiha atanga rawn tlan vang vangin Pu M.H Tiabi nen kan zuk tel ve tawh a. BJP Vice President Union Home Minister ni bawk Pu L.K Advani khan a hawnna thuchah a sawi a. Chutih lain khatih laia Chief Minister zahawm tak khanin, 'Regional party, MNF an sorkar ve leh a, airport ropui tak mai hawn a ni hi a ropui hle mai', tih thu a sawi te ka rilru in ka hre reng bawk a. Tuna kan House Leader zahawm tak ni mekin hemi airport kan neih theih chungchanga bul a lo tan dan te leh hma a lo lak dan zawng zawng thu a sawi te pawh ka rilruah a awm a. Keipawh harsa tak karah rawn tlan ve in taxi te hire chawpin kan zuk tlan thla a kan zu tel ve te pawh kha thawk hlawk ve hlein ka inhria a, chu chu ka han tarlang duh hmasa a ni.

Vawiinah Lunglei District a Saitluk a, airport kan neih leh theihna tur atana sawiho naah pawh tel ve thei a ka awm hi vannei ka in ti a, lawmawm ka ti hle a, chuvangin he resolution hi a kalh zawngin sawi tur ka hre lova, a thlawp zawngin rilru zawng zawnga ka thlawp thu kha ka rawn tarlang duh a ni. Mizoram hi Government kan nih tirh atanga District pathum kan neih hi sawi nawn fo hi kei chu tha ka ti a, Aizawl District, Lunglei District, Chhimtuipui District tih te kha kan bul tan dan a ni a. Aizawl District-ah chuan airport Lengpui, airport tha tak mai tunah chuan improve na tur tam tak awm rih mahsela kan nei tawh a, kan hmanng tangkai em em a. A dawt leh ah Lunglei District ah tunah hian Saitluk hmunah hian airport atana hmun tha tak mai alo awm a ni tih 17th March, 2006 a airport chungchang ngaihtuatu tur a Lunglei Airport Committee tena an lo survey tawhna leh an recommend angin vawiinah hian hei Resolution hial House-ah hian put luh alo ni ta a. Hemi airport hi a hmun hma hriat tawh chinah airport atan a tha tawh hle a. Lunglei atanga a panna tur te Chawngte District Council te, Mara District Council leh Lai District Council a awm te tan te pawh mahni khaw hmun atangin mahni tual zawl atangin hemi airport pan hianin hun tam leh ni tam leh sum tam seng lovin a zin chhuah theih dawn a ni tih kha a tichiang hle in ka hria a. Chuvang chuan, member zahawm tak Pu S. Laldingliana rawn putlul hi a pawimawh hle a ni. Mizoram hma a lo sawn chho zel a. Lehlam lehlamah hmasawna kawng hrang hrang kan neih theih tur ang Project liante chu kan Mizoram budget, kan kham loh em em khawih buai miah lova Central sorkar leh Company lian lam sum atanga hnampuite hausakna tawm chung a neih theih thil a lo ni a, chuvang chuan thil chakawm leh lawmawm tak a ni.

Sorkar hmasain a theih chen chen hma a lo lak tawh hi tha kan ti tlang a kan ti chhunzawm zel a, tun sorkar chak tak mai a lo din tirhah pawh hmalak nghal tur leh chhunzawm tur te chhunzawm nghal a lo awm in tunah hian House zahawm taka pass tura put luh nghal a ni hi lawmawm kan tiin, kan tangrual hle a ni tih hi a tichiang hle in ka hria a, Pu Speaker, lawmawm ka ti em em a ni. Chuvangin he Saitluk Airport neih theihna tur chungchang thu hi hun ti hek zawngin sawi tam teh chiam pawh ngai lovin ka hria a. Hei hi chu

zaah za leh sawmnhinin ka support a, a chhan chu a dawt leh ah undivided Chhimtuipui lamah te pawh kan tan rual leh ka beisei bawka a ni. Ka lawm e.

S P E A K E R : Sawtiang ah te phei chuan tuipui khuah hial a tum chi a awm mai dawn a lawm. Pu C. Ramhluna.

Pu C. RAMHLUNA : Pu Speaker, ka lawm e. Vawiina kan resolution Pu S. Laldinglana rawn put luh 'Chhimbial mipuite harsatna sukiang tura, Lunglei bula airfield siam a nih theih nana hmalak a ni ta hi lawmawm kan ti a. Airfield hi siamthuani anih theih nan, sorkar laipuih nawr zui zel ni rawh se', tih hi ka thlawp a, tha pawh ka ti a. Tin, hetiang resolution tha tak mai a rawn pulut hi lawmawm pawh ka ti khawp mai. A thu ah chhimbial mipuite harsatna han tih deuh bik lai, 'Chhimbial mipui' han tih lai te pawh kha a han sawi a, a dik viau a. Mizoram pum huap nisela tih lampang hawi zawnga han sawite pawh kha a dik a, Chhimbial hanin dah hrang bik deuh hlek anga han lang te pawh kha, ngaihtuahna te pawh kha a lo awm a, enggemaw chen chu a dik in a hriat theih a, mahsela chhim lampang mi han nih chuan a thu hi a diklo lem lo, ti in ngaihtuahna thuitak min pe ve a.

Ka rilru ka ngaihtuah ve dan mai mai chuan Mizoramah hian kan sum hman dan te hi chhut ta ang ni ilangin za a 60-70 % vel hi Aizawl District-ah kan hmang emaw ni aw! tih tur hian a awm niin ka hria a. Tichuan 30 % vel hi Lunglei leh Chhimtuipui district hianin ti mai ila, Lawngtlai leh Saiha district hian kan insem emaw ni chu aw! tih te ka ngaihtuah rum rum a, keini chu thingtlang lampang bialtute kan ni a, kan bial mipuite han hmuh ngat phei chuan an khawngaihthlak khawp mai, hmar lampang leh chhim lampang hi sorkar hnathawk te kan nih avangin ka zin kual nasa ve mai a, an dinhmunte pawh hi ka han compare, ka han compare a, chhim lampang hi chu kan hniam zual deuh bik niin ka hria a. Chuvang chuan, 'chhim lampang harsatna sukiang tur', han tih hi keini tan chuan thin a dam deuh thlap maia. A lehlampangah chuan indah hranna lampang aw kha a ni lem lo, saw lampang kan hmangaihna avanga thu hi a lo lut niin ka hria a, chuvang chuan kei chu hetiang han kal tir pawh hi a tha in ka hria a. Tin, airport hi lo awm thei tak tak pawh nise a chhawr ber tur leh a hmang tangkai ber tur chu chhim bial mipui chu kan ni dawn tho tho niin a hriat a. Entirnan, damlo na deuh te Kolkata vela han kal thlakpui ngai awm ta sela an awm fo bawka khangho te kha Lawngtlai atang te, Saiha tih vel atang te a rawn phurh vang vang ngaite an lo ni a, Lengpuih phurh thlak an ngai a chuan Lengpui atangin Kolkata phurh thlak an lo ngai ta a. Helai vel atangte chuan awlsam te a phurh thlak theih mai anni a, chuvang chuanin chu lampang harsatna chu kan Chiang a ni. Chuvang chuanin Lunglei bula airport emaw airfield emaw a eng zawk zawk emaw lo awm thei tur hi chhim bial tan chuan hlawkna nasa tak ani dawn a, chuvang chuan a lawmawm ka ti khawp mai a, chuvang chuan he Resolution hi a tha ka ti khawp mai.

A lehlamah chuan Resolution hi kan han sawi thin a, March thla ah pawh khan Health Care Scheme pawh kha Resolution kan passed a, lawm takin,

lungual takin kan passed a, mahse, han tih hlawhtlin mai loh te alo awm thin te hian a lehlamah chuan he House zahawmna te pawh hi a ti hniam thin em aw te ka ti rum rum thin a. Hetiang anga Resolution kan passed anih chuan a rang thei ang bera sorkar in a hma a lakna, tan a khawh thuai thuai hi a tul in ka hria a.

Nichina kan member pakhat in a rawn sawi tak ang khan he thil phei hi chu sorkarin active taka hma a lak mek lai kha a ni a. Kan hmuh phat hi chuan, nichina a sawi tak ang khan engemaw a tul tehchiamna aw, tih te ka ngaihtuah a. A chhan chu kan House Leader hi han fak ve ta ila, tin, amah pawh a vannei ka ti a. Hei, Airport leh thildang tam takah hming a chher a, kan hria a. Lengpui airport hi ama kutchhuak a niin kan hria a. Sorkar hna kan thawh laiin, Lengpui airport siam laiin vawi khat chu sorkar hnathawkho kha an siam lai en turin nikhat chu min kal tir hlawm a, tahpawh chuan kan kal ve a. A hmuhdawm sup sup khawp mai a, bulldozer te'n an han lai vel te, leivung an paih a an han kal sup sup han hmuh khan a lawmawm ka ti a, hmuhdawm kha kan ti em em hlawm mai a, kan lawm khawp mai a.

Tichuan, tunah hei Lunglei lamah airport siam leh thei tura Pathianin hun tha an pe te hi lawmawm hle in ka hria a. Chutianga chak taka hmalak anih laia hetiang anga Resolution anga a lokal leh si hi nichina sawi tak ang khan a tul em ni aw! ka ti a. Mahsela Ruling Party ten ngunthluk taka in ngaihtuah a, tha in ti anih si chuan keini pawn kan pawmpui em em che u ani tih kha kan sawi duh a ni. Keini tan phei chuan hlawk viau dawnin ka hria a, Saitluk atang hian kan veng Diltlang phei chu tlangdung pakhat 30 Km lek kha a ni a. Kan thleng thuai mai dawn lehngal a. Saw mi kawng te pawh saw nakinah chuan min ngaihtuahpui nghe nghe sela, a tha in ka ring a. A chhan chu Multi-Modal Project a lo chhuak dawn baw si a, Bungtlang atangin kawng lianpui kha an pawh ang a. Tlangdung mar vek kha a ni lehngala, chuvang chuanin ka ngaihtuah thin a, Multi-Modal Project hi tih hlawhtlin a nih hunah phei chuan Lunglei leh Aizawl nuho sawnin Zochachhuah saw an rawn market place tur a ni a, an rawn kalkhawmna tur a ni a, a chhan chu foreign market kha alo ni dawn si a, chuvang chuan thil tha tam tak kha alo thleng dawn a, hlawk hle dawnin ka hria a. Aizawl nuho te khanin hetah Saitluk airfield ah an rawn tum ang a, tichuan chu mi atang chuanin an rawn kal zung zung mai dawn a ni a, ka'n ngaihtuah thin a, a hlu hle dawnin ka hria a. Chuvang chuan he airport lo awm tur hi Mizoram hmasawmna a nih rualin, chhim lampang chuanin nasa lehzualin kan chhawr dawn a ni a, a ropui hle dawnin ka hria a. Chuvang chuan he Resolution hi nichinah khan, "za a za leh sawmhnihin ka support e", ka vei lama thu hian a ti a. Keipawh chutianga zat zet chuanin ka support ve a ni e, tih kha kan sawi duh a ni e. Ka lawm e.

S P E A K E R : Tunah Pu P.C Zoram Sangliana ilo sawm ang.

Pu ZORAM SANGLIANA, MINISTER : Pu Speaker, Lunglei ‘S’ bialtu MLA zahawm tak, Parliamentary Secretary ni bawkin Resolution, ‘Chhim bial mipuite harsatna su kiang tura, Lunglei bula airfield siam a nih theih nana hmalak a ni ta hi lawmawm kan ti a. Airfield hi siam thuai anih theih nan sorkar laipuih nawr zui zel ni rawh se’, tih a rawn put luh ah sawihona a hun kan chang ve hi lawmawm ka ti hle a. Saptawngin Airfield emaw airport pawh nisela mizotawng chuan ‘thlawhna tum hmun’ a ni mai a, chuvang chuan thlawhna tum hmun dang neihna tur atana kan House Leader, Chief Minister zahawm takin a hmalakna mek lungrual taka House member zawng zawng tena a kut tha tichak lehzualna tur atana remhre taka Lunglei ‘S’ bialtu MLA in Resolution a rawn put luh, kan pass dawn awm a an langa hi a ropui ka ti a. Vawiin hi April Fool tia sawi a ni thin a, mahse, vawiina kan boruak ah hi chuanin a lawmawm in ka hria a. Vawiinni hi lawm thu kan han in hrilh tawn nak nak mai te hi kan House Record niin ka hria a. A chhan chu engnge kan tih chuan House Leader-in hma a hruai tlat vang a ni a. A dik tak chuan nimin lama a Demand, a Department bik te a a’n wind-up na tawp leh bul a sawinaah te vawiinnia a thu sawi zawng zawngte kha a dik tak chuan helaia Minister niho tan pheih chuan kan inenfiahna tur ram ram kha a awm tlat a ni. A chhan chu Minister-te hian MLA-te hi kan ramah te hian kan lo ti tlangnel lo emaw ni chu aw, an duh angte hian hun kan lo pe tha lo em ni aw, an bial harsatna te sawi thei miah loh hian kan lo awm em ni aw tih te, khang te thleng khan kei ka thut hmun atang hian kan hotupa ina, kan Chief Minister zahawm takina khatianga a rawn sawilai te khan ka lo ngaihtuah a. A sawi thin a, hruaitu a ngaihna hria hruaina hnuaiah hi chuan, a dik tak chuan, ram leh hnam hian hma hi a sawn thin a ni. Department hrang hrang kan han chang a, kan han tih ah te hian kan theih ang tawh ah hian mi hi a lawmpui thiam em em a. A bak chu, ‘chutiang khatiangin kal leh rawh u aw’, ti in. Ti tha ve hle nia kan inhriat angah te pawh hian ti mai ang. Chungah te chuan a bak min kawhhmuh tur hi a hre zat zat mai zel a. Chutiang hruaina hnuaiah chuan he hnam tan hian ni chhinchhiah tlak te, ni lawmawm te hi a thleng zel dawn a ni tih hi alangin ka hria a.

Pu Speaker, sorkar record a ni bawh a, hemi sorkar publish a ni bawh a, I phalna in thil tawi te kan rama kan Department te hi, Kan officer-te hi an rintlak a ni tih he sorkar lehkhah chhuak atang hian hmuh ka nei a. Lengpui airport chungchangah khan an sawi thin tawh angin Border Road Organisation te hian January, 1992-a estimate an siamah chuan a runway 7500 ft ni tura an duannaah khan cheng vaibelchhe sawmsarih hi an estimate siam a ni a. May, 1994, kum hnih ral tawh hnua Mizoram P.W.D Engineer ten a, runway 7500 ft ni chho tur si estimate vaibelchhe sawmli panga chauhin estimate kha an ti thei a ni. Chumi awmzia chu engnge kan tih chuan a ram leilung fate enkawlina leh an khawih, vawiinni ah pawh India rama sorkar ti mai ang. Airport awm chhuanawm em em mai te pawh hi ka rilruah a lo lang a. Tin, a official te lawmthu kan hrilh duh a ni. Vawiinnia National Highway No. 54 Mizoram P.W.D kuta lo awm te hi an rintlak ang tih ka ring ani. Chu chu engnge kan tih chuan mahni ta, mahni leilung fa an thih pawn he ramah an nun pawn he ramah an ei leh bar ngaihtuahna zawng zawngte pawh he rama awm vek, kan officer ten hetiangah hma an lo lak tawh 1984 BRO in a kum hnih hmalamah an lo ti tawh a let

chanve deuh thaw a an han estimate leh a thawh hun chhung tura an tih ah pawh anmahni vilna hnuaiah contractor hrang hrang ten hun tiam hmaa an han zo thei te hi a lawmawm ka ti tak meuh meuh a. Chuvang chuan heng hi han sawilan tel, han tarlan leh ka duh a sorkar record awm tawh ni mahse House proceeding-ah a lo la awm loh takin han tih lan ka duh a.

Tin, he lehkhabu ah vek hian thil ziak a awm a, Department publish a ni a party publish a ni lova, chutah chuan, ‘Zoram tan mi chhinchhiah tlak’ tih hi a lang a. Tin, Zoram tana mi chhinchhiah tlak a ziakah chuan, ‘Pu Lal Thanhawla, Chief Minister-in he Airport hlawhtlin nana chi hrang hranga a beihna leh Prime Minister, Pu Narashimha Rao-an, “ Lal Thanhawla ti tling u la, Lengpui Airport ka pe ang che u”, ti a A.R Ground-ah a sawi, Pu Lal Thanhawla’n a bawhzui chak dan hi House Proceeding ah chhinchhiah tlak a ni, pakhat mah ka belh lo a nia. Chutiang chuan chhinchhiah tur hi kan official te pawn an lo hre khawp mai, chu ti anih avang chuan, vawiinniah hian Lunglei bula thlawhna tum hmun han siam leh tur atan pawh hian hma ala tawh a ni tih hi chu House-ah leh ti ti ah te, Chanchinbu ah te pawh kan hmu a. Mahse, rin lohna lampang ni lo va a kut tha tih chakna tur a House-in lungrual taka pass tur Resolution chhawpchuah nachang hria Pu Dinga, Lunglei ‘S’ bialtu MLA chungah pawh lawmthu ka sawi duh a ni. MLA zahawm tak a rawn nih hma in han ti ta khanglang ila, mawilo lam ni lo sela, NGO pawh lian ber, Mizo thalai mai ni lovin Mizote min thlung khawmtu bera kan neih YMA Sub-headquarter Lungleiah hian President a ni thin a. Chung hun lai chuan Lunglei leh Mizoram thanna tur leh hmasawna tur hian NGO dawhkan atang te in nasa takin an lo ngaihtuah in, amah pawhin a rawn sawi ang khan, chung hunlaiah chuan tuna airport dahna tur tuna a’n move paha a’n sawi ber na hmunah chuan, mimal tumah in compensation avanga harsatna a awm lohna turin D.C Chairman-na hnuaiah anmahni rawt chhuah ngeiin, tuman hmun leh ram an neih theih lohna atan humhalh tur a ni ti a hma an lo lakna rah te kha, kha bak kha chu NGO atang chuan a tih theih loh a ni. Sorkarah lo thu in he House-ah ngei mai Chief Minister hmalakna ti chak tura amah ngei move-tu a’n ni thei a lawmna chang a hria hi keipawhin ka lawmpui tak meuh meuh a ni. Chuvang chuan, ram leh hnam veina tak tak, dawhkan limit chin ni lova hetiang mipui aiawha a thutna hmun atanga an sawi chhuak leh thei te hi a tan tak pawh malsawmna a ni a ni.

Vawiinah hian Pu Speaker, uluk takin han ngaihtuah ta ila, hmasawna chi hrang hrang lokal hi engnge ni kan tih chuan, dik tak chuan Bible-ah pawh kan hmu a. Khawvel chhandam turin Isua, Pathianin a fapa mal neih chhun min pe a. Mahse, tirhkohvin a hrilhfiahna ah chuan, “ Amah ringtute tan a ni deuh ber”, a ti kher a ni. Chutiang chiah chuan kan ram hmasawna turah pawh hian Delhi a pe theitu ten pek tlak Mizoram hian Chief Minister an nei a ni. An thutiama ding thin hotu kaihhruaina hnuaiah Zoram hi a awm a ni. Adang ah pawh kan kai hnem bawk a han kai ta lawk ila, NLUP atan pawh engtinngge kan beisei aia tam kan hotupa hian a rawn hawn theih, a programme leh a sawi ni ringawt lovin, rintlak Leader a ni tih India miten an hriat Zoram hian a nei a nih hi. Chung lanna chu engnge? opposition anih lai a tute rilru tih nat thar nan a sawi ka ni lo, tute emaw dem nana sawi ka ni hek lo. Delhi, Mizoram House

atang ngei a zanlaia hnawhchhuah a tawh thin te khan, Prime Minister vawiina kan hnena awm ta lo Pu Rajiv Gandhi khan dik tak chuan a hnawt chhuaktu ten a, “Ka pu” an tih tura dah hi a duh ve a ni, a tum a ni. Chung hunlaia a thusawi chu vawiin ah hian ka rilruah alo thar leh thin a, chung hunlaia Prime Minister a chhanna chu a bula awm ve rengin, ka ngaihtuahna ah chuan a fuh mang e, Mizo tlangval Union Minister rualin ka haw thei dawn, ka hisapna ah pheih chuan, Tuirial airfield chauh kan la neih lai kha a ni a, special plane in mizo tlangval Union Minister nena thlawk hawng dun tur te khan ka lo in suangtuah hman a nia. Mahse, kan hotupa in a chhanna ah chuan, “Ka mipuite engtingge ka kalsan theih ang, remna leh muanna atan Pathian leh mipuite hnena kan commitment angin kan hnam ah kan lal thuthleng kan lo hlan tawh a, mahse, kan mipuiten hemi te hi hriat chian leh an la duh a niang, khawngaihna an pe tlat, chuvang chuan anni ka kalsan a thiango”, a ti a. Mahse, a hnu zelah hotuten an ring si a, India tangka bawmpui chahbi kawl phak 9th Finance Commission member-ah an dah leh a. Finance chungchang thua pawh ka hre lo hi an ti thin tak na a, a hriat zia hi budget pharh ah te kan hria a ni. Delhi tlangah pawh dik tak chuan heti zat kan ram leh hnam tan a rawn sawi chhuah te hi chung rah chu ani tih hi a chiang khawp mai. Heng hi kan hriat tlan a tha bawh thin in ka hria a. Chuvangin khang thil kan ngaihtuah let khan vawiina he hnam in kal an siam chhohna zelah te hian ani kaihhruaina hnuaia hmasawna rahbi intuk chho ut ut mai te, sorkar hmasa ani emaw, hmasa leh emaw, UT laia miten an lo tih anih pawhin a chhunzawm tlak chu kan chhunzawm zel dawn a ni, tih mai an hreh miah lo mai te hian Leader tling a nihna a ti lang a ni.

Ran rual zingah hian Ngau hi ngawa a huhova awm thin an ni an ti a, chuta ngawa an awmnaah chuan a pachal emaw a hotu ber hian rah tlan tur an neih dawn chuan chu rah tlan tur an tlan ve turah chuan anmahni tichhe theitu mihring emaw an hmelma an ramsapuite pawh an awm em tih an thlithlai vek phawt a. An awm lo ani tih an hriat veleh chu rah tlanna hmun tur emaw buh hmunah emaw an tla chhuak thin a. An tlan mek lai pawhin an hotupa ber chuan ka mite hi an him em tiin a ngaihtuah a, a chhut a, a beng a chhi a, a hriatna zawng zawng a fawmkhawm a. Chumi hmang chuan a hote kha a enkawl thin a. Hmelma leh tichhe theitu an lokal tih a hriat veleh signal a pe a, ngawah a tlanchhiatpui a, a bihrukupui thin a ni an ti a. Chutiang deuh hlek chuan vawiinah pawh hian kan ram kan hnama rahbi thar hrang hrang hi en ta ila dik tak chuan, hmasawna rahbi a ni emaw Kohhran a thlarau mite thleng pawha malsawna pawh hi leiah thlamuanna kan neih loh chuan, a awm thei lo a ni awm a sin, ka sawi fo thin. Curfew hnuaiah Kohhran Upa huaisen tan pawh nilai zan dar vaw turin tumah an kal ngam lo, an awm tlat lo. Mahse, Remna leh Muanna hnuaiah chuan, hmannah pawh Pu Speaker, ka Demand kan Wind-up ni pawhin ka sawi tawh kha. Zanlai thleng thleng in nula thangvalten Cheraw an zir thu a ni. Kohhran inkhawm, Pathian thusawi chauh pawh ni lovin, chung zawng zawnga hmasawna bul chu remna leh muanna hi a ni ti a kan sawi thin hi a ni. Bul tanna dinmun hlu tak (Treasury Square atanga Sikulpuikawn thleng Bus-a han chuan hian seat tha a chuan tawh hi chuan putar deuh pawh nimahsela lo kiantu nih hi a har thin khawp an ti a ni) Chief Minister nihna (vote khat pawh hmu lo, roll-ah pawha awm miah lo hnena) kenna rah vek a ni tih hi he hnam hian a hriat nawn leh tul ka ti a ni. Chuvang chuan vawiinah pawh Pu

Laldingliana, Lunglei ‘S’ bialtu zahawm takin he Resolution a NGO hruaitu an nih atanga an lo dream kha a taka a lo thlen theihna tur, an rawn hmuhna atangin, kan House Leader kut tihchak puiah he House a member te hi min rawn sawm ta a ni.

Hetah hian Pu Speaker, kan en vang vang hian chhim rilru ang deuh a in puh hi na ka tihpui ve deuh a. Na ka tih puina chhan chu, vawiina kan Resolution lo langte hi sawiho hman ta vek ila, No. 10-na te pheih hi chu Mizoram hmar ami a sin, he Resolution hian a kawh Tuirial, Serlui bial a mi daih a ni. Chumi rawn puluttu te chu Lawngtlai ‘E’ bialtu MLA a ni. Chuvang chuan he Ram Ropui, hmasawna tak tak hi, i dinglam ami te hi chuan kan ngaihtuah a ni tih hi a chiang hle, vawiinah Resolution No.10 na lo lang atang te pawhin a lang a ni. Chutiangan South Tuipui bialtute, Champhai North Bialtute Resolution te pawh hi han en ta ila, chuvang chuan i dinglama thu te hi chuan a ram chan dan ang ang a, kan han hmu a, kan rawn chhang chhuak te pawh ni mai ta sela. Engemaw wording lo dik hlel deuh leh duh thawh deuh hlek chu a awm a ni thei e. Amaherawhchu, hemi in a tum ber chu, chhim bial tan pawh nisela, Mizoram a ni a, chu chu Saitluk ah a ni emaw, khawi hmunah pawh thlawhna tum hmun hi lo awm nisela Mizoram hnam tan, Mizoram tan hian a ni. Choak aia lian bak a tum hlei lo ang e, tihah chuan, nikhatah vawiinah ringawt pawh thawhna pathum pali a rawn tum ani a. Chuvang chuan boycott tu te kha an in bih chian ka duh hle, hriat thiampui awm viau mahse.

Pu Speaker, ka rawn sawi chhan ber, ka rawn din chhan ber chu Lunglei ‘S’ bialtu MLA zahawm tak Pu S. Laldingliana Resolution “Chhimbial mipuite harsatna sukiang tura, Lunglei bula airfield (chu chu mizotawnga ka sawi ang khan thlawhna tum hmun kha a ni mai a a dang zawng zawng kha mizotawngin kan chhiar tho bawk a. Chuti zawng khan rilru kha lo awm mai sela) siam anih theih nana hmalak a ni ta hi lawmawm kan ti a. Airfield hi siam thuai a nih theih nan sorkar laipuih nawr zui zel ni rawh si”, tih hi ka rawn support a, lungrual taka pawm tlan ka rawn dil pui ve a ni e. Pu Speaker, ka lawm e.

SPEAKER : Awle, 15 mins kan la nei a. Hetiangah hian kan tih dan pangngaiyah chuan a changtu Minister-in a Port folio lam relate Resolution a nih chuan sorkarin hma a lo lak tawh dan emaw, hmalak mek emaw, hmalak a tum dan emaw a sawifiah thin a. Chutiangan Resolution neitu kan sawm hma in Aviation changtu Minister, kan Chief Minister ni bawk sawm ila. Sorkar dinhmun te leh tul a tih te House min han hriattir teh se. Ka sawm e.

Pu LAL THANHAWLA, HON’BLE CHIEF MINISTER : Pu Speaker, chhimbial tan tih ah khan, nichin khan chhim chhuak te kha an sawi a. Kei pawh hi ka pi pu te chu Hnahthial thlang atanga lo chhuak saw an ni an ti a. Khawi khua ber nge, a hming ber ka hre lova, Hnahthial thlang mai ah sawn. A, Hnahchang a niang, kan khua vel a niang. Lalsangliana khaw lampang a niang. Pu Speaker, nang pawh chhim chhuak i ni tak maw, a nih tak chu. Chuti anih chuan a relevant viau anih chu i tan pawh Pu Speaker.

Engpawh nisela, a hmasa in MLA zahawm tak Pu Thlenga zawhna chhanna dik lo taka an rawn ziaak chhuah kha a pawl khawp a. Zawhna chhanna diklo hi a awm zeuh zeuh mai a Pu Speaker, Department lampang tih dik loh a ni a. Tin, hei hi, kei pawhin ka chhan tura lo chhuak chu nise a diklo tih hi ka hre thei in ka ring a, hei kher kher hi chu. Chuvangin an fimkhur hle a ngai a ni tih hi kan hre thar leh thin a. Chuvangin, tun tumah pawh hian kan lo hre leh ang a. Minister dang dangte pawhin kan fimkhur hle a ngai a ni tih hei hian min hriattir a. Thupha chawi pahin tih dik thuai kan tum tawh ang tih kha kan sawi duh a ni.

Tin, tun tum a tangka lapse ang chi a hi a pawl kan ti khawp a. A pawl tih ai mahin thin a rim a. Amaherawhchu, Pu Speaker, tih dan thar deuh a ni a RBI-ah. Nizanah pawh dar 12:00 Pm thlengin an bei a ni a. Tin, keini leh Tejpur bik hi India ram pumpuiah Champhai bik nen thlipui avang leh engemaw harsatna bik avangin min ngaihnhathiam a, tichuan dar 12:00 Pm thleng an ti chho ngar ngar a ni.

Amaherawhchu, an kal deuh zel dawn avang khan dar 2:00 Am ah RBI-in an rawn shut down ta vek a ni. Tukinah RBI Mumbai-ah biak an ni a mahse, Mizoram bik an tih chuan hmundang khan an thik vek dawn a. India ram pumpui inangkhata tih a ni a. Core Banking an ti a, chumi hnuaiia kal vek chu kan nih avangin a tih ngaihna a awm ta lova. Amaherawhchu, tuna mi ho hi tangka kumtharah hian re-appropriation atanga tih a, a pumhlum lo tura min sawi thlamuanna chu an nei a, chu chu kan inngahna a ni ta a nih chu.

Engpawh nisela, sorkar leh department te kan thiamlo a, Finance te pawh an thiamlo ani ang a. Hemi avang tak hian warning kan inpe nasa a, February thla tawp hmian tih tur zawng zawng chu tihfel vek tur, kan ti a. A theih tak tak thin lova. Chuvangin, March ni 15 kan han ti leh a. Tam tak alo luh hnuah tlema zawngte a la awm ang tih kan rin avangin a tul leh pawimawh zual atan March, 25 thleng kan han ti chung pawhin an tlin ta ngang lova. Tun hnu zelah hetiang hi a awm tawh lohna turin tan lak a ngai ani tih min hriattirtu a ni a. Pawl kan ti satliah mai a nilova, ka thin a rim a. Amaherawhchu, a sawt tawh vak lova, a la sawt leh na chu a hawn tur ang ang an han hawn chhoh hnuah chuan helaiah hian shedding kan la nei ani tih hi member zahawm tak te ka han hriattir duh a ni. A mithiam zawk ten khulama an inbiakna min hrilh danin. Awle, Pu Speaker, kan Resolution hi a bulthum atanga han sawi ka chak khawp mai a, mahse hunin a daih dawn lova wind-up chhung nen, ka sawi tawh lo mai anga.

Lengpui khu P.C hma pawh khan Pu Chhunga ho pawh khan an lo zuk thlir tawh a ni, airport atan. Tichuan, keini kan lokal chho va a, kan hotuten an chhunzawm chho zel a. P.C hunlaia an lo en kha member zahawm tak Pu Nirupama sawi ang khan, a chhengchhe deuh a, a zim deuh hlek bawk a. Chuvangin, 'helai chu a thalo ang' an tih hnuah BRTF, khatih laia Chief Engineer ten thahnem min lo ngaihpuia a. Khulai hmun khu an han en a, 'engemawtia her remin a tih theih mai ang', an tih tak hnuah tih a ni a.

Tin, Land acquisition velah harsatna kan tawh lohna turin Pi Lalsawmliani, Pu Hmartawnphunga nupui khan a sangha dil pahnih leh ram zawng zawng kha a surrender a. Chumi tlawhchhan chuan Aizawl milian leh huan nei ho kha kan han dawr kual ve a. Ram leh hnam tan chuan an lo phal deuh fur mai a. A lawmawm khawp a, a ropui pawh kan ti a. Amaherawhchu tlema mi ngiaunger deuh thenkhatin a hnulamah khan kan lo thawh hah tawhna, asset kan lo siamna man te tal hi chu kan hmu tur a ni, chutiang khatiang ti an rawn awm leh ta a. Chumi avang chun tlema zawng vaibelchhekhat leh a chanve vel compensation-ah kan seng leh ta a ni. Engpawh niselangin Project lian thamah chuan compensation kan sem tlemna pawl tak a ni a. Khatianga ram phal taka petute ho hnenah khan tun thleng hian kan lawm a, midang pawhin tunhnu zelah entawn tlak in kan hria a ni.

Tin, a wording hi “Chhim bial mipuite harsatna sukiang tura Lunglei bula airfield siam a nih theih nana hmalak a ni ta hi a lawmawm kan ti a. Airfield hi siam thuai a nih theih nan sorkar laipuah nawr zel ni rawh se”, tih te pawh hi nia. Keini chu kan zalen a, tha kan tih ang angina kan kal mai a, member ho hi hotute leh hruaitute kan nih avangin mahni tawkah, hengte hi kan sawiho hranpa lem lova. Nichina Pu Thlenga nge, Pu Ramhluna ka hre chiang chiah lova, in a sawi ang khan no-confidence in a move-na a ni lawm ni? Kan institute pawh kha a awm khawp mai. Keipawh chutiang chuan a ni mai awm mang e aw! tih te pawhin a zu chhiarchhuah theih a. Kan tihdan te kan sawi reng a, Lengpui Commission tun tumah pawh kan rawn tharthawh leh a, hetia kan tih chungah han ti leh hi chu min la na lo hle a ni mai awm mang e aw! member zahawm tak hian tih pawh a ngaihtuah theih a, mahse, chutiang lam chu a ni lo tih kan hriat avangin lawmthu kan sawi zawk a ni.

Tin, amend duhna a awm a, hetah hian a mawh hi kan phur in ka hria a. A chhan chu kan manifesto-ah chhimbiala harsatna sukiang tur khan kan intiam tawh a. Bial zawngin kan siam lo hrim hrim mai a. Tin, Central sorkar ‘Look East Policy’ a lo berah airport pahnih tal kan neih belh theihnan hma kan la ang. “Lunglei khawpui mipui leh chhim bial mipuiten an hman tangkai theih tur airport chu ngaih pawimawh hmasak an ni ang”, tiin kan lo zia kalh a. Chhim bial mipui kan tih khan a lo copy chhuak ni turah ka ngai a. Chuvangin, ama mimal bik thil ngaihtuah kan ni e, tih lampang ai mahin kan manifesto, chhim lampang tlema tunhma atanga hnufual deuh hleka an in hriatna zuk siamthat nana, kan hotute tawngkam lo dah kha a ni zawka, ama mimal a ni hranpa love, tih te han sawi a tulin ka hria a, chu chu ka’n sawi hmasa a ni.

Pu Speaker, a lawmawm khawp a, engnge ni a danglamna teh chiam ka hre lova, airfield hi chu a te deuh niturah ka ngai a, airfield leh airport hi ka hrechiah lova, engpawh niselangin (Pu B. Lalthlengliana : Thlawhna a kha a te deuh anih chuan a tha tho a, ka rilru a ngaihtuahna ah chuan a airport law law kha nise kan ti deuh a ni.) kan zawh zawk a chu Pu Speaker, a airport leh a airfield hi khawngge lian zawk hi kei ka hre vak lova, mithiam te ka lo zawt hman lova, airport chu nge lian zawk tur chu ka hre lova, engpawh niselangin thlawhna tumhmun tha tawk a kha a tum a chu a ni mai tur ah ka ngai a.

Tin, amend hi hei kan hotute zingah pawh hian keini lampang han ti bik ila mawilo nilosela a wording hi siam that deuh a tha lawm ni, a chhimbial tih ai chuan Zoram pum tan tih te pawh a awm a ni. Kan han sawiho a, kan hotute pahnih pathumin kan Speaker hi an han bia a, helai putluh tawh hnua chawp leh chilh a amend hi dan in alo phal lova, tum chu kan lo tum ve a ni. Chuvang chuan pawmzam mai ang kan ti ta a ni.

Engpawh nise, kan hre theuh a, tunhma in independence hma chuan chhim lampang saw Zoram pumpui hian kan kawt chhuah a ni a, amaherawhchu, Independent hnu ah hian hmar lamah hian a in sawn phei ta a. Tunah hi chuan Multi-Modal Transport Project te leh kan thenawm te nena border te hi kan ti puitling thei a nih chuan saw lampang saw keini Zoram tan chauh pawh nilo India hmarchhak pumpui tan hian Trade & Commerce chhuahka pawimawh tak a ni dawn a ni. Sawmi Kelewa atangin kawng kan tih hnua chuan lawnglian a han kal hnua chuan Sittwe an tih atang chuan Kolkata chu darkar riat kal chauh ani an ti a. Bungraw lian te han phur dawn ta ilangin a tlawm hle dawn a ni by road ai chuan. Chutiang chu anih avangin a hmanhmawh thlak a zawhna leh chhanna hunah khan a hmanhmawh thlak dan te kan sawi tawh a, tunah chuan sawi tawh lo ila.

Tunah hian Burma nena Zokhawthar Border Trade kan neih zawhah chhim lamah a tawlh phei ang a. Thingsaiah kaltlanga insumdawn tawna nei tura inrem siam ka ni a. Chungte avang chuan kan hunlaih khan Thingsai thlanga Tiau hawlh thlengin kawngpui kan lo sial tawh a. Burma lama kan mizo unaute pawh an lawm khawp a, lawmthu te an rawn sawi a. Hmannia ka va kal leh pawhin khaw sawmpahnih atangin mi sawmli zet kei teh meuh min hmu turin an lo kal a. Anmahni lamah khan kawng sial sak turin min ngen a. D.C hnenah khan “a theih ang angina lo sial rawh u”, kan ti a. Chumi sial chu anmahni voluntary works te nen tun thlengin a la kal a. Keimahni lampang kha lo tih hlauh tawh zawk thung a ni tih kha min hrilh a. Chu chu a rang thei ang berin rawn tihfel leh kan tum ang kan ti a. Tichuan, Zokhawtharah a puitling a, a rawn tawlh phei a, Thingsaiah chuan Bazar neih tur a ni a. Chumi zawh chuan a tawlh phei leh ang a, hmar lamah, Chapuiah chutiang zel chuan, chungte avang chuan helai airport hi a pawimawh telh telh dawn a.

Tin, Bangladesh nena kan Border Trade tur hi, Pu Speaker, hmannah khan vanneihthlak takin, ka sawi tawh in ka hria a, an Foreign Minister lo kal dawn khan kan External Affairs Minister hnenah, helai hi agenda ah lo dah ve teh, kan ti a, a lo dah ngei a. Tin, an inbiaknaah chuan, an Foreign Minister pawh chuan a remti nghal a. Chittagong thlenga kawngpui sial pawh kha a remti nghal a. Chumi an minute copy pawh chu an External Affairs Minister khan min rawn thawn nghe nghe a ni. Tin, hmanni a Prime Minister Sheik Hasina lo kal khan banquet ah khan min rawn sawm ve a. Chutah pawh chuan ama hnenah khan kan han sawi leh a, a tuk press conference-ah khan a puang ta nghe nghe a, a lawmawm hle a. Tin, kha Banquet-ah khan kan High Commissioner nen kan thu dun a lo zin ngei ngei turin ka sawm a, tun ni 25 hi a niin ka hria ka hriatsual loh chuan mahse, ka hresual maithei a, “Ka lo zin dawn” a ti a. Tin, chumi hunlaih pawh Border Trade ka sawi khan, “Chutia min sawm chuan lo kal ngei

ka tum ang a, a hmunah ngei kal ka duh ang”, a ti a. Lehkha a rawn thawn a, “ni 25 ah lokal ka tum ang”, a ti a. Tlabung thlengin Border Trade kan propose na hmun thlenga amah ngeiin a va tlawh hi a duh thu a rawn ziak lang nghal a ni. Chutiang chuan sawlaih Border Trade kan han neih chuan heng airport hi a pawimawh zual zel dawn a.

Tin, he airport kan proposed hi DoNER Minister pawhin min phurpui khawp mai a, min phurpui nachhan chu Multi-Modal Transport Project avang tho hi a ni a. Hei hi kan neih thuai a tha a, hemi hma pawh hian thlenin fahran pawh hi in nei chhe lulai em a, hengte pawh hi in rawn ti rang dawn nia a ti a. Delhi-ah khan Good will kan tan hian a thahnem khawp mai a. Amaherawhchu, kan Capitalise hlei thei lova hemi DPR han prepare zung zung tur te, tih zung zung kha a ngai a, khami tello khan engmah an consider thei si lova. Chutiang zawng chuan kan sorkar hnathawk te pawh tan la turin kan ti a, a theih loh chuan Ministry in an nei vek a, chu chu man nei pawha rawih mai tur kan in ti tawh a ni. Entirnan, tun sorkar thar alo pian hma khan Food Processing Minister hian 65 crores kha min puan sak a, kum khat hnuah a DPR kan la peih ta lo cheu va. Amaherawhchu, a concept paper leh kan acceptance paper kha kan submit thei chauh a ni. Pu Speaker, zep tur a awm lova, heng hi kan sorkar inefficiency a ni a, tun thleng hian innawr ngial a ngai a, chuvangin hemi Saitlukkawn pawh hi tuna an han en thuak ah chuan Lengpui khu a dung khu 2.5 Km a ni a, chutiang tiat vel awm chu awm thei tur awma ngaih a ni a. Chuvangin hmana Airport Authority of India a an Chief Engineer leh a hote lokal pawh kha Aerial Survey neih pawh kha an phur viau a. A hmuna kal an duh a, mahse, kawng a tha lova, a pawh hle a. Kawng pawh a ranglama han tih a, anmahni ho nena DPR han tih te pawh chu kan tum dawn ang a.

Tin, 13th Finance Commission ah khan ka sawi tawh angin kan lo dil takna in khatiang thil tul paper a kha ala awm hman loh avangin an tan ngaihtuah ngaihna a awm ta lova. Mahse, chuti chungin DoNER Minister ten min phurpuina atang te leh Planning Commission a kan sawi a tha leh tul ni a an lo hriatpui an sawi atang te khan 13th Finance Commission Recommendation tello pawhin beiseina sang tak kan nei a ni. Tin, a hmanhmawh leh hmanhmawh loh dan tur chu sum kan neih leh neih loh dan te a ni ang a. Engpawh nise, a chak theihna turin chumi hma pawh chuan tul ang zawng zawng kan lo thawh hmasak a tul a. Chu chu hna hmasa ah kan nei ang tih he House zahawm tak hi ka han hriattir duh a ni. Ka lawm e.

S P E A K E R : Awle, tunah chuan Resolution neitu kan sawm ang a. Pass rawn dil nghal sela.

Pu S. LALDINGLIANA : Pu Speaker, lawmawm ka ti khawp mai. Vawiina ka Resolution hi member 26 zetin kan sawi a. Tumah a thlawplo zawnga sawi kan awm lova. Tin, lawmawm takin, i veilama thu te member 2 te pheih chuan 100% mai pawh ni lovin 120% in he resolution hi an support a ni tih te an sawi a, lawmawm ka ti tak tak a ni.

Kan House Leader zahawm tak sawi tak ang khan, a wording chungchangah kan Election Manifesto dungzui a he wording hi buatsaih anih avangin duh thu a la sam tawk chiah lova. Mizoram han tih mai turah khan chhim lam han tih atanga tan anih takah khan kan Home Minister zahawm tak advised na angin tih danglam te pawh kan duh a. Amaherawhchu, Dan lampang atangin chawp leh chilh a han tih danglam mai kha ala hun rih loh avangin kan member ten min lo hrethiam sela, engpawh nise ka sawilan tak ang khan he airport lo awm tur, lo puitling tura hi chhim lam tan chauh a nilova, Mizoram pumpui tana hmasawna tur a ni a.

Ka sawilan tak ang khan India sorkar tan ram venhimna atan airport pawimawh leh tangkai tak tur a ni tih kan sawilang ve duh hrim hrim a. Kan sawi tam tawh a, sawi tam pawh ka tum tawh chuang lova, Pu Speaker, he Resolution hi he House zahawm takah hian min pass pui turin karawn dil a ni e. Ka lawm e.

SPEAKER : Awle, Resolution neitu kan sawm hnu in House zahawm tak hi a Resolution pass pui turin minrawn ngen a. Tunah House ngaihdan kan lo la ang a, pass remti apiangin ‘rem ti’ ti rawh u le, remti lo kan awm chuan ‘rem ti lo’ ti rawh u le.

Resolution – “Chhim bial mipuite harsatna sukiang tura Lunglei bula Airfield siam anih theih nana hmalak a ni ta hi lawmawm kan ti a. Airfield hi siam thuai anih theih nan Sorkar laipuih nawr zui zel ni rawh se”, tih chu House in lungual takin a pass ta a ni. Tlem in kan comment ve ang a.

Pu LAL THANHAWLA, HON’BLE CHIEF MINISTER : Pu Speaker, kam khat chiah Resolution dang hi min lak pui dawn em? Anih chuan, “Churachanpur Lamka, Manipur-ah Mizoram House sak anih theih nan hmalak ni rawh se”, tih hi hma kan la e. Nuai ruk hmanni khan kan sanction a, a tul tul lo thawh lawkna turin. Chumi atan chuan tualchhung ami ngei tawng hmang te zinga an hotupa, a hna pawh hi pek ani e, tih kan hrilh duh a ni.

SPEAKER : Chu ai mah chuan khu ti laia NEIGRIMS kha an hawng tawh si a. Kan damlo ten an zuk pan leh ruih ruih dawn a, khulaia khualbuk vel kha engtingne hmalak kan nei tan tawh em?.

Pu LAL THANHAWLA, HON’BLE CHIEF MINISTER : Pu Speaker, thil thar deuh ani a. Ngaihtuahna a la lut lova, Mizoram House erawh chu tih len mek a ni a, sorkar hmasa atang khan. Chu chu hawn an peih tawh a. A hmun hi khawi lai tak nge ka hre chiah lova. A bul hnaiah engemaw khualbuk emaw, damlo te tana remchanna tur siam a ngai dawn a ni. Sorkarin tih a tum ngei ang a. An sorkar khu a nging reng mai a, thil tak tak khu an ngaihtuah hleithei lova. In pawh thlak tumin an in veh reng hlawm mai a. Hmanni pawh ka zuk be dawn a. Lokal la, min tanpui teh an ti a. Mahse, tanpui tlak a ni vak lova.

Chuvang chuan an ni mimal ram te pawh khu leisak emaw anni atangte khuan kan dil chhin ang a, hei Guwahati-ah mimal ram kan leisak mai a, chutianga leisak a tih theih anih chuan kan lo ngaihtuah ang.

SPEAKER : Ka'n sawi duh a chu thil pawimawh leh tul hi a rualin a tih vek theih lova, chuvangin special package thlih thlih a ngai a. Lengpui lamah package kan hung ang a, Lunglei lamah kan hung leh ang a, a tul a nih chuan Manipur lam depah pawh kan hung zel turah in ngai ila, a chhim lam nger ngut emaw, a hmarlam nger ngut emaw, tiang lampang kha ngaihtuahna ah hian awm lo phawt mai sela, zau hak mai ila a tha awm e. Awle, waviin kan business chu kan zo tawh a, kan chawl tawh ang a. Hei, naktuk ni 2.04.2010 hi Good Friday anih avangin kan chawl ang a, Good Friday leh Easter Sunday member ten hlim taka hmang turin ka duhsak che u a.

Pu LALDUHAWMA : Lawkin, thil dang kan zep teuh mai a waviin kan resolution ah khan. Kan pawisa khati zat lapse tur kha, hei ni khat chiah Session hun tur kan nei tawh a, short duration discussion emaw sorkar lam hian rawn pulut ta zawk sela, thawhtanah te chuan Legislature Party. Tin, ni thum a tang hian pakhat vel theuh in emaw sawiho ta ila, darkar chanve ah chuan kan zo mai ang a, han sawiho kha a phu viau lo maw ! sawina hun remchang dang a awm tawh si lova.

Pu LAL THANHAWLA, HON'BLE CHIEF MINISTER : Pu Speaker, kan member zahawm tak tak thenkhat khan sentiment an rawn express a, a inang vek mai a, kan sentiment leh kan englo dan a hi, a saving base kha kan ngaihtuah a kan Principal Secretary leh Rural Development Department lampanga lo inrawlhna atang pawhin a kawng chu awm dawn niawm in an sawi a. Engpawh chu niselangin kan sawi tawh ang khan hemi lapse awm a hi a uiawm hranpa ringawt lova, a thinrim thlak ka ti a. Ka sawi tawh a, tuna kan member te'n a chhuan chhe zawng lampang ni lova, a problem awm dan te hrethiam taka an rawn express a pawh hi lawmawm ka ti takzet a, tuna member zahawm takin a rawn rawtna te kha, kan sawihona atanga short notice khatiang han tih a, statement han tih atanga in bengvarna zawk te leh thil tha zawk te lo chhuak tura kan beisei phawt chuan a tul anga tih zel kha keini lam atang chuan kan hnial lo a ni.

SPEAKER : Awle, kha kha chu short notice duration kha chu a hma darkar khat velah khan a tih maitheih in ka hria a. Chutah chuan thawhtan lamah khanin a tih theihin ka ring a. La ngaihtuah chhoh niselangin, kan han sawi tawh ang khan Good Friday kan Kut ropui leh Easter Sunday kan Kut pawimawh tak mai kan thleng dawn a ni a. Tahchuan, chu chu member tin ten hlim taka hmang turin ka duhsakna ka hlan che u a. Tichuan, thawhtan ni 5.04.2010 zing dar 10:30 Am ah kan thukhawm leh dawn nia.

Sitting is Adjourned at 4:10 Pm.